

ગ્રંથ
248
6B

373

104

(112)

थेर-गाथा

राहुलसङ्किञ्चानेन
आनन्दकोसल्लानेन
जगदीसकस्सपेन च
सम्पादितो

393
7

उत्तमभिक्षुना पकासितो

२४८१ बुद्धवच्छरे (1937 A. C.)

**PRINTED BY M. PANDEY AT THE A. L. J. PRESS, ALLAHABAD
AND PUBLISHED BY UTTAM BHIKSHU, RANGÖON**

प्राङ्निवेदनम्

पालिवाङ्मयस्य नागराक्षरे मुद्रणं अत्यपेक्षितमिति नाविदितचरं भारती-
येतिहासविविदिषूणाम् । संस्कृतपालिभाषयोरतिसामीप्यादपि यत् परस्सहसेभ्यः
जिज्ञासुभ्यः संस्कृतज्ञेभ्यः पालिग्रन्थराश्यवगाहनं दुष्करमिव प्रतिभाति तत् लिपि-
भेदादेव । एतदर्थमयमस्माकमभिनवः प्रयासः । अत्र नूतना अपि पाठभेदाः निधेया
इत्यासीदस्माकं मनीषा परं कालात्ययभीत्याऽत्र प्रथमभागे धम्मपदादन्यत्र न तत्
कृतमभूत् । अधोऽटिप्पणीषु सन्निवेशिताः पाठभेदाः । प्रायः Pali Text Society
मुद्रितेभ्यो ग्रन्थेभ्य उद्धृताः ।

अर्थसाहाय्यं विना अस्मत्समीहितं हृदि निगूहितमेव स्यात् । तत्र भदन्तेन
उत्तमस्थविरेण साहाय्यं प्रदाय महदुपकृतमिति निवेदयति—

कार्तिकशुक्लैकादश्यां
२४८० बुद्धाब्दे

राहुलः सांकृत्यायनः
आनन्दः कौसल्यायनः
जगदीशः काश्यपश्च

विषय-सूची

	पृष्ठ		पृष्ठ
१-एकनिपातो	२	गोसाळो थेरो	६
१-वग्गो पठमो	२	सुगन्धो थेरो	६
पुण्णो मन्तानिपुत्तो थेरो	२	नन्दियो थेरो	६
दब्बो थेरो	२	अभयो थेरो	७
सीतवनियो थेरो	२	ळोमसकङ्गियो थेरो	७
भल्लियो थेरो	३	जम्बुगामिकपुत्तो थेरो	७
वीरो थेरो	३	हारितो थेरो	७
पिलिन्दवच्छो थेरो	३	उत्तियो थेरो	७
२-वग्गो दुत्तियो	४	४-वग्गो चतुत्थो	८
पुण्णमासो थेरो	४	गह्वरतीरिया भिक्खु	८
चूलवच्छो थेरो	४	सुप्पियो थेरो	८
महागवच्छो थेरो	४	सोपाको थेरो	८
वनवच्छत्थेरो	४	पोसियो थेरो	८
वनवच्छस्स थेरस्स सामणेरो	४	सामञ्जकानि थेरो	८
कुण्डधानो थेरो	४	कुमीपुत्तो थेरो	८
बेलट्ठसीसो थेरो	५	कुमापुत्तस्स थेरस्स सहायको थेरो	९
दासको थेरो	५	गवम्पाति थेरो	९
सिगालपिता थेरो	५	तिस्सो थेरो	९
कुळो थेरो	५	वड्ढमानो थेरो	९
३-वग्गो ततीयो	६	५-वग्गो पञ्चमो	१०
अजितो थेरो	६	सिरिवड्ढो थेरो	१०
निग्रोधत्थेरो	६	खदिरवनियो थेरो	१०
चित्तको थेरो	६	सुमङ्गळो थेरो	१०
		साहु थेरो	१०

	पृष्ठ		पृष्ठ
रमणीयविहारी थेरो	१०	आतुमो थेरो	१६
समिद्धि थेरो	१०	माणवो थेरो	१६
उज्जयो थेरो	११	सुयामनो थेरो	१६
सज्जयो थेरो	११	सूसारदो थेरो	१६
रामणैय्यको थेरो	११	पियज्जहो थेरो	१६
६-वग्गो छट्ठो	१२	हत्थारोहपुत्तो थेरो	१७
विमलो थेरो	१२	मेण्डसिरो थेरो	१७
गोधिको थेरो	१२	रक्खितो थेरो	१७
सुबाहु थेरो	१२	उग्गो थेरो	१७
वत्तिलया थेरो	१२	९-वग्गो नवमो	१८
उत्तियो थेरो	१२	समितिगुत्तो थेरो	१८
अज्जनावनियो थेरो	१२	कस्सपो थेरो	१८
कुटिविहारी थेरो	१२	सीहो थेरो	१८
कुटिविहारी थेरो	१३	नीतो थेरो	१८
रमणीयकुटिको थेरो	१३	सुनागो थेरो	१८
कोसलविहारी थेरो	१३	नागितो थेरो	१८
७-वग्गो सत्तमो	१४	पविड्ढो थेरो	१९
वप्पो थेरो	१४	अज्जुनो थेरो	१९
वज्जिपुत्तो थेरो	१४	देवसभो थेरो	१९
पक्खो थेरो	१४	सामिदत्तो थेरो	१९
विमलकोण्डज्जो थेरो	१४	१०-वग्गो दसमो	२०
उक्खेपकतवच्छो थेरो	१४	परिपुण्णको थेरो	२०
मेधियो थेरो	१४	त्रिजयो थेरो	२०
एकधम्मसवनीयो थेरो	१५	एरको थेरो	२०
एकुद्धानियो थेरो	१५	मेत्तजि थेरो	२०
छन्नो थेरो	१५	चक्खुपालो थेरो	२०
पुण्णो थेरो	१५	खण्डसुमनो थेरो	२०
८-वग्गो अट्ठमो	१६	तिस्सो थेरो	२१
वच्छपालो थेरो	१६	अभयो थेरो	२१
		उत्तियो थेरो	२१

	પૃષ્ઠ		પૃષ્ઠ
દેવસભો થેરો	૨૧	સુરાધો થેરો	૨૭
૧૧-વગ્ગો એકાદસયો	૨૨	ગોતમો થેરો	૨૭
વેલટ્ઠકાનિ થેરો	૨૨	વસભો થેરો	૨૭
સેતુચ્છત્થેરો	૨૨	૨-વગ્ગો દુતિયો	૨૯
બન્ધુરો થેરો	૨૨	મહાચુન્દો થેરો	૨૯
ખિત્તકો થેરો	૨૨	જોતિદાસો થેરો	૨૯
મલિતવમ્બો થેરો	૨૨	હેરઝ્ઝકાનિ થેરો	૨૯
સુહેમન્તો થેરો	૨૨	સોભમિત્તો થેરો	૩૦
ધમ્મસવો થેરો	૨૩	સબ્બમિત્તો થેરો	૩૦
ધમ્મસવપિત્તુ થેરો	૨૩	મહાકાલો થેરો	૩૦
સઙ્ગરક્ખિતો થેરો	૨૩	તિસ્સો થેરો	૩૦
ઉસભો થેરો	૨૩	કિમ્બલો થેરો	૩૦
૧૨-વગ્ગો દ્વાદસયો	૨૪	નન્દો થેરો	૩૧
જેન્તો થેરો	૨૪	સિરિમા થેરો	૩૧
વચ્છગોત્તો થેરો	૨૪	૩-વગ્ગો તતિયો	૩૨
વનવચ્છો થેરો	૨૪	ઉત્તરો થેરો	૩૨
અધિમુત્તો થેરો	૨૪	ભદ્દજિ થેરો	૩૨
મહાનામો થેરો	૨૪	સોભિતો થેરો	૩૨
પારાપરિયો થેરો	૨૪	વલ્લિયો થેરો	૩૨
યસો થેરો	૨૫	વીતસોકો થેરો	૩૩
કિમ્બલો થેરો	૨૫	પુણ્ણમાસો થેરો	૩૩
વજ્જિપુત્તો થેરો	૨૫	નન્દકો થેરો	૩૩
ઇસિદત્તો થેરો	૨૫	ભરતો થેરો	૩૩
૨-દુકનિપાતો	૨૬	ભારદ્વાજો થેરો	૩૩
વલ્લિયો થેરો	૨૬	કળ્હદિન્નો થેરો	૩૪
ગઙ્ગાતીરિયો ભિક્ખુ	૨૬	૪-વગ્ગો ચતુત્થો	૩૫
અજિનો થેરો	૨૭	મિગસિરો થેરો	૩૫
મેઢ્ઢજિનો થેરો	૨૭	સિવકો થેરો	૩૫
રાધો થેરો	૨૭	ઉપવાનો થેરો	૩૫

	पृष्ठ		पृष्ठ
इसिदिन्नो थेरो	३६	उत्तरपालो थेरो	४४
सम्बुलकच्चानो थेरो	३६	अभिभूत त्थेरो	४४
खितको थेरो	३६	गोतमो थेरो	४४
सोणोपोटिरियपुत्तो थेरो	३६	हारितो थेरो	४४
निसभो थेरो	३६	विमलो थेरो	४५
उसभो थेरो	३७		
कप्पटकुटो थेरो	३७		
५-वग्गो पञ्चमो	३८	४-चतुक्कनिपातो	४६
कुमारकस्सपो थेरो	३८	नागसमाल थेरो	४६
धम्मपालो थेरो	३८	भगु थेरो	४६
ब्रह्मालि थेरो	३८	सभियो थेरो	४७
मोघराजा थेरो	३९	नन्दको थेरो	४७
विसाखोपञ्चालिपुत्तो थेरो	३९	जम्बुको थेरो	४७
चूलको थेरो	३९	सेनको थेरो	४७
अनूपमो थेरो	३९	सम्भूतो थेरो	४८
वज्जितो थेरो	३९	राहुलो थेरो	४८
सन्धितो थेरो	३९	चन्दनो थेरो	४८
		धम्मिको थेरो	४९
		सप्पको थेरो	४९
		मुदितो थेरो	४९
३-तिकनिपातो	४१	५-पञ्चनिपातो	५०
अङ्गणिक भारद्वाजथेरो	४१	राजदत्तो थेरो	५०
पञ्चमो थेरो	४१	सुभूतो थेरो	५०
वाकुल थेरो	४२	गिरिमानन्दो थेरो	५१
धनियो थेरो	४२	सुमनो थेरो	५१
मातङ्गपुत्तो थेरो	४२	वड्ढो थेरो	५१
खुज्जसोभितो थेरो	४२	नदिकस्सपो थेरो	५२
वारणो थेरो	४३	गयाकस्सपो थेरो	५२
पस्सिकत्थेरो	४३	वक्कली थेरो	५३
यसोजत्थेरो	४३	विजितसेनो थेरो	५३
साटिमत्तियत्थेरो	४३	यसदत्तो थेरो	५३
उपालि थेरो	४४	सोणो कुटिकण्णो थेरो	५४

	पृष्ठ		पृष्ठ
कोसियो थेरो	५४	काकुदायी थेरो	६८
६-छनिपातो	५५	एकविहारियो थेरो	६९
उरुवेळकस्सपो थेरो	५५	महाकम्पिनो थेरो	७०
तेकिच्छकानि थेरो	५५	चूलपन्थको थेरो	७१
महानागो थेरो	५६	कप्पो थेरो	७१
कुल्लो थेरो	५६	उपसेनो वज्जन्तपुत्तो थेरो	७२
मालङ्क्यपुत्तो थेरो	५७	गोतमो थेरो	७३
सप्पदासत्थेरो	५७	११-एकादसनिपातो	७४
कातियानो थेरो	५८	संकिच्च थेरो	७५
मिगजालो थेरो	५८	१२-द्वादसनिपातो	७६
जेन्तो पुरोहितपुत्तो थेरो	५९	सीलवत्थेरो	७७
सुमनो थेरो	५९	सुणीतो थेरो	७७
न्हातकमुनि थेरो	६०	१३-तेरसनिपातो	७८
ब्रह्मदत्तो थेरो	६०	सोणो कोळिविसो थेरो	७९
सिरिमण्डो थेरो	६०	१४-चुद्दसनिपातो	८०
सब्बकामो थेरो	६१	रेवतो थेरो	८०
७-सत्तनिपातो	६२	गोदत्तो थेरो	८१
सुन्दरसमुद्दो थेरो	६२	१६-सोळसनिपातो	८२
लकुण्ठको थेरो	६३	अञ्जाकोण्डञ्जो थेरो	८३
भद्दो थेरो	६३	उदायी थेरो	८४
सोपाको थेरो	६४	२०-वीसतिनिपातो	८५
सरभङ्गो थेरो	६४	अधिमुत्तो थेरो	८६
८-अट्ठनिपातो	६५	पारापरियो थेरो	८८
महाकच्चायनो थेरो	६५	तेलकानि थेरो	८९
सिरिमित्तो थेरो	६६	रट्ठपालो थेरो	९१
महापन्थको थेरो	६६	मालुक्यपुत्तो थेरो	९२
९-नवनिपातो	६७	सेलो थेरो	९४
भूतो थेरो	६७	अङ्गलिमालो थेरो	९६
१०-दसनिपातो	६८		

(६)

	पृष्ठ		पृष्ठ
अनिरुद्धो थेरो	६८	महाकस्तपो थेरो	११०
पारापरियो थेरो	१००		
३०-तिंसनिपातो	१०१	५०-पञ्जासनिपातो	१११
फुस्सत्थेरो	१०३	तालपुटो थेरो	११४
सारिपुत्तो थेरो	१०५		
आनन्दो थेरो	१०७	६०-सट्ठिकनिपातो	११५
४०-चत्तालीसनिपातो	१०८	महानिपातो	१२०

—

थेर-गाथा

नमो तस्स भगवतो अरहतो सम्मा सम्बुद्धस्स

सीहानं व नदन्तानं दाठीनं गिरिगब्भरे ।
सुणाथ भावित्तानं गाथा अत्तुपनायिका ॥१॥
यथा नामा यथा गोत्ता यथा धम्म विहारिनो
यथाधिमुत्ता सप्पज्जा विहरिंसु अतन्दिता ॥२॥
तत्थ तत्थ विपस्सित्वा फुसित्वा अच्चुतं पदं
कतन्तं पच्चवेक्खन्ता इमं अत्थं अभासिसुं ॥३॥

एकनिपातो

वग्गो पठमो

छन्ना मे कुटिका सुखा निवाता, वस्स देव यथा सुखं;
चित्तं मे सुसमाहितं विमुत्तं, आतापी विहरामि, वस्सदेवा 'ति ॥१॥
इत्थं सुदं आयस्मा सुभूति थेरो गायमभासित्था'ति ।
उपसन्तो उपरतो मन्तभाणी अनुद्धतो
धुनाति पापके धम्मे दुमपत्तं व मालुतो 'ति ॥२॥
इत्थं सुदं आयस्मा महाकोट्टिकथेरो गायमभासित्थ ।
पज्जं इमं पस्स तथागतानं, अग्गि यथा पज्जलितो निसीथे ।
आलोकदा चक्खुददा भवन्ति ये आगतानं विनयन्ति कड्ढखन्ति ॥३॥
इत्थं सुदं आयस्मा कड्ढखारेवतो थेरो गायं अभासित्थ ।
सब्भिरेव समासेथ पण्डितेहत्थदस्सिभिः
अत्थं महन्तं गम्भीरं दुद्दसं निपुणं अणुं
धीरा समधिगच्छन्ति अप्पमत्ता विचक्खणा 'ति ॥४॥

आयस्मा पुण्णो मन्तानिपुत्तो थेरो

यो दुद्दमयो दमेन दन्तो दब्बो सन्तुसितो वितिण्णकड्ढखो
विजितावि अपेतभेरवो हि दब्बो सो परिनिब्बुतो ठित्तो 'ति ॥५॥

आयस्मा दब्बो थेरो

यो सीतवनं उपागा भिक्खु एको सन्तुसितो समाहितत्तो
विजितावि अपेतलोमहंसो रक्खं कायगतासति धितीमा 'ति ॥६॥

आयस्मा सीतवनियो थेरो

यो पानुदि मच्चुराजस्स सेनं नळसेतुं व सुदुब्बलं महोघो
विजितावि अपेतभेरवो हि दन्तो सो परिनिब्बुतो ठित्तो 'ति ॥७॥

आयस्मा भल्लियो थेरो

यो दुद्दमयो दमेन दन्तो वीरो सन्तुसितो वितिण्णकड्ढखो
विजितावि अपेतलोमहंसो वीरो सो परिनिब्बुतो ठित्तो 'ति ॥८॥

वीरो थेरो

स्वागतं नापगतं न यिदं दुम्मन्तितं मम ।
संविभत्तेसु धम्मेसु यं सेट्ठं तदुपागमिन्ति ॥९॥

पिलिन्दवच्छो थेरो

विहरि अपेक्खं इध वा हुरं वा यो वेदगू समितो यतत्तो ।
सब्बसु धम्मेसु अनुपलित्तो लोकस्स जज्जा उदयब्बयज्जा 'ति ॥१०॥

वग्गो पठमो

उद्दानं

सुभुति कोट्ठिको थेरो कड्ढखाखेत सुब्बतो
मन्तानिपुत्तो दब्बो च सीतवनियो च भल्लियो
वीरो पिलिन्दवच्छो च पुण्णमासो तमोनुदो' ति ।

वग्गो दुत्तियो

पुण्णमासो थेरो

पामुज्जबहुलो भिक्खु धम्मो बुद्धप्पवेदिते ।
अधिगच्छे पदं सत्तं संखारूपसमं सुखन्ति ॥११॥

चूलगवच्छो थेरो

पञ्जाबली सीलवतूपपन्नो समाहितो ज्ञानरतो सतीमा ।
यदत्थियं भोजनं भुञ्जमानो कङ्खेत कालं इध वीतरागो 'ति ॥१२॥

महागवच्छो थेरो

नीलब्भवण्णा रुचिरा सीतवारी सुचिन्धरा ।
गोपइन्दकसञ्छन्ना ते सेला रमयन्ति मन्ति ॥१३॥

वनवच्छत्थेरो

उपज्झायो मं अवचासि इतो गच्छामि सीवक
गामे मे वसति कायो अरञ्जं मे गतो मनो
से मानको पि गच्छामि; नत्थि संगो विजानतन्ति ॥१४॥

वनवच्छस्स थेरस्स सामणेरो

पञ्च छिन्दे पञ्च जहे पञ्च चुत्तरि भावये;
पञ्चसंघातिगो भिक्खु ओघतिण्णो 'ति वुच्चती ति ॥१५॥

कुण्डधानो थेरो

यथापि भद्दो आजञ्जो नङ्गला वत्तनी सिखी
गच्छति अप्पकसिरेन, एवं रत्तिन्दिवा मम
गच्छन्ति अप्पकसिरेन सुखे लद्धे निरामिसे 'ति ॥१६॥

बेलट्ठसीसो थेरो

मिद्धी यदा होति महग्घसो च निहायिता सम्परिवत्तसायी
महावराहो व निवापपुट्ठो पुनप्पुनं गब्भमुपेति मन्दो 'ति ॥१७॥

दासको थेरो

अहू बुद्धस्स दायादो भिक्खु भेसकळावने
केवलं अट्टिसञ्जाय अफरि पट्ठविं इमं
मञ्जे 'हं कामरागं सो खिप्पमेव पहीयतीति ॥१८॥

सिगालपिता थेरो

उदकं हि नयन्ति नेत्तिका उसुकारा नमयन्ति तेजनं,
दारुं नमयन्ति तच्छका, अत्तानं दमयन्ति सुब्बताती 'ति ॥१९॥

कुळो थेरो

मरणे मे भयं नत्थि, निकन्ती नत्थि जीविते,
सन्देहं निक्खिपिस्सामि सम्पजानो पतिस्सतो 'ति ॥२०॥

वग्गो दुतियो

उद्दानं

चूणवच्छो महावच्छो वनवच्छो च सीबको
कुण्डधानो च वेणट्ठि दासको च ततो परं
सिङ्गालपित्तको थेरो कुणो च अजितो दसा 'ति ॥२०॥

वग्गो ततियो

अजितो थेरो

नाहं भयस्स भायामि, सत्था नो अमतस्स कोविदो ॥
यत्थ भयं नावतिट्ठति तेन मग्गेन वजन्ति भिक्खवो 'ति ॥२१॥

निग्रोधत्थेरो

नीला सुगीवा सिखिनो मोरा कारंविंयं अभिनदन्ति,
ते सीतवात कलिता सुत्तं ज्ञायं निबोधेन्तीति ॥२२॥

चित्तको थेरो

अहं खो वेळुगुम्बस्मि भुत्वान मधुपायासं
पदक्खिणं सम्मसन्तो खन्धानं उदयब्बयं
सानुं पटिगमिस्सामि विवेकमनुब्रूहयन्ति ॥२३॥

गोसाळो थेरो

अनुवस्सिको पब्बजितो, पस्स घम्मसुधम्मतं,
तिस्सो विज्जा अनुप्पत्ता, कतं बुद्धस्स सासनन्ति ॥२४॥

सुगन्धो थेरो

ओभासजातं फलगं चित्तं यस्स अभिण्हसो,
तादिसं भिक्खुं आसज्ज कण्ह दुक्खं निगच्छसीति ॥२५॥

नन्दियो थेरो

सुत्वा सुब्भासितं वाचं बुद्धस्सादिच्चबन्धुनो
पच्च व्याधिं हि निपुणं वालग्गं उसुना यथा 'ति ॥२६॥

उत्तियो थेरो

[७

अभया थेरो

दब्बं कुसं पोटकिलं उसीरं मुञ्जापब्बजं
उरसा पनुदहिस्सामि विवेकमनुब्रूहयन्ति ॥२७॥

ळोमसकङ्गियो थेरो

कच्चि नो वत्थपसुतो, कच्चि नो भूसनारतो,
कच्चि सीलमयं गन्धं त्वं वासि नेतरा पजा 'ति ॥२८॥

जम्बुगामिकपुत्तो थेरो

समुन्नमयमत्तानं उसुकारो व तेजनं
चित्तं उजुं करित्वान अविज्जं छिन्द हारिता 'ति ॥२९॥

हारितो थेरो

आबाधे मे समुप्पन्ने सति मे उपपज्जथ
अबाधो मे समुप्पन्नो कालो मे न प्पमज्जितुन्ति ॥३०॥

उत्तियो थेरो

वग्गो तत्तियो

उद्दानं

निग्रोधो चित्तको थेरो घोसालत्थेरो सुगन्धो
नन्दियो अभयो थेरो थेरो लोमसकङ्गियो
जम्बुगामिक पुत्तो च हारितो उत्तियो इसीति ।

वग्गो चतुत्थो

फुट्ठो डंसेहि मकसेहि अरञ्जस्मिं ब्रहावने
नागो संगामसीसे व सतो तत्राधिवासये 'ति ॥३१॥

गह्वरतीरियो भिक्खु

अजरं जीरमानेन तप्पमानेन निब्बुतिं
निम्मिसं परमं सन्तिं योगक्खेमं अनुत्तरन्ति ॥३२॥

सुप्पियो थेरो

यथापि एकपुत्तस्मिं पियस्मिं कुसली सिया
एवं सब्बेसु पाणेमु सब्बत्थ कुसलो सिया 'ति ॥३३॥

सोपाको थेरो

अनासन्नवरा एता निच्चमेव विजानता
गामा अरञ्जमागम्म ततो गेहं उपाविसिं
ततो उट्ठाय पक्कामिं अनामन्तेत्वा पोसियो 'ति ॥३४॥

पोसियो थेरो

सुखं सुखत्थो लभते तदाचरं, कित्तिञ्च पप्पोति, यसस्स वड्ढति
यो अरियमट्ठङ्गिकमञ्जसं उजुं भावेति मग्गं अमतस्स पत्तिया 'ति ॥३५॥

सामञ्जकानि थेरो

साधु सुतं साधु चरितकं साधु सदा अनिकेतविहारो
अत्थपुच्छनं पदक्खिणकम्मं एतं सामञ्जमकिञ्चनस्सा 'ति ॥३६॥

कुमीपुत्तो थेरो

नाना जनपदं यन्ति विचरन्ता असञ्जता
समाधिञ्च विराधेन्ति, किं सु रट्ठंचरिया करिस्सति
तस्मा विनेय्य सारम्भं ज्ञापेय्य अपुरक्खतो 'ति ॥३७॥

कुमापुत्तस्सथेरस्स सहायको थेरो

यो इद्धिया सरभुं अट्टपेसि सो गवम्पति असितो अनेजो,
तं सब्बसङ्गातिगतं महामुनिं देवा नमस्सन्ति भवस्सपारगुन्ति ॥३८॥

गवम्पति थेरो

सत्तिया विय ओमट्ठो डय्हमाने व मत्थके
कामरागपहानाय सतो भिक्खु परिबब्बजे ति' ॥३९॥

तिस्सो थेरो

सत्तिया विय ओमट्ठो डय्हमाने व मत्थके
भवरागपहानाय सतो भिक्खु परिबब्बजे 'ति ॥४०॥

बड्ढमानो थेरो

वग्गो चतुत्थो

उद्दानं

गह्वरतीरियो सुप्पियो सो पाको च पोसियो च
सामञ्जकानि कुमापुत्तो कुमापुत्त सहायको
गवम्पति तिस्सत्थेरो बड्ढमानो महायसो 'ति ।
विवरमनुपतन्ति विज्जुता वेभारस्स च पण्डवस्स च,
नगविवरगतो च ज्ञायति पुत्तो अप्पटिमस्स तादिनो 'ति ॥४१॥

वग्गो पञ्चमो

सिरिवड्ढो थेरो

चाले उपचाले सीसूपचाले पतिस्सतिका नु खो
विहरथ, आगतो वो वालं विय वेधीति ॥४२॥

खदिस्वनियो थेरो

सुमुत्तिको सुमेत्तिको साहु सुमुत्तिकोम्हि तीहि खुज्जकेहि,
असितासु मया नङ्गलासु मया खुद्दकुद्दालासु मया ।
यदि पि इधमेव इधमेव अथवापि अलमेव अलमेव,
झाय सुमङ्गल झाय सुमङ्गल, अप्पमत्तो विहर सुमङ्गला 'ति ॥४३॥

सुमङ्गळो थेरो

मतं वा अम्म रोदन्ति वो वा जीवं न दिस्सति ।
जीवन्तं मं अम्म दिस्सन्ती कस्मा मं अम्म रोदसीति ॥४४॥

साहु थेरो

यथापि भद्दो आजञ्जो खलित्वा पतितिट्ठति
एवं दस्सनसम्पन्नं सम्मासम्बुद्धसावकन्ति ॥४५॥

रमणीयविहारी थेरो

सद्धायाहं पब्बजितो अगारस्मा अनगारियं,
सति पञ्जा च मे वुड्ढा चित्तञ्च सुसमाहितं
कामं करस्सु रूपानि, नेवमं व्याघयिस्ससीति ॥४६॥

समिद्धि थेरो

नमो ते बुद्धवीरत्थु, विप्पमुत्तो सि सब्बधि
तुय्हापदाने विहरं विहरामि अनासवो 'ति ॥४७॥

उज्जयो थेरो

यथो अहं पब्बजितो, अगारस्मा अनगारियं
नाभिजानामि संकप्पं अनरियं दोससंहितन्ति ॥४८॥

सज्जयो थेरो

विहविहामिनदिते सिप्पिकाभिरुतेहि च
न मे तं फन्दति चित्तं, एकत्तनिरतं हि मे ॥४९॥

रामणैय्यको थेरो

धरणी च सिच्चति वाति मालुंतो विज्जुता चरति नभे
उपसम्मन्ति वितक्का चित्तं सुसमाहितं ममा 'ति ॥५०॥

वग्गो पञ्चमो

उद्दानं

सिरिवड्ढो रेवतो थेरो सुमङ्गलो सानुसब्धयो
रमणीयविहारी च समिद्धुज्जय-सज्जयो
रामणैय्यो च सो थेरो विमलो चरणज्जयो 'ति ।

वग्गो ढट्ठो

विमलो थेरो

वस्सति देवो यथा सुगीतं छन्ना मे कुटिका सुखा निवाता,
चित्तं सुसमाहितञ्च मय्हं, अथ चे पत्थयसि पवस्स देवा' ति ॥५१॥

गोधिको थेरो

वस्सति देवो यथा सुगीतं, छन्ना मे कुटिका सुखा निवाता,
चित्तं सुसमाहितञ्च काये अथ चे पत्थयसि पवस्स देवा 'ति ॥५२॥

सुबाहु थेरो

वस्सति देवो यथा सुगीतं, छन्ना मे कुटिका सुखा निवाता,
तस्सं विहरामि अप्पमत्तो, अथ चे पत्थयसि पवस्सदेवा 'ति ॥५३॥

वल्लिया थेरो

वस्सति देवो यथा सुगीतं, छन्ना मे कुटिका सुखा निवाता,
तस्सं विहरामि अदुतियो, अथ चे पत्थयसि पवस्स देवा 'ति ॥५४॥

उत्तियो थेरो

आसन्दि कुटिकं कत्वा ओगय्ह अञ्जनं वनं
तिस्सो विज्जा अनुप्पत्ता कतं बुद्धस्स सासनन्ति ॥५५॥

अञ्जनावनियो थेरो

को कुटिकायं, भिक्खु कुटिकायं वीतरागो सुसमाहितचित्तो
एवं जानाहि आवुसो अमोघा ते कुटिका कता 'ति ॥५६॥

कुटिविहारी थेरो

अयमाहु पुराणिया कुटि, अञ्जं पत्थयसे नवं कुटिं
आसं कुटिया विराजय दुक्खा भिक्खु पुन नवा कुटीति ॥५७॥

कुटिविहारी थेरो

रमणीया मे कुटिका सद्धा देय्या मनोरमा
न मे अत्थो कुमारीहि, येसं अत्थो तहिं गच्छथ नारियो 'ति ॥५८॥

रमणोयकुटिको थेरो

सद्धायाहं पब्बजितो, अरञ्जो मे कुटिका कता,
अप्पमत्तो च आतापी सम्पजानो पतिस्सतो 'ति ॥५९॥

कोसलविहारी थेरो

ते मे इज्झिंसु संकप्पा यदत्थो पविसिं कुटिं,
विज्जा विमुत्ति पच्चेस्सं मानानुसयमुज्जहन्ति ॥६०॥

वग्गो छट्ठो

उद्दानं

गोधिको च सुबाहु च वल्लियो उत्तियो इसि
अञ्जनावनियो थेरो दुवे कुटिविहारिनो
रमणीयं कुटिको च कोसल्लव्हय-सीवलीतिः

घग्गो सत्तमो

वप्पो थेरो

पस्सति पस्सो पस्सन्तं अपस्सन्तञ्च पस्सति;
अपस्सन्तो अपस्सन्तं पस्सन्तं च न पस्सतीति ॥६१॥

वज्जिपुत्तो थेरो

एकका मयं अरञ्जो विहराम अपविद्धं व वनस्मिदारूकं;
तस्स मे बहुका पिहयन्ति नेरयिका विय सग्गगामिनन्ति ॥६२॥
चुता पतन्ति पतिता गिद्धा च पुनरागता
कतं किच्चं रतं रम्मं सुखेन 'अन्वागतं सुखन्ति ॥६३॥

पक्खो थेरो

दुमब्धयाय उप्पन्नो जातो पण्डरकेतुना
केतुहा केतुना येव महाकेतुं पधंसयीति ॥६४॥

विमलकोण्डञ्जो थेरो

उक्खेपकतवच्छस्स संकलितं बहूहि वस्सेहि ।
तं भासति गहट्टानं सुनिसिन्नो उळारपामुज्जो 'ति ॥६५॥

उक्खेपकतवच्छो थेरो

अनुसासि महावीरो सब्बधम्मान पारगु;
तस्साहं धम्मं सुत्वान विहारसि सन्तिके रतो;
तिस्सो विज्जा अनुप्पत्ता कतं बुद्धस्स सासनन्ति ॥६६॥

मेघियो थेरो

किलेसा ज्ञापिता मय्हं भवा सब्बे समूहता
विक्खीणो जातिसंसारो नत्थि दानि पुनब्भवो 'ति ॥६७॥

एकधम्मसवनीयो थेरो

अधिचेतसो अप्पमज्जतो मुनिनो मोनपथेसु सिक्खतो
सोका न भवन्ति तादिनो उपसन्तस्स सदा सतीमतो 'ति ॥६८॥

एकुद्धानियो थेरो

सुत्वान धम्मं महतो महारसं सब्बञ्जुतञ्जाणवरेण देसितं
मगं पपज्जि अमतस्स पत्तिया, सो योगक्खेमस्स पथस्स कोविदो'ति ॥६९॥

छन्नो थेरो

सीलमेव इध अगं, पञ्चवा पन उत्तमो;
मनुस्सेसु च देवेसु सीलपञ्जाणतो जयन्ति ॥७०॥

वग्गो सप्तमो

उद्दानं

वप्पो च वज्जिपुत्तो च पक्खो विमलकोण्डञ्जो
उक्खेपकतवच्छो च मेधियो एक धम्मिको
एकुद्धानिय-छन्नो च पुण्णथेरो महब्बलो 'ति.

पुण्णो थेरो

वग्गो अट्ठमो

सुसुखमनिपुणत्थदस्सिना मति कुसलेन निवातवुत्तिना
संसेवितबुद्धसीलिना निब्बानं नहि तेन दुल्लभन्ति ॥७१॥

वच्छपालो थेरो

यथा कलीरो सुसु वड्ढितग्गो दुन्निक्खमो होति पसाखजातो
एवं अहं भरियायाजीताय; अनुमञ्ज मं पब्बजितो 'मिह दानीति ॥७२॥

आतुमो थेरो

जिण्णञ्च दिस्वा दुक्खितञ्च ब्याधितं मतञ्चदिस्वा गतमायुसंखयं ।
ततो अहं निक्खमितून पब्बजिं पहाय कामानि मनोरमानीति ॥७३॥

माणवो थेरो

कामच्छन्दो च ब्यापादो थीनमिद्धञ्च भिक्खुनो
उद्धच्चं विचिकिच्छा च सब्बसो 'व न विज्जतीति ॥७४॥

सुयामनो थेरो

साधु सुविहितान दस्सनं, कङ्कखा छिज्जति, बुद्धि वड्ढति,
बालम्पि करोन्ति पण्डितं, तस्मा साधु सतं समागमो 'ति ॥७५॥

सुसारदो थेरो

उप्पतन्तेसु निपते, निपतन्तेसु उप्पते,
वसे अवसमानेसु रममानेसु नो रमे 'ति ॥७६॥

पियञ्जहो थेरो

इदं पुरे चित्तमचारि चारिकं येनिच्छकं यत्थकामं यथासुखं
तदज्जहं निग्गहिस्सामि योनिसो हत्थिप्पभिन्नं विय अङ्कुसग्गहो 'ति ॥७७॥

हत्थारोहपुत्तो थेरो

अनेकजातिसंसारं सन्धाविस्सं अनिब्बिसं,
तस्स मे दुक्खजातस्स दुक्खक्खन्धो अपरद्धो 'ति ॥७८॥

मेण्डसिरो थेरो

सब्बो रागो पहीनो मे, सब्बो दोसो समूहतो,
सब्बो मे विगतो मोहो, सीतिभूतो 'स्मि निब्बुतो 'ति ॥७९॥

रक्खितो थेरो

यं मया पकतं कम्मं अप्पं वा यदि वा बहु
सब्बमेतं परिक्खीणं नत्थि दानि पुनब्भवो 'ति ॥८०॥

उग्गो थेरो

वग्गो अट्टमो

उद्दानं

वच्छपालो च यो थेरो आतुमो माणवो इसि
सुयामनो सुसारदो थेरो यो च पियञ्जहो
आरोहपुत्तो मेण्डसिरो रक्खितो उग्गसव्हयो 'ति ।

वग्गो नवमो

यं मया पकतं पापं पुब्बे अज्जासु जातिसु,
इधे व तं वेदनियं; वत्थु अज्जं न विज्जती 'ति ॥८१॥

समितिगुत्तो थेरो

येन येन सुभिक्षानि सिवानि अभयानि च
तेन पुत्तक गच्छस्सु, मा सोका पहतो भवा 'ति ॥८२॥

कस्सपो थेरो

सीहप्पमत्तो विहर रत्तिन्दिवमतन्दितो
भावेहि कुसलं धम्मं, जाह सीघं समुस्सयन्ति ॥८३॥

सीहो थेरो

सब्बरत्तिं सुपित्वान दिवा संगणिके रतो
कुदास्सु नाम दुम्मेधो दुक्खस्सन्तं करिस्सतीति ॥८४॥

नीतो थेरो

चित्तनिमित्तस्स कोविदो पविवेकरसं विजानिय
ज्ञायं निपको पतिस्सतो अधिगच्छेय्य सुखं निरामिसन्ति ॥८५॥

सुनागो थेरो

इतो बहिद्धा पुथु अज्जावादिनं मग्गो न निब्बानगमो यथा अयं
इतिस्सु संघं भगवानुसासति सत्था सयं पाणितले व दस्सयन्ति ॥८६॥

नागितो थेरो

खन्धा दिट्ठा यथाभूतं, भवा सब्बे पदालिता
विक्खीणो जातिसंसारो, नत्थि दानि पुनग्भवो 'ति ॥८७॥

पविट्ठो थेरो

असक्खिं वत अत्तानं उद्धातुं उदका थलं
वुय्हमानो महोघे व सच्चानि पटिविज्झहन्ति ॥८८॥

अज्जुनो थेरो

उत्तिण्णा पड्का पलिपा, पाताला परिवज्जिता,
मुत्तो ओघा च गन्था च, सब्बे माना विसंहता 'ति ॥८९॥

देवसभो थेरो

पञ्चक्खन्धा परिज्जाता तिट्ठन्ति छिन्नमूलका
विक्खीणो जातिसंसारो नत्थि दानि पुनब्भवो 'ति ॥९०॥

सामिदत्तो थेरो

वग्गो नवमो

उद्दानं

थेरो समितिगुत्तो कस्सपो सीहसन्हयो
नीतो सुनागो नागितो पविट्ठो अज्जुनो इसि
देवसभो च यो थेरो सामिदत्तो महब्बलो ।

वग्गो दसमो

न तथामतं सतरसं सुधन्नं यं मयज्ज परिभुतं
अपरिमितदस्सिना गोतमेन बुद्धेन देसितो धम्मो 'ति ॥९१॥

परिपुण्णको थेरो

यस्सासवा परिक्खीणा आहारे च अनिस्सितो
सुञ्जातो अनिमित्तो च विमोक्खो यस्स गोचरो,
आकासे व सकुन्तानं पदन्तस्स दुरन्नयन्ति ॥९२॥

विजयो थेरो

दुक्खा कामा एरक, न सुखा कामा एरक,
यो कामे कामयति दुक्खं सो कामयति एरक,
यो कामेन कामयति दुक्खं सो न कामयति एरका 'ति ॥९३॥

एरको थेरो

नमो हि तस्स भगवतो सकयपुत्तस्स सिरीमतो
तेनायं अग्गपत्तेन अग्गधम्मो सुदेसितो 'ति ॥९४॥

मेत्तजि थेरो

अन्धो 'हं हतनेत्तो 'स्मि, कन्तारद्धान पक्खन्नो,
सयमानो पि गच्छिस्सं न सहायेन पापेना 'ति ॥९५॥

चक्खुपालो थेरो

एकपुप्फं चजित्वान असीतिं वस्सकोटियो
सग्गेसु परिचारेत्वा सेसकेनम्हि निब्बुतो 'ति ॥९६॥

खण्डसुमनो थेरो

हित्वा सतपलं कंसं सोवण्णं सतराजिकं
अग्गहिं मत्तिकापत्तं इदं दुतियाभिसेचनन्ति ॥९७॥

तिस्सो थेरो

रूपं दिस्वा सति मुट्ठा पियनिमित्तं मनसिकरोतो,
सारत्त चित्तो वेदेति तञ्च अज्झोस तिट्ठति,
तस्स वड्ढन्ति आसवा भवमूलोपगामिनो 'ति ॥१८॥

अभयो थेरो

सद् सुत्वा सति मुट्ठा पियनिमित्तं मनसिकरोतो,
सारत्तचित्तो वेदेति तञ्च अज्झोस तिट्ठति,
तस्स वड्ढन्ति आसवा संसारमुपगामिनो 'ति ॥१९॥

उत्तियो थेरो

सम्मप्पधानसम्पन्नो सतिपट्ठानगोचरो
विमुत्तिकुसुमसञ्छन्नो परि निब्बिस्सत्यनासवो 'ति ॥१००॥

देवसभो थेरो

वग्गो दसमो

उद्दानं

परिपुण्णको च विजयो एरको मेत्तजी मुनि
चक्खुपालो खण्डसुमनो तिस्सो अभयो च
उत्तियो महापज्जो थेरो देवसभो पि चा 'ति ।

वग्गो एकादसथो

हित्वा गिहित्वं अनवोसितत्तो मुखनङ्गली ओदरिको कुसीतो
महावराहो व निवापपुट्ठो पुनप्पुनं गब्भमुपेति मन्दो 'ति ॥१०१॥

वेलट्ठकानि थेरो

मानेन वञ्चितासे संखारेसु संकिलिस्समानासे
लाभालाभेन मथिता समार्धि नाधिगच्छन्तीति ॥१०२॥

सेतुच्छत्थेरो

नाहं एतेन अत्थिको सुखितो धम्मरसेन तप्पितो,
पीत्वान रसग्गमुत्तमं न च काहामि विसेन सन्थवन्ति ॥१०३॥

बन्धुरो थेरो

लहुको वत मे कायो फुट्ठो च पीतिसुखेन विपुलेन
तूलामिव एरितं मालुतेन पिलवति व मे कायो 'ति ॥१०४॥

खितको थेरो

उक्कण्ठितो पि न वसे रममानो पि पक्कमे
न त्वेवानत्थसहितं वसे वासं विचक्खणो 'ति ॥१०५॥

मलितवम्बो थेरो

सतलिङ्गस्स अत्थस्स सतलक्खणधारिनो
एकङ्गदस्सी दुम्मेधो सतदस्सी च पण्डितो 'ति ॥१०६॥

सुहेमन्तो थेरो

पब्बजिं तुलयित्वान अगारस्मा अनगारियं;
तिस्सो विज्जा अनुप्पत्ता कतं बुद्धस्स सासनन्ति ॥१०७॥

धम्मसवो थेरो

सवीसंवस्ससतिको पब्बजिं अनगारियं;
तिस्सो विज्जा अनुप्पत्ता कतं बुद्धस्स सासनन्ति ॥१०८॥

धम्मसवपित्तु थेरो

न नूनायं परमहितानुकम्पिनो रहोगतो अनुविगणेति सासनं;
तथा ह्यं विहरति पाकतिन्द्रियो मिगी यथा तरुणजातिका व नेति ॥१०९॥

सङ्घरक्खितो थेरो

नगा नगगेषु सुसंविच्छहा उदग्गमेधेन नवेन सित्ता
विवेककामस्स अरञ्जसज्जिनो जनेति भिय्यो उसभस्स कत्यतन्ति ॥११०॥

उसभो थेरो

वग्गो एकादसमो

उद्दानं

बेलट्टुकानि सेतुवच्छो बन्धुरो खितको इसि
मलितवम्भो सुहेमन्तो धम्मसवो धम्मसवपिता
संघरक्खितथेरो च उसभो च महामुनि ।

वग्गो द्वादस्यो

दुप्पब्बज्जं वे, दुरधिवासा गेहा, धम्मो गम्भीरो, दुरधिगमा भोगा;
किच्छावुत्तिनो इतरीतरेनेव, युत्तं चिन्तेतुं सततमनिच्चतन्ति ॥१११॥

जेन्तो थेरो

तेविज्जो 'हं महाज्ञायी चेतो समथकोविदो,
सदत्थो मे अनुप्पत्तो, कतं बुद्धस्स सासनन्ति ॥११२॥

वच्छगोत्तो थेरो

अच्छोदिका पुथुसिला गोण्डगुलमिगायुता
अम्बुसेवालसञ्छन्ना ते सेला रमयन्ति मन्ति ॥११३॥

वनवच्छो थेरो

कायदुट्ठुल्लगरुनो हिय्यमानम्हि जीविते
सरीरमुखगिद्धस्स कुतो समणसाधुता 'ति ॥११४॥

अधिमुत्तो थेरो

एसावहिय्यसे पब्बतेन बहुकुटजसल्लकिकेन
नेसादकेन गिरिना यसस्सिना परिच्छदेना 'ति ॥११५॥

महानामो थेरो

छ फस्सायतने हित्वा गुत्तद्वारो सुसंवुतो
अघमूलं वमित्वान पत्तो मे असवक्खयो ॥११६॥

पारापरियो थेरो

सुविलित्तो सुवसनो सब्बाभरणभूसितो
तिस्सो विज्जा अज्झगमि कतं बुद्धस्स सासनन्ति ॥११७॥

यसो थेरो

अभिसत्थो व निपतति वयो, रूपमञ्जमिव तथेव सन्तं;
तस्सेव सतो अविप्पवसतो अञ्जस्सेव सरामि अत्तानन्ति ॥११८॥

किम्बिलो थेरो

रुक्खमूलगहनं पसक्किय निब्बानं हृदयस्मि ओसिय
झाय गोतम मा च पमादो, किन्ते बिळिबिळिका करिस्सतीति ॥११९॥

वज्जिपुत्तो थेरो

पञ्चक्खन्धा परिञ्जाता तिट्ठन्ति छिन्नमूलका;
दुक्खक्खयो अनुप्पत्तो, पत्तो मे आसवक्खयो 'ति ॥१२०॥

इसिदत्तो थेरो

वग्गो द्वादसमो, तत्रुद्दानं भवति:

जेन्तो च वच्छगोत्तो च वच्छो च वनपन्हयो
अधिमुत्तो महानामो पारापरियो यसो पि च
किम्बिलो वज्जिपुत्तो च इसिदत्तो महायसो 'ति ॥
वीसुत्तरसतं थेरा कतकिच्चा अनासवा
एकके 'व निपातम्हि सुसंगीता महेसिभीति ।

निट्ठितो एकनिपातो

दुकनिपातो

नत्थि कोचि भवो निच्चो संखारा वापि सस्सता,
उप्पज्जन्ति च ते खन्धा चवन्ति अपरापरं ॥१२१॥
एतं आदीनवं ज्ञत्वा भवे न 'अम्हि अनत्थिको,
निस्सटो सब्बकामेहि, पत्तो मे आसवक्खयो 'ति ॥१२२॥
इत्थं सुदं आयस्मा उत्तरो थेरो गाथायो अभासित्था'ति
न इदं अनयेन जीवितं, नाहारो हृदयस्स सन्तिको,
आहारट्टितिको समुस्सयो, इति दिस्वान चरामि एसनं ॥१२३॥
पङ्कतो'ति हि नं अवेदयुं यायं वन्दनपूजना कुलेसु,
सुखुमं सल्लं दुएब्बहं सक्कारो कापुरिसेन दुज्जहो'ति ॥१२४॥
इत्थं सुदं आयस्मा पिण्डोळभारद्वाजो थेरो गाथायो अभासित्था'ति ।
मक्कटो पञ्चद्वारायं कुटिकायं पसक्किय
द्वारेण अनुपरियेति घट्टयन्तो मुहुं मुहुं ॥१२५॥
तिट्ठ मक्कट मा धावि, न हि ते तं यथा पुरे;
निग्गहीतो 'सि पञ्जाय, नेतो दूरं गमिस्ससीति ॥१२६॥

वल्लियो थेरो

तिण्णं मे ताळपत्तानं गङ्गातीरे कुटी कता,
छवसित्तो व मे पत्तो , पंसुकूलञ्च चीवरं ॥१२७॥
द्वित्रं अन्तरवस्सानं एका वाचा मे भासिता,
ततिये अन्तरवस्सम्हि तमोखन्धो पदालितो'ति ॥१२८॥

गङ्गातीरियो भिक्खु

अपि चे होति तेविज्जो मच्चुहायी अनासवो
अप्पञ्जातो'ति नं वाला अवजानन्ति अजानता ॥१२९॥
यो च खो अन्नपानस्स लाभो होति'ध पुगलो,
पाप धम्मो पि चे होति, सो नेसं होति सक्कतो'ति ॥१३०॥

अजिनो थेरो

यदाहं धम्ममस्सोसिं भासमानस्स सत्थुनो,
न कड्ढमभिजानामि सब्बञ्जु अपराजिते ॥१३१॥
सत्थ वाहे महावीरे सारथीनं वरुत्तमेः
मग्गे पटिप्पदायं वा कड्ढा मय्हं न विज्जतीति ॥१३२॥

मेळजिनो थेरो

यथा अगारं दुच्छन्नं वुट्ठिं समतिविज्जति,
एवं अभावितं चित्तं रागो समतिविज्जति ॥१३३॥
यथा अगारं सुच्छन्नं वुट्ठिं न समतिविज्जति
एवं सुभासितं चित्तं रागो न समतिविज्जति ॥१३४॥

राधो थेरो

खीणा हि मय्हं जाति, वुसितं जिनसासनं
पहीनो जालसंखातो, भवनेत्ति समूहता ॥१३५॥
यस्सत्थाय पब्बजितो अगारस्मा अनगारियं,
सो मे अत्थो अनुप्पतो सब्बसंयोजनक्खयो ॥१३६॥

सुराधो थेरो

सुखं सुपन्ति मुनयो ये इत्थीसु न बज्जरे
सदा वे रक्खितब्बासु यासु सच्चं सुदुल्लभं ॥१३७॥
वधं चारिम्ह ते काम, अनणा दानि ते मयं,
गच्छाम दानि निब्बानं यत्थ गन्त्वा न सोचतीति ॥१३८॥

गोतमो थेरो

पुब्बे हनति अत्तानं पच्छा हनति सो परे;
सुहतं हन्ति अत्तानं वीतं सेनेव पक्खिमा ॥१३९॥
न ब्राह्मणो बहिवण्णो, अन्तो वण्णोहि ब्राह्मणो;
यस्मिं पापानि कम्मनि सवे कण्हो सुजम्पतीति ॥१४०॥

वसभो थेरो

वग्गो पठमो

उद्दानं

उत्तरो चे व पिण्डोलो वल्लियो तीरियो इसि
अजिनो च मेळजिनो राधो सुराधो गोतमो
वसभेन इमे होन्ति दस थेरा महिद्धिका'ति.

वग्गो दुत्तियो

सुस्सूसा सुतवड्ढनी सुतं पञ्ञाय वड्ढनं,
अञ्ञाय अत्थं जानाति, जातो अत्थो सुखावहो ॥१४१॥
सेवेथ पन्तानि सेनासनानि, चरेय्य-
संयोजनविप्पमोक्खं :
सचे रतिं नाधिगच्छेय्य तत्थ संघे-
वसे रक्खितत्तो सतीमा'ति ॥१४२॥

महाचुन्दो थेरो

ये खो ते वेघमिस्सेन नानत्थेन च कम्मना
मनुस्से उपरुन्धन्ति फरुसुपक्कमा जना,
ते पि तथेव कीरन्ति, न हि कम्मं पनस्सति ॥१४३॥
यं करोति नरो कम्मं कल्याणं यदि पापकं,
तस्स तस्सेव दायादो यं यं कम्मं पकुब्बतीति ॥१४४॥

जोतिदासो थेरो

अच्चयन्ति अहोरत्ता, जीवितं उपरुज्झति,
आयु खीयति मच्चानं कुन्तदीनं व वोदकं ॥१४५॥
अथ पापानि कम्मानि करं बालो न बुज्झति
पच्छास्स कटुवं होति, विपाको हिस्स पापको'ति ॥१४६॥

हेरञ्ञकानि थेरो

परित्तं दारुमारुह्य यथा सीदे महण्णवे
एवं कुसीतमागम्म साधुजीवी पि सीदति;
तस्मा तं परिवज्जेय्य कुसीतं हीनवीरियं ॥१४७॥
पविवित्तेहि अरियेहि पहितत्तेहि ज्ञायिहि
निच्चं आरद्धविरियेहि पण्डितेहि सहावसे'ति ॥१४८॥

सोभमित्तो थेरो

जनो जनम्हि सम्बद्धो, जनमेवस्सितो जनो,
जनो जनेन हेठियति, हेठेति च जनो जनं ॥१४९॥
कोहि तस्स जनेनत्थो जनेन जनितेन वा
जनं ओहाय गच्छन्तं हेठयित्वा बहुं जनन्ति ॥१५०॥

सब्बमित्तो थेरो

काली इत्थि ब्रह्मती धङ्ककरूपा सत्थिञ्च भेत्वा
अपरञ्च सत्थिञ्
बाहञ्च भेत्वा अपरञ्च बाहुं सीसञ्च भेत्वा
दधियालकं व एसा निसिन्ना अभिसद्दहित्वा ॥१५१॥
यो वे अविद्धा उपधिं करोति पुनप्पुनं दुक्खमुपेति मन्दो
तस्मा पजानं उपधिं न कयिरा माहुं पुन भिन्नसिरो सयिस्सन्ति ॥१५२॥

महाकालो थेरो

बाहू सपत्ते लभति मुण्डो संघाटिपारुतो
लाभी अन्नस्स पानस्स वत्थस्स सयनस्स च ॥१५३॥
एतमादीनवं जत्वा सक्कारेसु महब्भयं
अप्पलाभो अनवस्सुतो सतो भिक्खु परिब्बजे'ति ॥१५४॥

तिस्सो थेरो

पाचीनवंसदायम्हि सकयपुत्ता सहायका
पहायनप्पके भोगे उञ्छापत्तागते रता ॥१५५॥
आरद्धविरिया पंहितत्ता निच्चं दद्धपरक्कमा
रमन्ति धम्मरतिया हित्वान लोकिक्कं रतिन्ति ॥१५६॥

किम्बिलो थेरो

अयोनिसोमनसीकारा मण्डनं अनुयुञ्जिस्सं
उद्धत्तो चपलो चासिं कामरागेन अट्टितो ॥१५७॥
उपायकुसलेनाहं बुद्धेनादिच्चबन्धुना
योनिसो पटिपज्जित्वा भवे चित्तं उदब्बहन्ति ॥१५८॥

सिरिमा थेरो

[३१]

नन्दो थेरो

परे च नं पसंसन्ति अत्ता चे असमाहितो :
मोघं परे पसंसन्ति, अत्ता हि असमाहितो ॥१५९॥
परे च नं गरहन्ति अत्ता चे सुसमाहितो
मोघं परे गरहन्ति, अत्ता हि सुसमाहितो ॥१६०॥

सिरिमा थेरो

वग्गो दुतियो

उद्दानं

चुन्दो च जातिदासो च थेरो हेरञ्जकानि यो
सोममित्तो सब्बमित्तो काळो तिस्सो च किम्बलो
नन्दो च सिरिमा चे व दस थेरा महिद्धिका'ति

वग्गो ततियो

खन्धा मया परिञ्जाता, तण्हा मे सुसमूहता,
भाविता मम वोज्झङ्गा, पत्तो मे आसवक्खयो ॥१६१॥
सो'हं खन्धे परिञ्जाय अब्बहित्वान जालिनि
भावयित्वान वोज्झङ्गो निब्बायिस्सं अनासवो'ति ॥१६२॥

उत्तरो थेरो

पनादो नाम सो राजा यस्स यूपो सुवण्णयो
तिरियं सोळसपब्बेधो उब्भमाहु सहस्सघा ॥१६३॥
सहस्सकण्डु सतभेण्डु धजालु हरितामयो,
अनच्चुं तत्थ गन्धब्बा छ सहस्सानि सत्तघा'ति ॥१६४॥

भद्दजि थेरो

सतिमा पञ्जवा भिक्खु आरद्धबलवीरियो
पञ्चकप्पसतानाहं एकरत्ति अनुस्सरि ॥१६५॥
चत्तारो सतिपट्टाने सत्त अट्ठ च भावयं
पञ्च कप्पसता नाहं एकरत्ति अनुस्सरिन्ति ॥१६६॥

सोभितो थेरो

यं किच्चं दळ्हविरियेन यं किच्चं बोधुमिच्छता
करिस्सं नावरज्झिस्सं, पस्स विरियपरक्कमं ॥१६७॥
त्वञ्च मे मग्गमक्खाहि अञ्जसं अमतोगधं;
अहं मोनेन मोनिस्सं गङ्गासोतो व सागरन्ति ॥१६८॥

वल्लियो थेरो

केसे मे ओलिखिस्सन्ति कप्पको उपसंक्रमि,
ततो आदासं आदाय सरीरं पञ्चवेक्खिसं ॥१६९॥

तुच्छो कायो अदिसित्थ, अन्धकारे तमो ब्यगा;
सब्बे चोळा समुच्छिन्ना नत्थि दानि पुनब्बभवो'ति ॥१७०॥

वीतसोको थेरो

पञ्चनीवरणे हित्वा योगक्खेमस्स पत्तिया
धम्मादासं गहेत्वान ज्ञाणदस्सजमत्तनो ॥१७१॥
पच्चवेत्तिखं इमं कायं सब्बं सन्तरबाहिरं
अज्झत्तञ्च बहिद्धा च तुच्छो कायो अदिस्सथा'ति ॥१७२॥

पुण्णमासो थेरो

यथापि भद्दो आजञ्जो खलित्वा पतितिट्ठति,
भिय्यो लद्धान संवेगं अदीनो वहते धुरं ॥१७३॥
एवं दस्सनसम्पन्नं सम्मासम्बुद्धसावकं
आजानियं मं धारेथ पुत्तं बुद्धस्स ओरसन्ति ॥१७४॥

नन्दको थेरो

एहि नन्दक गच्छाम उपज्झायस्स सन्तिकं,
सीहनादं नदिस्साम बुद्धसेट्ठस्स सम्मुखा ॥१७५॥
याय नो अनुकम्पाय अम्हे पब्बाजयि मुनि,
सो नो अत्थो अनुप्पत्तो सब्बसंयोजनक्खयो'ति ॥१७६॥

भरतो थेरो

नदन्ति एवं सप्पञ्जा सीहा व गिरिगब्भरे
वीरा विजितसंगामा जेत्वा मारं सवाहनं ॥१७७॥
सत्था च परिचिण्णो मे, धम्मो संघो च पूजितो,
अहञ्च वित्तो सुमनो पुत्तं दिस्वा अनासवन्ति ॥१७८॥

भारद्वाजो थेरो

उपासिता सप्पुरिसा, सुता धम्मा अभिण्हसो,
सुत्वान पटिपज्जिस्सं अञ्जसं अमतोगधं ॥१७९॥
भवरागहतस्स मे सतो भवरागो पुन मे न विञ्जति
न चाहु न च मे भविस्सति न च मे एतरहि पि विञ्जतीति ॥१८०॥

३४]

थेर-गाथा

कण्हदिन्नो थेरो

वग्गो तत्तियो

उद्दानं

उत्तरो भद्दिजे थेरो सोभितो वल्लियो इसि
वीतसोको च सो थेरो पुण्णमासो च नन्दको
भरतो भारद्वाजो च कण्हदिन्नो महामुनीति.

वग्गो चतुत्थो

यतो अहं पव्वजितो सम्मासम्बुद्धसासने,
विमुच्चमानो उग्गच्छि, कामधातुं उपच्चगं ॥१८१॥
ब्रह्मनो पेक्खमानस्स ततो चित्तं विमुच्चि मे,
अकुप्पा मे विमुत्तीति सब्बसंयोजनक्खया 'ति ॥१८२॥

मिगसिरो थेरो

अनिच्चानि गहकानि तत्थ तत्थ पुनप्पुनं,
गहकारं गवेसन्तो दुक्खा जाति पुनप्पुनं ॥१८३॥
गहकारक दिट्ठो'सि पुन गेहं न काहसि;
सब्बा ते फासुका भग्गा थूणीरा च विदालिता;
विपरियादिकतं चित्तं इधेव विधमिस्सतीति ॥१८४॥

सिक्को थेरो

अरहं सुगतो लोके वातेहाबाधितो मुनिः
सचे उण्होदकं अत्थि मुनिनो देहि ब्राह्मण ॥१८५॥
पूजितो पूजनेय्यानं सक्करेय्यानं सक्कतो
अपचितो अपचिनेय्यानं तस्स इच्छामि हातवे'ति ॥१८६॥

उपवानो थेरो

दिट्ठा मया धम्मधरा उपासका कामा
अनिच्चा इति भासमाना
सारत्तरत्ता मणिकुण्डलेसु पुत्तेसु दारेसु
च ते अपेक्खा ॥१८७॥
अद्धा न जानन्ति यथा व धम्मं, कामा अनिच्चा इति
चापि आहु, रागञ्च तेसं न बलत्थि छेतुं तस्मा
सिता पुत्तदारं धनञ्चा'ति ॥१८८॥

इसिदिन्नो थेरो

देवो च वस्सति देवो च गळगळायति एक्को चाहं
 भेरवे बिले विहरामिः
 तस्स मय्हं एककस्स भेरवे बिले विहरतो
 नत्थि भयं वा छम्भितत्तं वा लोमहंसो वा ॥१८९॥
 धम्मता ममेसा यस्स मे एककस्स भेरवे बिले विहरतो
 नत्थि भयं वा छम्भितत्तं वा लोमहंसोवा'ति ॥१९०॥

सम्बुलकच्चानो थेरो

कस्स सेलूपमं चित्तं ठितं नानुपकम्पति
 विरत्तं रजनीयेसु कुप्पनीये न कुप्पति
 यस्सेवं भावितं चित्तं कुतो तं दुक्खमेस्सति ॥१९१॥
 मम सेलूपमं चित्तं ठितं नानुपकम्पति
 विरत्तं रजनीयेसु कुप्पनीये न कुप्पति
 ममेवं भावितं चित्तं, कुतो मं दुक्ख मेस्सतीति ॥१९२॥

खित्तो थेरो

न ताव सुपितुं होति रत्ति नक्खत्तमालिनी,
 पटिजग्गितुमेवेसा रत्ति होति विजानता ॥१९३॥
 हत्थिक्खन्धावपतितं कुञ्जरो चे अनुक्कमे
 संगामे मे मतं सेय्यो यञ्चे जीवे पराजितो'ति ॥१९४॥

सोणो पोटिरियपुत्तो

पञ्च कामगुणे हित्वा पियरूपे मनोरमे
 सद्दाय अभिनिक्खम्म दुक्खस्सन्तकरो भवे ॥१९५॥
 नाभि नन्दामि मरणं नाभि नन्दामि जीवितं
 कालञ्च पटिकड्ढ्खामि सम्पजानो पत्तिस्सतो'ति ॥१९६॥

निसभो थेरो

अम्बपल्लवसंकासं अंसे कत्वान चीवरं
 निसिन्नो हत्थिगीवायं गामं पिण्डाय पाविसिं ॥१९७॥
 हत्थिक्खन्धतो ओरुय्ह संवेगं अलभिन्तदा
 सोहं दित्तो तदा सन्तो, पत्तो मे आसवक्खयो'ति ॥१९८॥

कप्पट कुटो थेरो

[३७]

उसभो थेरो

अयं इति कप्पये कप्पटकुरो, अच्छाय अतिभरिताय
अमतघटिकायं चम्मकतमतो,
कतपदं ज्ञानानि ओचेतुं ॥१९९॥
मा खो त्वं कप्पट पचालेसि मातं
उपकण्णकम्हि तालेस्सं;
न ह त्वं कप्पट मत्तमञ्जासि संघमज्झम्हि
पचलायमानो'ति ॥२००॥

कप्पट कुटो थेरो

वग्गो चतुत्थो, उद्दानं

मिगसिरो सिवको व उपवानो च पण्डितो
इसि दिन्नो च कच्चानो खितको च महावसी
पोटिरियपुत्तो निसभो उसभो कप्पट कुरो'ति

वग्गो पञ्चमो

अहो बुद्धा अहो धम्मा अहो नो सत्थुसम्पदा
यत्थ एतादिसं धम्मं सावको सच्छिकाहिति ॥२०१॥
असंखेय्येसु कप्पेसु सक्कायाधिगता अहुं,
तेसं अयं पच्छिमको, चरिमो, यं समुस्सयो
जातिमरणसंसारो, नत्थि दानि पुनब्भवो'ति ॥२०२॥

कुमारकस्सपो थेरो

यो हवे दहदो भिक्खु युञ्जति बुद्धसासने,
जागरो पति सुत्तेसु, अमोघन्तस्स जीवितं ॥२०३॥
तस्मा सद्धञ्च सीलञ्च पसादं धम्मदस्सनं
अनुयुञ्जेथ मेधावी सरं बुद्धान सासनन्ति ॥२०४॥

धम्मपालो थेरो

कस्सिन्द्रियानि समथं गतानि अस्सा
यथा सारथिना सुदन्ता
पहीनमानस्स अनासवस्स देवापि
तस्स पिहयन्ति तादिनो ॥२०५॥
मय्हिन्द्रियानि समथं गतानि अस्सा यथा सारथिना सुदन्ता
पहीतमानस्स अनासवस्स देवापि मय्हं पियहन्ति तादिनो'ति ॥२०६॥

ब्रह्मालि थेरो

छविपापक चित्तभट्ठक मोघराज तसतं समाहितो,
हेमन्तिकसीतकालरत्तियो, भिक्खु त्वं 'सि कथं करिस्ससि ॥२०७॥
सम्पन्नसस्सा मगधा केवला इति मे सुतं;
पलालच्छन्नको सेय्यं यथञ्जो सुखजीविनो 'ति ॥२०८॥

मोघराजा थेरो

न उक्खिपे नो च परिक्खिपे परे, न ओक्खिपे पारगतं न एरए,
न चत्तवण्णं परिसासु व्याहरे अनुद्धतो सम्मितभाणि सुब्बतो ॥२०९॥
सुसुखुमनिपुणत्थदस्सिना मति कुसलेन निवात वुत्तिना
संसेवितबुद्धसीलिना निब्बानं नहि तेन दुल्लभन्ति ॥२१०॥

विसाखोपञ्चालिपुत्तो थेरो

नदन्ति मोरा सुसिखा सुपेखुणा मुनीलगीवा सुमुखा सुगज्जिनो,
सुसद्दला चापि महा मही अयं सुव्यापितम्बु, सुवलाहकं नभं ॥२११॥
सुकल्लरूपो सुमनस्स ज्ञायितं सुनिक्खमो साधु सुबुद्धसासने;
सुसुक्कसुक्कं निपुणं सुदुद्दसं फुसाहितं उत्तममच्चुतं पदन्ति ॥२१२॥

चूलको थेरो

नन्दमानागतं चित्तं सूलमारोपमानकं,
तेन तेनेव वजसि येन सूलं कलिङ्गरं ॥२१३॥
ताहं चित्तकलिं ब्रूमि तं ब्रूमि चित्तदुब्भकं;
सत्था ते दुल्लभो लद्धो; मानत्थे मं नियोजयीति ॥२१४॥

अनूपमो थेरो

संसरं दीघमद्धानं गतीसु परिवत्तिसं
अपस्सं अरियसच्चानि अन्धभूतो पुथुज्जनो ॥२१५॥
तस्स मे अप्पमत्तस्स संसारा विनलीकता,
सब्बा गती समुच्छिन्ना, नत्थि दानि पुनब्भवो 'ति ॥२१६॥

वज्जितो थेरो

अस्सत्थे हरितोभासे संविरूळह्मि पादपे
एकं बुद्धगतं सज्जं अलभित्थं पतिस्सतो ॥२१७॥
एकतिंसे इतो कप्पे यं सज्जं अलभित्तदा,
तस्सा सज्जाय वाहसा पत्तो मे आसवक्खयो 'ति ॥२१८॥

सन्धितो थेरो

पञ्चमो वग्गो

उद्दानं

कुमारकस्सपो थेरो धम्मपालो च ब्रह्मालि
 मोघराजा विसाखो च चूळको च अनूपमो
 वज्जितो संधितो थेरो किलेसरजवाहनो 'ति
 गाथा दुकनिपातम्हि नवुति चेव अट्ठ च
 थेरा एकूनपञ्जासं भासिता नयकोविदा ।

दुकनिपातो

तिकनिपातो

अयोनिमुद्धि अन्वेसं अंगिं परिचरिं वने,
मुद्धिमग्गमजानन्तो अकासिं अमरं तपं ॥२१९॥

तं सुखेन सुखं लद्धं, पस्स धम्ममुधम्मतं;
तिस्सो विज्जा अनुप्पत्ता, कतं बुद्धस्स सासनं ॥२२०॥

ब्रह्मबन्धु पुरे आसिं, इदानी खो'म्हि ब्राह्मणो,
तेविज्जो न्हातको चम्हि सोत्तियो चम्हि वेदगु 'ति ॥२२१॥

अङ्गणिक भारद्वाज थेरो

पञ्चाहाहं पब्बजितो सेखो अप्पत्तमानसो
विहारं मे पविट्ठस्स चेतसो पणिधी अहु ॥२२२॥

नासिस्सं न पविस्सामि विहारतो न निक्खमे
न पि पस्सं निपातेस्सं तण्हासल्ले अनूहते ॥२२३॥

तस्स मेवं विहरतो पस्स विरियपरक्कमं,
तिस्सो विज्जा अनुप्पत्ता, कतं बुद्धस्स सासनन्ति ॥२२४॥

पच्चमो थेरो

यो पुब्बे करणीयानि पच्छा सो कातुमिच्छति,
सुखा सो धंसते ठाना पच्छा च मनुतप्पति ॥२२५॥

यज्झि कयिरा तज्झि वदे, यं न कयिरा न तं वदे,
अकरोन्तं भासमानं परिजानन्ति पण्डिता ॥२२६॥

सुसुखं वत निब्बानं सम्मासम्बुद्धदेसितं
असोकं विरजं खेमं यत्थ दुक्खं निरुज्झतीति ॥२२७॥

वाकुल थेरो

सुखञ्चे जीवितुं इच्छे सामञ्जास्मि अपेक्खवा,
 संधिकं नातिमञ्जेय्य चीवरं पानभोजनं ॥२२८॥
 सुखञ्चे जीवितुं इच्छे सामञ्जास्मि अपेक्खवा,
 अहिमुसिकसोब्भं व सेवेथ सयनासनं ॥२२९॥
 सुखञ्चे जीवितुं इच्छे सामञ्जास्मि अपेक्खवा
 इतरीतरेन तुस्सेय्य एकधम्मञ्च भावये 'ति ॥२३०॥

धनियो थेरो

अतिसीतं अत्युण्हं अतिसायं इदं अहू,
 इति विस्सट्ठकम्मन्ते खणा अच्चेन्ति माणवे ॥२३१॥
 यो च सीतञ्च उण्हञ्च तिणा भिय्यो न मञ्जाति
 करं पुरिसकिच्चानि, सो सुखा न विहायति ॥२३२॥
 दब्बं कुसं पोटकिलं उसीरं मुञ्जपब्बजं
 उरसा पनुदहिस्सामि विवेकमनुब्रूहयन्ति ॥२३३॥

मातङ्गपुत्तो थेरो

ये चित्तकथी बहुस्सुता समणा पाटलिपुत्तवासिनो
 तेसञ्जतरो यमायुवा द्वारे तिट्ठति खुज्जसोलुभितो ॥२३४॥
 ये चित्तकथी बहुस्सुता समणा पाटलिपुत्तवासिनो
 तेसञ्जतरो यमायुवा द्वारे तिट्ठति मालुतेरितो ॥२३५॥
 सुयुद्धेन सुयिट्ठेन संगामविजयेन च
 ब्रह्मचरियानुचिण्णेन एवायं सुखमेधति ॥२३६॥

खुज्जसोभितो थेरो

यो 'ध कोचि मनुस्सेसु परपाणातिहिंसति
 अस्मा लोका परम्हा च उभया धंसते नरो ॥२३७॥
 यो च मेत्तेन चित्तेन सब्बपाणानुकप्पति,
 बह्वं हि सो पसवति पुञ्जं तादिसको नरो ॥२३८॥
 सुभासितस्स सिक्खेथ समणुपासजस्स च,
 एकासनस्स च रहो चित्तवूपसमस्स चा 'ति ॥२३९॥

वारणो थेरो

एको पि सद्धो मेधावी अस्सद्धानिध जातिनं
 धम्मट्ठो सीलसम्पन्नो होति अत्थाय बन्धुनं ॥२४०॥
 निग्गय्ह अनुकम्पाय चोदिता जातयो मया
 जातिबन्धवपेमेन कारं कत्वान भिक्खुसु ॥२४१॥
 ते अब्भतीता कालकता पत्ता ते तिदिवं सुखं,
 भातरो मय्हं माता च मोदन्ति कामकामिनो 'ति ॥२४२॥

पस्सिकत्थेरो

काला पब्बङ्गसंकासो किसो धमनिसंततो
 मत्तञ्जु अन्नपानमिह अदीनमनसो नरो ॥२४३॥
 फुट्ठो डंसेहि मकसेहि अरञ्जास्मि ब्रहावने
 नागो संगामसीसे व सतो तत्राधिवासये ॥२४४॥
 यथा ब्रह्मा तथा एको, यथा देवो तथा दुवे,
 यथा गामो तथा तयो, कोलाहलं तनुत्तरिन्ति ॥२४५॥

यसोजत्थेरो

अहु तुय्ह पुरे सद्धा, सा ते अज्ज न विज्जति ।
 यं तुय्हं तुय्हं एवेतं; नत्थि दुच्चरितं मम ॥२४६॥
 अन्निच्चा हि चला सद्धा एवं दिट्ठा हि सा मया;
 रज्जन्ति पि विरज्जन्ति तत्थ किं जिय्यते मुनि ॥२४७॥
 पच्चति मुनिनो भत्तं थोकं थोकं कुले कुले;
 पिण्डिकाय चरिस्सामि, अत्थि जङ्घबलं ममा'ति ॥२४८॥

साटिमत्तियत्थेरो

सद्धाय अभिनिक्खम्म नव पब्बजितो नवो
 मित्ते भजेय्य कल्याणे सुद्धाजीवे अतन्दिते ॥२४९॥
 सद्धाय अभिनिक्खम्म नवपब्बजितो नवो
 संघस्मि विहरं भिक्खु सिक्खेथ विनयं बूधो ॥२५०॥
 सद्धाय अभिनिक्खम्म नवपब्बजितो नवो
 कप्पा कप्पेसु कुसलो चरेय्य अपुरक्खतो ॥२५१॥

उपालि थेरो

पण्डितं वत मं सन्तं अलमत्थ विचिन्तकं
 पञ्चकामगुणा लोके सम्मोहा पातयिषु मं ॥२५२॥
 पक्खन्नो मारविसये दळ्हस्ल्लसमप्पितो
 असंखि मच्चुराजस्स अहं पासा पमुच्चितुं ॥२५३॥
 सब्बे कामा पहीना मे, भवा सब्बे पदालिता
 विक्खीणो जाति संसारो नत्थि दानि पुनब्भवो 'ति ॥२५४॥

उत्तरपालो थेरो

सुणाथ जातयो सब्बे यावन्तेत्थ समागता,
 धम्मं वो देसयिस्सामि; दुक्खा जाति पुनप्पुनं ॥२५५॥
 आरभथ निक्खमथ युञ्जथ बुद्धसासने
 धुनाथ मच्चुनो सेनं नळागारं व कुञ्जरो ॥२५६॥
 यो इमस्मिं धम्मविनये अप्पमत्तो विहेस्सति,
 पहाय जातिससारं दुक्खस्सन्तं करिस्सतीति ॥२५७॥

अभिभूतथेरो

संसरं हि निरयं अगच्छिसं, पेतलोकमगमं पुनप्पुनं,
 दुक्खममम्हि पि तिरच्छानयोनिया नेकधा हि वुसितं चिरं मया ॥२५८॥
 मानुसो पि च भवो 'भिराधितो, सग्गकायमगमं सकिं सकिं,
 रूपधातुसु अरूपधातुसु नेवसज्जिअसु असज्जिअसु द्वितं ॥२५९॥
 सम्भवा सुविदिता असारका संखता पचलिता सदेरिता,
 तं विदित्वा महमत्तसम्भवं सन्तिमेव,
 सतिमा समज्झगन्ति ॥२६०॥

गोतमो थेरो

यो पुब्बे करणीयानि... (२६१-२६३=२२५-२२७) ॥२६१-२६३॥

हारितो थेरो

पापमित्ते विवज्जेत्वा भजेय्युत्तमपुग्गले
 ओवादे चस्स तिट्ठेय्य पत्थेन्तो अचलं सुखं ॥२६४॥
 परित्तं दारुम... (२६५, २६६=१४७, १४८) ॥२६५-२६६॥

विमलो थेरो

[४५]

विमलो थेरो

उद्दानं

अङ्गणिको भारद्वाजो पञ्चयो बाकुलो इसि
धनियो मातङ्गपुत्तो सोभितो वारणो इसि
पस्सिको च यसोजो च साटिमत्तिथुपालि च
उत्तरपालो अभिभूतो गोतमो हारितो पि च
थेरो निकपातम्हि निब्बाने विमलो कतो;
अट्ठतालीस गाथायो थेरा सोळस कित्तिता 'ति ॥

तिकनिपातो निट्ठितो

चतुक्कनिपातो

अलंकता सुवसना मालिनी चन्दनुस्सदा
मज्झे महापथे नारी तुरिये नच्चति नट्टकी ॥२६७॥
पिण्डिकाय पविट्ठो 'हं गच्छन्तो नं उदिक्खिसं
अलंकतं सुवसनं मच्चुपासं व ओड्डितं ॥२६८॥
ततो मे मनसीकारो योनिसो उदपज्जथा
आदीनवो पातुरहू, निब्बिदा समतिट्ठत, ॥२६९॥
ततो चित्तं विमुच्चि मे, पस्स धम्मसुधम्मतं ।
तिस्सो विज्जा अनुप्पत्ता, कतं बुद्धस्स सासनन्ति ॥२७०॥

नागसमाल थेरो

अहं मिद्वेन पकतो विहारा उतनिक्खमिं;
चङ्कमं अभिरूहन्तो तथेव पपतिं छमा ॥२७१॥
गत्तानि परिमज्जित्वा पुन पारुय्ह चङ्कमं
चङ्कमे चङ्कमिं सो 'हं अज्झत्तं सुसमाहितो ॥२७२॥
ततो मे (२७३, २७४ = २६९, २७०) ॥२७३-२७४॥

भगुथेरो

परे च न विजानन्ति मयमेत्थ यमामसे;
ये च तत्थ विजानन्ति ततो सम्मन्ति मेधगा ॥२७५॥
यदा च अविजानन्ता इरियन्त्यमरा विया,
विजानन्ति च ये धम्मं आतुरेसु अनातुरा ॥२७६॥
यं किञ्चि सिथिलं कम्मं संकिलिद्वञ्च यं वतं
संकस्सरं ब्रह्मचरियं, न तं होति महप्फलं ॥२७७॥
यस्स सब्रह्मचारीसु गारवो नूपलब्भति,
आरका होति सद्धम्मा नभं पुथविया यथा 'ति ॥२७८॥

सभियो थेरो

धिरत्थु पूरे दुग्गन्धे मारपक्खे अवस्सुते;
 नव सोतानि ते काये यानि सन्दन्ति सब्बदा ॥२७९॥
 मा पुराणममज्झित्थो मासादेसि तथागते;
 सग्गे पि ते न रज्जन्ति किमड्ढा पन भानुसे ॥२८०॥
 ये च खो बाला दुम्मेधा दुम्मन्ती मोहपास्ता
 तादिसा तत्थ रज्जन्ति मारखित्तस्मि बन्धने ॥२८१॥
 येसं रागो च दोसो च अविज्जा च विराजिता
 तादी तत्थ न रज्जन्ति छिन्नसुत्ता अबन्धना 'ति ॥२८२॥

नन्दको थेरो

पञ्चपञ्चास वस्सानि रजोजल्लमधारयि,
 भुज्जन्तो मासिकं भत्तं केसमस्सुं अलोचयि ॥२८३॥
 एकपादेन अट्ठासिं आसनं परिवज्जयि,
 सुक्खगूथानि च खादिं उद्देसञ्च न सादियि ॥२८४॥
 एतादिसं करित्वान बहं दुग्गतिगामिनं
 बुद्ध्यमानो महोधेन बुद्धं सरणमागमं ॥२८५॥
 सरण गमनं पस्स, पस्स धम्मसुधम्मतं
 तिस्सो विज्जा अनुप्पत्ता कतं बुद्धस्स सासनन्ति ॥२८६॥

जम्बुको थेरो

स्वागतं वत्त मे आसि गयायं गयफग्गुया
 यं अद्दसासि सम्बुद्धं देसेन्तं धम्ममुत्तमं ॥२८७॥
 महप्पभं गणाचरियं अग्गपत्तं विनायकं
 सदेवकस्स लोकस्स जिनं अतुलदस्सनं ॥२८८॥
 महानागं महावीरं महाजुतिमनासवं
 सब्वासवपरिक्खीणं सत्थारमकुतोभयं ॥२८९॥
 चिरसङ्गकिलिट्ठं वत्त दिट्ठिसन्दानसन्दितं
 विमोचयी सो भगवा सब्बगन्थेहि सेनकन्ति ॥२९०॥

सेनको थेरो

यो दन्धकाले तरति तरणीये च दन्धये,
 अयोनिसो संविधानेन बालो दुक्खं निगच्छति ॥२९१॥

तस्सत्था परिहायन्ति कालपक्खे व चन्दिमा,
 आयसक्यञ्च पप्पोति मित्ते हि च विरुज्झतीति ॥२९२॥
 यो दन्धकाले दन्धेति तरणीये च तारये,
 योनिसो संविधानेन सुखं पप्पोति पण्डितो ॥२९३॥
 तस्सत्था परिपूरन्ति सुक्कपक्खे व चन्दिमा,
 यसो कितिञ्च पप्पोति, मित्तेहि न विरुज्झतीति ॥२९४॥

सम्भूतो थेरो

उभयेनेव सम्पन्नो राहुलभट्टो 'ति मं विदु,
 यञ्चमिह पुत्तो बुद्धस्स, यञ्च धम्मेषु चक्खुमा ॥२९५॥
 यञ्च मे आसवा खीणा, यञ्च नत्थि पुनब्भवो ।
 अरहा दक्खिण्यो 'मिह तेविज्जो अमतद्दसो ॥२९६॥
 कामन्धा जालसञ्छन्ना तण्हाछदनच्छादिता
 पमत्तबन्धुना बद्धा मच्छा व कुमिना मुखे ॥२९७॥
 तं काममहमुज्झित्वा छेत्वा मारस्स बन्धनं
 समूलं तण्हमब्बूय्ह सीतिभूतो 'स्मि निब्भुतो 'ति ॥२९८॥

राहुलो थेरो

जातरूपेन पच्छन्ना दासी गणपुरक्खता
 अङ्केन पुत्तमादाय भरिया मं उपागमि ॥२९९॥
 तञ्च दिस्वान आयन्ति सकपुत्तस्स मातरं,
 अलङ्कतं सवुसनं मच्चुपासं व ओड्डितं ॥३००॥
 ततो मे-... (३०१, ३०२=२६९, २७०) ॥३०१-३०२॥

चन्दनो थेरो

धम्मो हवे रक्खति धम्मचारिं, धम्मो सुचिण्णो सुखमावहाति
 एसा निसंसो धम्मे सुचिण्णे, न दुग्गतिं गच्छति धम्मचारी ॥३०३॥
 न हि धम्मो अधम्मो च उभो समविपाकिनो;
 अधम्मो निरयं नेति, धम्मो पापेति सुग्गतिं ॥३०४॥
 तस्मा हि धम्मेषु करेय्य छन्दं इति मोदमानो सुगतेन तादिना;
 धम्मे ठिता सुगतवरस्स सावका निय्यन्ति धीरा सरणवरग्गगामिनो ॥३०५॥

विष्फोटितो गण्डमूलो, तण्हाजालो समूहतो;
सो खीणसंसारो न चत्थि किञ्चनं चन्दो
यथा दोसिना पुण्णमासिया 'ति ॥३०६॥

धम्मिको थेरो

यदा बलाका सुचिपण्डरच्छदा काळस्स मेघस्स भयेन तज्जिता
पलेहिति आलयमालयेसिनी, तदा नदी अजकरणी रमेति मं ॥३०७॥
यदा बलाका सुविसुद्धपण्डरा काळस्स मेघस्स भयेन तज्जिता
परियेसतिलेन मलेन, दस्सिनी, तदा नदी अजकरणी रमेति मं ॥३०८॥
कन्हु तत्थ न रमेन्ति जम्बुयो उभतो तहिं,
सोभेन्ति आपगा कूलं महालेनस्स पच्छतो ॥३०९॥
तामतमदसं घसुप्पहीना भेका मन्दवती पनादयन्ति,
नाज्ज गिरि नदीहि विप्पवाससमयो,
खेमा अजकरणी सिवा सुरम्मा 'ति ॥३१०॥

सप्पको थेरो

पब्बजिं जीविकत्थो 'हं, लद्धान उपसम्पदं
ततो सद्धं पटिलभिं, दळ्हविरियो परक्कमिं ॥३११॥
कामं भिज्जतु 'यं कायो मंसपेसी विसीयरुं,
उभोजन्नुकसंधीहि जङ्घायो पपतन्तु मे ॥३१२॥
नासिस्सं न पविस्साभि विहारा च न निक्खमे
न पि पस्सं निपातेस्सं तण्हासल्ले अनूहते ॥३१३॥
तस्स मेवं... (=२२४) ॥३१४॥

मुदितो थेरो

उद्दानं

नागसमालो भगु च सभियो नन्दको पि च
जम्बुको सेनको थेरो सम्भूतो राहुलो पि च
भवति चन्दनो थेरो दसेते बुद्ध सावका ।
धम्मिको सप्पको थेरो मुदितो चापि ते तयो
गाथायो द्वे च पञ्जास थेरा सब्बे पि तेरसा 'ति ।

चतुक्कनिपातो निट्ठितो

पञ्चनिपातो

भिक्षु सीवथिकं गत्वा अहमं इत्थिमुज्झितं
अपविद्धं सुसानस्मि खज्जन्तिं किमिही फुटं ॥३१५॥
यं हि एके जिगुच्छन्ति मतं दिस्वान पापकं,
कामरागो पातुरहू अन्धो व सवती अहुं ॥३१६॥
ओरं ओदनपाकम्हा तम्हा ठाना अपक्कमिं;
सतिमा सम्पजानो 'हं एकमन्तं उपाविसि ॥३१७॥
ततो मे (३१८, ३१९ = २६९, २७०) ॥३१८-३१९॥

राजदत्तो थेरो

अयोगे युज्जमत्तानं पुरिसो किच्चमिच्छतो
चरं चे नाधिगच्छेय्य, तं मे दुब्भगलक्खणं ॥३२०॥
अब्बूळ्हं अगतं विजितं एकञ्चे ओस्सजेय्य कली व सिया;
सब्बानि पि चे ओस्सज्जेय्य अन्धो व सिया
समविसमस्स अदस्सनतो ॥३२१॥

यज्झि कयिरा . . . (= २२६) ॥३२२॥
यथापि रुचिरं पुप्फं वण्णवन्तं अगन्धकं,
एवं सुभासिता वाचा अपूला होति अकुब्बतो ॥३२३॥
यथापि रुचिरं पुप्फं वण्णवन्तं सगन्धकं
एवं सुभासिता वाचा स-फला होति सकुब्बतो 'ति ॥३२४॥

सुभूतो थेरो

वस्सति देवो यथा सुगीतं, छन्ना मे कुटिका सुखा निवाता
तस्सं विहरामि वूपसन्तो, अथ चे पत्थयसि पवस्स देव ॥३२५॥
वस्सति देवो यथा सुगीतं छन्ना मे कुटिका सुखा निवाता,
तस्सं विहरामि सन्तचित्तो—प—तस्सं विहरामि

वीतरागो...वीत दोसो...वीत मोहो अथ चे

पत्थयसि पवस्स देवा 'ति ॥३२६-३२९॥

गिरिमानन्दो थेरो

यं पत्थयानो धम्मेसु उपज्झायो अनुग्गहि

अमतं अभिकङ्खन्तं कतं कत्तब्बकं मया ॥३३०॥

अनुप्पत्तो सच्छिकतो सयं धम्मो अनीतिहो;

विसुद्धञ्चाणो निक्कङ्खो व्याकरोमि तवन्तिके ॥३३१॥

पुब्बेनिवासं जानामि दिब्बचक्खुं विसोधितं,

सदत्थो मे अनुप्पत्तो कतं बुद्धस्स सासनं ॥३३२॥

अप्पमत्तस्स मे मिक्खा सुसुता तव सासने,

सब्बे मे आसवा खीणा नत्थि दानि पुनब्भवो ॥३३३॥

अनुसासि मं अरियवता अनुकम्पी अनुग्गहि;

अमोघो तुय्हं ओवादो, अन्ते वासि 'म्हि सिक्खितो 'ति ॥३३४॥

सुमनो थेरो

साधु हि किर मे माता पतोदं उपदंसयि

यस्साहं वचनं सुत्वा अनुसिट्ठो जनेत्तिया

आरद्धविरियो पहितत्तो पत्तो सम्बोधिमुत्तमं ॥३३५॥

अरहा दक्खिण्यो 'म्हि तेविज्जो अमतद्दसो

जित्वा नमुचिनो सेनं विहरामि अनासवो ॥३३६॥

अज्झत्तञ्च वहिद्धा च ये मे विज्जिस्सु आसवा

सब्बे असेसा उच्छिन्ना न च उप्पज्जरे पुन ॥३३७॥

विसारदा खो भगिनी एतं अत्थं अभासयि:

अपि हा नून मयि पि वनथो ते न विज्जति ॥३३८॥

परियन्तकतं दुक्खं, अन्तिमो यं समुस्सयो

जातिमरणसंसारो नत्थि दानि पुनब्भवो 'ति ॥३३९॥

वड्डो थेरो

अत्थाय वत मे बुद्धो नदि नेरज्जनं अगा,

यस्साहं धम्मं सुत्वान मिच्छादिट्ठि विवज्जयि ॥३४०॥

यजिं उच्चावचे यज्जो, अग्निहुत्तं जुहिं अहं
 एसा सुद्धीति मज्जन्तो अन्धभूतो पुथुज्जनो ॥३४१॥
 दिट्ठि गहणपक्खन्नो परामामेन मोहितो
 अमुद्धि मज्जिासं सुद्धि अन्धभूतो अविद्दसु ॥३४२॥
 मिच्छादिट्ठि पहीना मे, भवा सब्बे विदालिता
 जुहामि दक्खिण्यय्यग्निं नमस्सामि तथागतं ॥३४३॥
 मोहा सब्बे पहीना मे भवतण्हा पदालिता
 विक्खीणो जातिसंसारो नत्थि दाणि पुनब्भवो 'ति ॥३४४॥

नदिकस्सपो थेरो

पातो मज्जन्तिकं सायं तिक्खत्तुं दिवसस्सहं
 ओतरि उदकं सोतं गयाय गयफग्गुया ॥३४५॥
 यं मया पकतं पापं पुब्बे अज्जासु जातिसु
 तन्दानीध पवाहेमि एवंदिट्ठि पुरे अहं ॥३४६॥
 सुत्वा सुभासितं वाचं धम्मत्थसहितं पदं
 तथं यथावकं अत्थं योनिसो पच्चवेक्खिसं ॥३४७॥
 निन्हातसब्बपापो 'मिह निम्मलो पयतो सुचि
 सुद्धो सुद्धस्स दायादो पुत्तो बुद्धस्स ओरसो ॥३४८॥
 ओगय्हट्ठङ्गिकं सोतं सब्बपापं पवाहयिं,
 तिस्सो विज्जा अज्जगमिं, कतं बुद्धस्स सासननि ॥३४९॥

गयाकस्सपो थेरो

वातरोगाभिनीतो त्वं विहरं कानने वने
 पविद्धगोचरे लूखे कथं भिक्खु करिस्ससि ॥३५०॥
 पीतिसुखेन विपुलेन फरमानो समुस्सयं
 लूखम्पि अभिसम्भोन्तो विहरिस्सामि कानने ॥३५१॥
 भावेन्तो सतिपट्ठाने इन्दियानि बलानि च
 बोज्झङ्गानि च भावेन्तो विहरिस्सामि कानने ॥३५२॥
 आरद्धविरिये पहितत्ते निच्चं दळहपरक्कमे
 समग्गे सहिते दिस्वा विहरिस्सामि कानने ॥३५३॥
 अनुस्सरन्तो सम्बुद्धं अग्गदन्तं समाहितं
 अतन्दितो रत्तिदिवं विहरिस्सामि कानने 'ति ॥३५४॥

वक्कली थेरो

ओलग्गेसामि ते चित्त आणिद्वारे व हत्थिनं,
 न तं पापे नियोजिस्सं कामजाल सरीरज ॥३५५॥
 त्वं ओलग्गो न गच्छिसि द्वारविवरं गजो व अलभन्तो,
 न च चित्तकलि पुनप्पुनं पसहम्पापरतो चरिस्ससि ॥३५६॥
 यथा कुञ्जरं अदन्तं नवग्गहमडकुसग्गहो
 बलवा आवत्तेति अकामं, एवं आवत्तयिस्सन्तं ॥३५७॥
 यथा वरह्यदमकुसलो सारथि पवरो दमेति आजञ्जं,
 एवं दमयिस्सन्तं पतिट्ठितो पञ्चसु बलेसु ॥३५८॥
 सतिया तं निबन्धिस्सं, पयतत्तो वो दमेस्सामि;
 विरियधुरनिग्गहीतो न यितो दूरं गमिस्ससे चित्ता 'ति ॥३५९॥

विजितसेनो थेरो

उपारम्भचित्तो दुम्मेधो सुणाति जिनसासनं;
 आरका होति सद्धम्मा नभसो पथवी यथा ॥३६०॥
 उपारम्भ चित्तो दुम्मेधो सुणाति जिनसासनं ।
 परिहायति सद्धमा काळपक्खे व चन्दिमा ॥३६१॥
 उपारम्भ चित्तो दुम्मेधो सुणाति जिनसासनं
 परिमुस्सति सद्धमे मच्छो अप्पोदके यथा ॥३६२॥
 उपारम्भचित्तो दुम्मेधो सुणाति जिनसासनं
 न विरूहति सद्धा मे खेत्ते बीजं व पूतिकं ॥३६३॥
 यो च तुट्ठेन चित्तेन सुणाति जिनसासनं
 खेपेत्वा आसवे सब्बे सच्छिकत्वा अकुप्पतं,
 पप्पुय्य पदमं सन्ति परिनिब्बाति अनासवो 'ति ॥३६४॥

यसदत्तो थेरो

उपसम्पदा च मे लद्धा, विमुत्तो चम्हि अनासवो
 सो च मे भगवा दिट्ठो, विहारे च सहावसि ॥३६५॥
 बहुदेव रत्तिं भगवा अब्भोकासे 'तिनामयि
 विहारकुसलो सत्था विहारं पाविसी तदा ॥३६६॥
 सन्थरित्वानं संघाटिं सेय्यं कप्पेसि गोतमो
 सीहो सेलगुहायं व पहीनभयभेरवो ॥३६७॥

ततो कल्याणवाक्करणो सम्मासम्बुद्धसावको
 सोणो अभासि सद्धम्मं बुद्धसेट्ठस्स सम्मुत्ता ॥३६८॥
 पञ्चक्खन्धे परिञ्जाय भावयित्वान अञ्जसं
 पप्पुय्य परमं सन्ति परिनिब्बस्सत्यनासवो 'ति ॥३६९॥

सोणो कुटिकरणो थेरो

यो वे गरूनं वचनञ्जु धीरो वसे च तम्हि जनयेथ पेमं,
 सो भत्तिमा नाम च होति पण्डितो
 'जत्वा च धम्मेसु विसेसि अस्स ॥३७०॥
 यं आपदा अप्पतिता उळारा नक्खम्भयन्ते पटिसंखयन्तं
 सो थामवा नाम च होति पण्डितो जत्वा च धम्मेसु विसेसि अस्स ॥३७१॥
 यो वे समुद्दो व ठितो अनेजो गम्भीरपञ्जो निपुणत्थदस्सी,
 असंहारियो नाम च होति ॥३७२॥
 बहुस्सुतो धम्मधरो च होति, धम्मस्स होति अनुधम्मचारी,
 सो तादिसो नाम च होति ... ॥३७३॥
 अत्थञ्च यो जानाति भासितस्स अत्थञ्च जत्वा न तथा करोति,
 अत्थन्तरो नाम स होति पण्डितो जत्वा च धम्मेसु
 विसेसि अस्सा 'ति ॥३७४॥

कोसियो थेरो

उद्दानं

राजदत्तो सुभूतो च गिरिमानन्द-सुमनो
 वड्ढो च कस्सपो थेरो गयाकस्सप वक्कलि
 विजितो यसदत्तो च सोणो कोसि यस न्हयोः
 सट्ठि च पञ्च गाथायो थेरा च एत्थ द्वादसा 'ति

पञ्चनिपातो

छनिपातो

दिस्वान पाटिहीरानि गोतमस्स यसस्सिनो
न तावाहं पणिपतिं इस्सामानेन वञ्चितो ॥३७५॥
मम संकप्पमञ्जाय चोदेसि नरसारथि,
ततो मे आसि संवेगो अब्भुतो लोमहंसनो ॥३७६॥
पुब्बे जटिल भूतस्स या मे इद्धि परित्तिका,
ताहं तदा निरंकत्वा पब्बजिं जिनसासने ॥३७७॥
पुब्बे यञ्जेन सन्तुट्ठो कामधातु पुरक्खतो,
पच्छा रागञ्च दोसञ्च मोहञ्चापि समूहनि ॥३७८॥
पुब्बनिवासं जानामि दिब्बचक्खुं विसोधितं,
इद्धिमा परचित्तञ्जू दिब्बसोतञ्च पापुणि ॥३७९॥
स यस्स चत्थाय पब्बजितो अगारस्मा अनगारियं,
सो मे अत्थो अनुप्पत्तो सब्बसंयोजनक्खयो 'ति ॥३८०॥

उरुवेळकस्सपो थेरो

अतिहिता वीहि, खलगता सालि, न च लभे पिण्डं, कथमहं कस्सं ॥३८१॥
बुद्धमप्पमेय्यं अनुस्सर, पसन्नो पीतिया
फुटसरीरो होहिसि सततमुदग्गो ॥३८२॥
धम्ममप्पमेय्यं—प—संघमप्पमेय्यं—प— ॥३८३-३८४॥
अब्भोकासे विहरसि, सीता हेमन्तिका इमा रत्तियो ।
मा सीतेन परेतो विहज्जिअत्थो, पविस त्वं विहारं फुसितग्गळं ॥३८५॥
फुसिस्सं चतस्सो अप्पमञ्जायो ताहि च सुखितो विहरिस्सं;
नाहं सीतेन विहज्जिअस्सं अनिज्जितो विहरन्तो 'ति ॥३८६॥

तेकिच्छकानि थेरो

यस्स सब्रह्मचारीसु गारवो नूपलब्भति
परिहायति सद्धम्मा मच्छो अप्पोदके यथा ॥३८७॥

यस्स सब्रह्मचारीसु.....

न विरूहति सद्धम्मे खेत्ते बीजं व पूतिकं ॥३८८॥

यस्स सब्रह्मचारीसु.....

आरका होति निब्बाना धम्मराजस्स सासने ॥३८९॥

यस्स सब्रह्मचारीसु गारवो उपलब्धति,

न विहायति सद्धमा मच्छो बव्होदके यथा ॥३९०॥

यस्स.....

सो विरूहति सद्धम्मे खेत्ते बीजं व भद्दकं ॥३९१॥

यस्स.....

सन्तिके होति निब्बानं धम्मराजस्स सासने 'ति ॥३९२॥

महानागो थेरो

कुल्लो सीवथिकं गन्त्वा अद्दसं इत्थिमुज्झितं

अपविद्धं सुसानस्मिं खज्जन्तिं किमिही फुटं ॥३९३॥

आतुरं अचुचिं पूतिं पस्स कुल्ल समुस्सयं

उग्घरन्तं पग्घरन्तं बालानं अभिनन्दितं ॥३९४॥

धम्मादासं गहेत्वान् जाणदस्सनपत्तिया

पच्चवेक्खिं इमं कायं तुच्छं सन्तरबाहिरं ॥३९५॥

यथा इदं तथा एतं यथा एतं तथा इदं

यथा अधो तथा उद्धं, यथा उद्धं तथा अधो ॥३९६॥

यथा दिवा तथा रत्तिं यथा रत्तिं तथा दिवा

यथा पुरे तथा पच्छा यथा पच्छा तथा पुरे ॥३९७॥

पञ्चङ्गिकेन तुरियेन न रति होति तादिसी

यथा एकगचित्तस्स सम्मा धम्मं विपस्स तोति ॥३९८॥

कुल्लो थेरो

मनुजस्स पमत्तचारिनो तण्हा वड्ढति माळुवा विया,

सो पलवती हुराहुरं फलमिच्छं व

वनस्मि वानरो ॥३९९॥

यं एसा सहती जम्मी तण्हा लोके विसत्तिका,

सोका तस्स पवड्ढन्ति अभिवड्ढं व भीरणं ॥४००॥

यो वे तं सहती जम्मि तण्हं लोके दुरच्चयं,
 सोका तम्हा पपतन्ति उदविन्दु व पोक्खरा ॥४०१॥
 तं वो वदामि भद्दं वो यावन्तेत्थ समागता
 तण्हाय मूलं खणथ उसीरत्थो व बीरणं,
 मा वो नळं व सोतो व मारो भञ्जि पुनप्पुनं ॥४०२॥
 करोथ बुद्धवचनं खणो वे मा उपच्चगा,
 खणातीता हि सोचन्ति निरयम्हि समप्पिता ॥४०३॥
 पमादो रजो, पमादानुपतितो रजो,
 अप्पमादेन विज्जाय अब्बहे सल्लमत्तनो'ति ॥४०४॥

मालङ्कयपुत्तो थेरो

पण्णवीसतिवस्सानि यतो पब्बजितो अहं
 अच्छरासंघातमत्तम्पि चेतो सन्ति मनज्झगं ॥४०५॥
 अलद्धा चित्तस्सेकगं कामरागेन अद्वितो
 बाहा पग्गय्ह कन्दन्तो विहारानुपनिक्खमिं ॥४०६॥
 सयं वा आहरिस्सामि को अत्था जीवितेन मे,
 कथं हि सिक्खं पच्चक्खं कालं कुब्बेथ मादिसो ॥४०७॥
 तदाहं खुरमादाय मञ्चकम्हि उपाविसिं,
 परिनीतो खुरो आसि धमनि छेतुमत्तनो ॥४०८॥
 ततो मे. . . (४०९, ४१०=२६९, २७०) ॥४०९॥-४१०॥

सप्पदासत्थेरो

उट्ठाहि निसीद कातियान मा निद्दाबहुलो अहु जागरस्सु,
 मा तं अलसं पमत्तबन्धु कूटेनेव जिनातु मच्चुराजा ॥४११॥
 सयथापि महासमुद्देवो एवं जातिजरातिवत्तते तं,
 सो करोहि सुदीपमत्तनो त्वं, न हि ताणं तव विज्जतेव अञ्जं ॥४१२॥
 सत्था हि विजेसि मग्गमेतं सङ्गा जातिजराभया अतीतं,
 पुब्बापररत्तमप्पमत्तो अनुयुञ्जसु
 दळ्हं करोहि योगं ॥४१३॥
 पुरिमानि पमुञ्च बन्धनानि संघाटीखुर, मुण्डभिक्खभोजी
 मा खिड्डारतिञ्च मा निद्दं अनुयुञ्जित्थ झियाय कातियान ॥४१४॥

आयाहि जिनाहि कातियान, योगक्खेमपदे सुकोविदो'सि;
 पप्पुय्य अनुत्तरं विसुद्धिं परिनिब्बाहिसि वारिनाव जोति ॥४१५॥
 पज्जोतकरो परित्तरंसो वातेन विनम्यते लता व;
 एवम्पि तुवं आनादियानो मारं इन्दसगोत्त निद्धुनाहि
 सो वेदयितासु वीतरागो कालं कङ्ख इधेव सीतिभूतो'ति ॥४१६॥

कातियानो थेरो

सुदेसितो चक्खुमता बुद्धेनादिच्चवन्धुना
 सब्बसंयोजनातीतो सब्बवट्टविनासनो ॥४१७॥
 निर्यायानिको उत्तरणो तण्हामूलविसोसनो
 विसमूलं आधातनं छेत्वा पापेति निब्बुतिं ॥४१८॥
 अज्जाणमूलभेदाय कम्मयन्तविघाटनो
 विज्जाणानं परिग्गहे जाणवजिरनिपातनो ॥४१९॥
 वेदनानं विज्जापनो उपादानप्पमोचनो
 भवं अङ्गारकासुं व जाणेन अनुपस्सको ॥४२०॥
 महारसो सुगम्भीरो जरामच्चुनिवारणो
 अयोड्ढिकोगअरिट्ठ ॥४२१॥
 कम्मं कम्मन्ति ज्ञत्वान विपाकञ्च विपाकतो
 पटिच्चुप्पन्नधम्मानं यथावालो कदस्सनो
 महाखेमंगमो सन्तो परियोसानभट्ठको'ति ॥४२२॥

मिगजालो थेरो

जातिमदेन मत्तो'हं भोगैस्सरिपेन च
 सण्ठान वण्णरूपेन मदमत्तो अचारि'हं ॥४२३॥
 नात्तनो समकं कञ्चि अतिरेकञ्च मज्झिंसं
 अतिमानहतो वालो पत्थद्वो उस्सितद्धजो ॥४२४॥
 मातरं पितरञ्चापि अञ्जे पि गरुसम्मते
 न कञ्चि अभिवादेसिं मानत्थद्वो अनादरो ॥४२५॥
 दिस्वा विनायकं अगं सारथीनं वरुत्तमं
 तपन्तमिव आदिच्चं म्भिक्खुसंघपुरक्खतं ॥४२६॥
 मानं मदञ्च छड्ढेत्वा विप्पसन्नेन चेतसा
 सिरसा अभिवादेसिं सब्बसत्तानमुत्तमं ॥४२७॥

अतिमानो च ओमानो पहीना सुसमूहता
अस्मिमानो समुच्छिन्नो, सब्बे मानविधा हता'ति ॥४२८॥

जेन्तो पुरोहितपुत्तो थेरो

यदा न वो पब्बजितो जातिया सत्तवस्सिको,
इद्धिया अभिभोत्वान पन्नगिन्दं महिद्धिकं ॥४२९॥
उपज्झायस्स उदकं अनोतत्ता महासरा
आहरामि ततो दिस्वा मं सत्था एतदब्रवी ॥४३०॥
सारिपुत्त इमं पस्स आगच्छन्तं कुमारकं
उदकुम्भकमादाय अज्झत्तं सुसमाहितं ॥४३१॥
पासादिकेन वत्तेन कल्याणइरियापथो
सामणेरो नुरुद्धस्स इद्धिया च विसारदो ॥४३२॥
आजानियेन आजज्जो साधुना साधु कारितो
विनीतो अनुरुद्धेन कतकिच्चेन सिक्खितो ॥४३३॥
सो पत्वा परमं सन्ति सच्छिकत्वा अकुप्पतं
सामणेरो स सुमनो मा मं जज्जा'ति इच्छतीति ॥४३४॥

सुमनो थेरो

वातरोगाभिनीतो त्वं विहरं कानने वने
पविद्धगोचरे लूखे कथं भिक्खु करिस्ससि ॥४३५॥
पीति सुखेन विपुलेन फरित्वान समुस्सयं
लूखम्पि अभिसम्भोन्तो विहरिस्सामि कानने ॥४३६॥
भावेन्तो सत्त बोज्झङ्गो इन्द्रियानि बलानि च
ज्ञानसोखुम्मसम्पन्नो विहरिस्सं अनासवो ॥४३७॥
विप्पमुत्तं किलेसेहि सुद्धचित्तं अनाविलं
अभिण्हं पच्चवेक्खन्तो विहरिस्सं अनासवो ॥४३८॥
अज्झत्तीञ्च बहिद्धा च ये मे विज्जिंसु आसवा
सब्बे असेसा उच्छिन्ना न च उप्पज्जरे पुन ॥४३९॥
पच्चक्खन्धा परिज्जाता तिट्ठन्ति छिन्नमूलका,
दुक्खक्खयो अनुप्पत्तो, नत्थि दानि पुनब्भवो'ति ॥४४०॥

न्हातकमुनि थेरो

अक्कोघस्स कुतो कोधो दन्तस्स समजीविनो
 सम्मदञ्जाविमुत्तस्स उपसन्तस्स तादिनो ॥४४१॥
 तस्सेव तेन पापियो यो कुद्धं पटिकुज्झति;
 कुद्धं अप्पटिकुज्झन्तो संगामं जेति दुज्जयं ॥४४२॥
 उभिन्नमत्थं चरति अत्तनो च परस्स च,
 परं संकुपितं जत्वा यो सतो उपसम्मति ॥४४३॥
 उभिन्नं तिकिच्छन्तं अत्तनो च परस्स च
 जना मञ्जान्ति बालो'ति ये धम्मस्स अकोविदा ॥४४४॥
 उप्पज्जते स चे कोधो, आवज्ज ककचूपमं;
 उप्पज्जे चे रसे तण्हा, पुत्तमंसुपमं सर ॥४४५॥
 सचे धावति ते चित्तं कामेसुच भवेसु च,
 खिप्पं निग्गण्ह सतिया किट्ठादं विय दुप्पसुन्ति ॥४४६॥

ब्रह्मदत्तो थेरो

छन्नमतिवस्सति, विवटं नातिवस्सति:
 तस्मा छन्नं विवरेथ, एवन्तं नातिवस्सति ॥४४७॥
 मच्चुनब्भाहतो लोको, जराय परिवारितो,
 तण्हासल्लेन ओतिण्णो, इच्छाधूपायितो सदा ॥४४८॥
 मच्चुनब्भाहतो लोको परिक्खित्तो जराय च
 हञ्जति निच्चमत्ताणो पत्तदण्डो व तक्करो ॥४४९॥
 आगच्छन्तगिखन्धा व मच्चुव्याधि जराय तयो
 पच्चुगन्तुं बलं नत्थि, जवो नत्थि पलायितुं ॥४५०॥
 अमोघं दिवसं कयिरा अप्पेन बहुकेन वा;
 यं यं विजहते रत्तिं तदूनन्तस्स जीवितं ॥४५१॥
 चरतो तिट्ठतो वापि आसीनं सयनस्स वा
 उपेति चरिमा रत्ति, न ते कालो पमज्जितु न्ति ॥४५२॥

सिरिमण्डो थेरो

दिपादको यमसुचि दुग्गन्धो परिहीरति
 नानाकुणपपरिपूरो विस्सवन्तो ततो ततो ॥४५३॥

मिगं निलीनं कूटेन बलिसेनेव अम्बुजं
 वानरं विय लेपेन बाधयन्ति पुथुज्जनं ॥४५४॥
 रूपा सद्दा रसा गन्धा फोट्टुब्बा च मनोरमा
 पञ्चकामगुणा एते इत्थि रूपस्मिं दिस्सरे ॥४५५॥
 ये एता उपसेवन्ति रत्तचित्ता पुथुज्जना,
 वड्ढेन्ति कटसिं घोरं आचिनन्ति पुनब्भवं ॥४५६॥
 यो वेता परिवज्जेति सप्पस्सेव पदा सिरो
 सो मं विसत्तिकं लोके सतो समतिवत्तति ॥४५७॥
 कामेस्वादीनवं दिस्वा नेक्खम्मं दट्ठु खेमतो
 निस्सटो सब्बकामेहिं, पत्तो मे आसवक्खयो'ति ॥४५८॥

सब्बकामो थेरो

उद्दानं

उरुवेळकस्सपो च थेरो तेकिच्छकानि च
 महानागो च कुल्लो च मालुतो सप्पदासको ।
 कातियानो च मिगजालो जेन्तो सुमनसव्हयो
 न्हातमुनि ब्रह्मदत्तो सिरिमण्डो सब्बकामको
 गाथायो चतुरासीति, थेरा चेत्थ चतुद्दसा'ति

छनिपातो निट्ठितो

सत्तनिपातो

अलंकता सुवसना मालधारी विभूसिता
अलक्तकतापादा पादुकारूय्ह वेसिका ॥४५९॥
पादुका ओरुहित्वान पुरतो पञ्जलिकता
सा मं सण्हेन मुदुना म्हितपुब्बं अभासथ ॥४६०॥
युवासि त्वं पब्बजितो तिट्ठाहि मम सासने,
भुज्ज मानुसके कामे, अहं वित्तं ददामि ते.
सच्चन्ते पटिजानामि, अग्गिं वा ते हरामहं ॥४६१॥
यदा जिण्णा भविस्साम उभो दण्डपरायना,
उभो पि पब्बजिस्साम, उभयत्थ कटग्गहो ॥४६२॥
तञ्च दिस्वान याचन्ति वेसिकं पञ्जलीकतं
अलंकतं सुवसनं मच्चुपासं व ओड्डितं ॥४६३॥
ततो मे. . . (=२६९, २७०) ॥४६४-४६५॥

सुन्दरसमुद्दो थेरो

परे अम्बाटकारामे वनसण्डम्हि भद्दियो
समूलं तण्हमब्बूय्ह तत्थ भद्दो झियायति ॥४६६॥
रमन्तेके मुत्तिङ्गोहि वीणाहि पणवेहि च
अहञ्च ख्खमूलस्मि रतो बुद्धस्स सासने ॥४६७॥
बुद्धो च मे वरं दज्जा सो च लब्भेय मे वरो
गण्हे'हं सब्बलोकस्स निच्चं कायगतासत्ति ॥४६८॥
ये मं रूपेण पामिसु ये च घोसेन अन्वगू ।
छन्दरागवसूपेता न मं जानन्ति ते जना ॥४६९॥
अज्झत्तञ्च न जानाति बहिद्धा च न पस्सति
समन्ता वरणो बालो, स वे घोसेन वुय्हति ॥४७०॥

अज्झत्तञ्च न जानाति बहिद्धा च विपस्सति
 बहिद्धा फलदस्सावी सो पि घोसेन वुय्हति ॥४७१॥
 अज्झत्तञ्च पजानाति बहिद्धा च विपस्सति
 अनावरणदस्सावी, न सो घोसेन वुय्हतीति ॥४७२॥

लकुण्टको थेरो

एकपुत्तो अहं आसिं पियो मातु पियो पितु
 बहूहि वतचरियाहि लद्धो आयाचनाहि च ॥४७३॥
 ते च मं अनुकम्पाय अत्थकामा हितेसिनो
 उभो पिता च माता च बुद्धस्स उपनाममुं ॥४७४॥
 किच्छा लद्धो अयं पुत्तो सुखुमालो सुखेधितो
 इमं ददाम ते नाथ जिनस्स परिचारकं ॥४७५॥
 सत्था च मं पटिग्गय्ह आनन्दं एतदब्रवि
 पब्बाजेहि इमं खिप्पं, हेस्सत्याजानियो अयं ॥४७६॥
 पब्बाजेत्वान मं सत्था विहारं पाविसी जिनो;
 अनोगगतस्मिं सुरियस्मिं ततो चित्तं विमुच्चि मे ॥४७७॥
 ततो सत्था निरंकत्वा पटिसल्लानवुट्ठितो
 एहि भद्दा 'ति मं आह; सा मे आसूपसम्पदा ॥४७८॥
 जातिया सत्तवस्सेन लद्धा मे उपसम्पदा;
 तिस्सो विज्जा अनुप्पत्ता अहो धम्मसुधम्मता'ति ॥४७९॥

भदो थेरो

दिस्वा पासादछायायं चङ्कमन्तं नरुत्तमं
 तत्थ नं उपसंकम्म वन्दिस्सं पुरिसुत्तमं ॥४८०॥
 एकंसं चीवरं कत्वा संहरित्वान पाणियो
 अनुचङ्कमिस्सं विरजं सब्बसत्तानमुत्तमं ॥४८१॥
 ततो पञ्हे अपुच्छि मं पञ्हानं कोविदो विदू,
 अच्छम्भी च अभीतो च ब्याकासिं सत्थुनो अहं ॥४८२॥
 विस्सज्जितेसु पञ्हेसु अनुमोदि तथागतो,
 भिक्खुसंघं विलोकेत्वा इम मत्थं अभासथः ॥४८३॥
 लाभा अङ्गान मगधानं येसायं परिभूञ्जति
 चीवरं पिण्डपातञ्च पच्चयं सयनासनं
 पच्चुट्ठानं च सामीचिं, तेसं लाभा'ति च ब्रवी ॥४८४॥

अज्जदग्गे मं सोपाक दस्सनायोपसंकम,
 एसा चेव ते सोपाक भवतु उपसम्पदा ॥४८५॥
 जातिया सत्त वस्सो'हं लद्धान उपसम्पदं
 धारेमि अन्तिमं देहं अहो धम्मसुधम्मता'ति ॥४८६॥

सोपाको थेरो

सरे हत्थेहि भज्जित्वा कत्वान कुटिमच्छिसं,
 तेन मे सरभङ्गो'ति नामं सम्मुतिया अहू ॥४८७॥
 न मय्हं कप्पते अज्ज सरे हत्थेहि भज्जितुं
 सिक्खापदा नो पञ्जत्ता गोतमेन यसस्सिना ॥४८८॥
 सकलं समत्तं रोगं सरभङ्गो नादसं पुब्बे,
 सो'यं रोगो दिट्ठो वचनकरेनाति देवस्स ॥४८९॥
 येनेव मग्गेन गतो विपस्सी येनेव मग्गेन सिखी च वेस्सभू
 ककुसन्धकोणागमनो च कस्सपो
 तेनज्जसेन अगमासि गोतमो ॥४९०॥
 वीततण्हा अनाधाना सत्त बुद्धा खयोगघा,
 ये हयं देसितो धम्मो धम्मभूतेहि तादिहि ॥४९१॥
 चत्तारि अरियसच्चानि अनुकम्पाय पाणिनं
 दुक्खं समुदयो मग्गो निरोधो दुक्ख संखयो ॥४९२॥
 यस्मि निब्बत्तते दुक्खं संसारस्मि अनन्तकं
 भेदा इमस्स कायस्स जीवितस्स च संख्या
 अज्जो पुनब्भवो नत्थि सुविमुत्तो'म्हि सब्बधीति ॥४९३॥

सरभङ्गो थेरो

उद्दानं

सुन्दर समुद्दो थेरो थेरो लकुण्ठभद्दियो
 भद्दो थेरो च सोपाको सरभङ्गो महाइसिः
 सत्तके पञ्चका थेरा, गाथायो पञ्चवर्तिसतीति.

निट्ठितो च सत्तनिपातो

अद्वनिपातो

कम्मं बहुकं न कारये, परिवज्जेय्य जनं न उय्यमे;
सो उस्सुको रसानुगिद्धो अत्थं रिञ्चति यो सुखाधिवाहो ॥४९४॥
पड्ढकोति हि नं अवेदयुं यायं वन्दनपूजना कुलेसु,
सुखुमं सल्लं दुःखं सक्कारो कापुरिसेन दुज्जहो ॥४९५॥
न पस्सु पनिद्धाय कम्मं मच्चस्स पापकं
अत्तना तं न सेवेय्य, कम्मबन्धू हि मातिया ॥४९६॥
न परे वचना चोरो, न परे वचना मुनि;
अत्तानञ्च यथा वेति देवापि नं तथा विदु ॥४९७॥
परे च न विजानन्ति मयमेत्थ यमामसे :
ये च तत्थ विजानन्ति ततो सम्मन्ति मेधगा ॥४९८॥
जीवतेवापि सप्पञ्जो अपि वित्तपरिक्खया
पञ्जाय च अलाभेन वित्तवापि न जीवति ॥४९९॥
सब्बं सुणाति सोतेन सब्बं पस्सति चक्खुना
न च दिट्ठं सुतं धीरो सब्बमुज्झितुमरहति ॥५००॥
चक्खुमस्स यथा अन्धो, सोतवा बधिरो यथा,
पञ्जावस्स यथा मूगो, बलवा दुब्बलोरिव,
अथ अत्थे समुप्पन्ने सयेथ मतसायिकन्ति ॥५०१॥

महाकच्चायनो थेरो

अक्कोधनो अनुपनाही अमायो रित्तपेसुणो
स वे तादिसको भिक्खु एवं पेच्च न सोचति ॥५०२॥
अक्कोधनो अनुपनाही अमायो रित्तपेसुणो
गुत्तद्वारो सदा भिक्खु एवं पेच्च न सोचति ॥५०३॥
अक्कोधनो
कल्याणसीलो यो भिक्खु एवं पेच्च न सोचति ॥५०४॥

अक्कोधनो

कल्याणमित्तो यो भिक्खु एवं पेच्च न सोचति ॥५०५॥

अक्कोधनो

कल्याणपञ्जो यो भिक्खु एवं पेच्च न सोचति ॥५०६॥

यस्स सद्धा तथागते अचला सुपतिट्ठिता,

सोलञ्च यस्स कल्याणं अरियकन्तं पसंसितं ॥५०७॥

संघे पसादो यस्सत्थि उजुभूतञ्च दस्सनं

अदळ्हित्ठो 'ति तं आहु अमोघन्तस्स जीवितं ॥५०८॥

तस्मा सद्धञ्च सोलञ्च पसादं धम्मदस्सनं

अनुयुञ्जेथ मेधावी सरं बुद्धान सासनन्ति ॥५०९॥

सिरिमित्तोथेरो

यदा पटममहक्खिं सत्थारमकुतोभयं

ततो मे अहु संवेगो पस्सित्वा पुरिसुत्तमं ॥५१०॥

सिरिं हत्थेहि पादेहि यो पणामेय्य आगतं,

एतादिसं सो सत्थारं आराधेत्वा विराधये ॥५११॥

तदाहं पुत्तदारञ्च धनधञ्जञ्च छड्डयिं,

केसमस्सूनि छेदेत्वा पब्बजिं अनगारियं ॥५१२॥

सिक्खासाजीवसम्पन्नो इन्द्रियेसु सुसंबुतो

नमस्समानो सम्बुद्धं विहासिं अपराजितो ॥५१३॥

ततो मे पणिधी आसि चेतसो अभिपत्थितो

न निसीदे मुहुत्तम्पि तण्हासल्ले अनूहते ॥५१४॥

तस्स मेवं विहरतो पस्स विरियपरक्कमं

तिस्सो विज्जा अनुप्पत्ता कतं बुद्धस्स सासनं ॥५१५॥

पुब्बेनिवासं जानामि, दिब्बचक्खुं विसोधितं,

• अरहा दक्खिण्य्यो 'मिह विप्पमुत्तो निरुपधि ॥५१६॥

ततो रत्या विवसने सुरियस्सुग्गमनं पति

सब्बं तण्हं विसोसेत्वा पल्लङ्केन उपाविसिन्ति ॥५१७॥

महापन्थको थेरो

उद्दानं

महाकच्चायनो थेरो सिरिमित्तो महापन्थको

एते अट्ठनिपातमिह, गाथायो चतुवीसतीति

अट्ठनिपातो निट्ठितो

नवनिपातो

यदा दुक्खं जरामरणन्ति पण्डितो अविद्दसु यत्थ सिता पुथुज्जना
दुक्खं परिज्जाय सतो 'व ज्ञायति, ततो रतिं परमतरं न विन्दति ॥५१८॥
यदा दुक्खस्सावहनिं विसत्तिकं पपञ्चसंघाटदुखाधिवाहनं
तण्हं पहत्वान सतो 'व ज्ञायति, ततो रतिं परमतरं न विन्दति ॥५१९॥
यदा सिवं द्वे चतुरङ्गामिनं मग्गुत्तमं सब्बकिलेससोधनं
पज्जाय पस्सित्वा सतो 'व ज्ञायति ततो...॥५२०॥
यदा असोकं विरजं असंखतं सन्तं पदं सब्बकिलेससोधनं
भावेति सज्जोजनबन्धनच्छिदं, ततो...॥५२१॥
यदा नभे गज्जति मेघदुन्दुभि धाराकुला विहङ्गपथे समन्ततो
भिक्षु च पब्भारगतो 'व ज्ञायति, ततो...॥५२२॥
यदा नदीनं कुसुमाकुलानं विचित्तवानेय्यवटंसकानं
तीरे निसिन्ने सुमनो 'व ज्ञायति, ततो...॥५२३॥
यदा निसीथे रहितम्हि कानने देवे गळन्तम्हि नदन्ति दाठिनो
भिक्षु च पब्भारगतो 'व ज्ञायति, ततो...॥५२४॥
यदा वितक्के उपरुन्धियत्तनो नगन्तरे नगविवरं समस्सितो
वीतइरो विगतखिलो 'व ज्ञायति, ततो...॥५२५॥
यदा सुखी मलखिलसोकनासनो निरग्गलो निब्बनथो विसल्लो
सब्बासवे व्यन्तिकतो 'व ज्ञायति, ततो रतिं परमतरं न विन्दतीति ॥५२६॥

भूतो थेरो

उद्दानं

भूतो तथद्दसो थेरो एको खग्गविसाणवा
नवकम्हि निपातम्हि गाथायो पि इमा नवा 'ति ।

नवनिपातो निट्ठितो

दसनिपातो

अङ्गारिनो दानि दुमा भदन्ते फलेसिनो छदनं विष्पहाय,
ते अच्चिमन्तो व पभासयन्ति, समयो महावीर भगीरसानं ॥५२७॥
दुमानि फुल्लानि मनोरमानि समन्ततो सब्बदिसा पवन्ति
पत्तं पहाय फलमाससाना; कालो इतो पक्कमनाय वीर ॥५२८॥
नेवातिसीतं न पनातिउण्हं सुखा उतु अट्टनिया भदन्ते;
पस्सन्तु तं साकिया कोळिया च पच्छामुखं रोहिणियं तरन्तं ॥५२९॥
आसाय कस्सते खेत्तं, बीजं आसाय वुप्पति
आसाय वाणिया यन्ति समुद्दं धनहारका
याय आसाय तिट्ठामि, सा मे आसा समिज्झतु ॥५३०॥
पुनप्पुनं चेव वपन्ति बीजं, पुनप्पुनं वस्सति देवराजा
पुनप्पुनं खेत्तं कसन्ति कस्सका, पुनप्पुनं धञ्जामुपेति रट्ठं ॥५३१॥
पुनप्पुनं याचनका चरन्ति, पुनप्पुनं दानपती ददन्ति,
पुनप्पुनं दानपती ददित्वा पुनप्पुनं सग्गमुपेन्ति ठानं ॥५३२॥
वीरो हवे सत्तयुगं पुनेति यस्मिं कुले जायति भूरिपञ्जो;
मञ्जामहं सक्कतिदेवदेवो, तथा हि जातो मुनि सच्चनामो ॥५३३॥
सुद्धोदनो नाम पिता महेसिनो, बुद्धस्स माता पन मायनामा
या बोधिसत्तं परिहरिय कुच्छिना कायस्स भेदा ति दिवस्मि मोदति ॥५३४॥
सा गोतमी कालकता इतो चुता दिब्बेहि कामेहि समङ्गिभूता
सा मोदति कामगुणेहि पञ्चहि परिवारिता देवगणेहि तेहि ॥५३५॥
बुद्धस्स पुत्तो 'मिह असय्हसाहिनो अङ्गीरसस्सप्पटिमस्स तादिने
पितु पिता मय्हं तुवं 'सि सक्क, धम्मेन मे गोतम अय्यको 'सीति ॥५३६॥

काकुदायीथेरो

पुरतो पच्छतो वापि अपरो चे न विज्जति,
अतीव फासु भवति एकस्स वसतो वने ॥५३७॥

हन्द एको गमिस्सामि अरञ्जं बुद्धवणिणं
 फासुं एकविहारिस्स पहितत्तस्स भिक्खुनो ॥५३८॥
 योगिपीतिकरं रम्मं मत्तकुञ्जरसेवितं
 एको अत्थवसी खिप्पं पविसिस्सामि काननं ॥५३९॥
 सुपुप्फिते सीतवने सीतले गिरिकन्दरे
 गत्तानि परिसिञ्चित्वा चङ्कमिस्सामि एकको ॥५४०॥
 एकाकियो अद्रुतियो रमणीये महावने
 कदाहं विहरिस्सामि कतकिच्चो अनासवो ॥५४१॥
 एवं मे कत्तुकामस्स अधिप्पायो समिज्झतु;
 साधयिस्सामहं येव, नाञ्जो अञ्जस्स कारको ॥५४२॥
 एस बन्धामि सन्नाहं, पविसिस्सामि काननं,
 ने ततो नेक्खमिस्सामि अप्पत्तो आसवक्खयं ॥५४३॥
 मालुते अपवायन्ते सीते सुरभिगन्धके
 अविज्जं दालयिस्सामि निसिन्नो नगमुद्धनि ॥५४४॥
 विने कुसुमसञ्छन्ने पब्भारे नून सीतले
 विमुत्तिसुखेन सुखितो रमिस्सामि गिरिब्बजे ॥५४५॥
 सो 'हं परिपुण्णसंकप्पो चन्दो पन्नरसो यथा
 सब्बासवपरिक्खीणो नत्थि दानि पुनब्भवो 'ति ॥५४६॥

एकविहारियो थेरो

अनागतं यो पटिगच्च पस्सति हितञ्च अत्थं अहितञ्च तं द्वयं
 विद्देसिनो तस्स हितेसिनो वा रन्धं न पस्सन्ति समेक्खमाना ॥५४७॥
 आज्ञापानसती यस्स परिपुण्णा सुभाविता
 अनुपुब्बं परिचिता यथा बुद्धेन देसिता,
 सो 'मं लोकं पभासेति अब्भा मुत्तो व चन्दिमा ॥५४८॥
 ओदातं वत मे चित्तं अप्पमाणं सुभावितं
 निब्बिद्धं पग्गहीतञ्च सब्बा ओभासते दिसा ॥५४९॥
 जीवतेवापि सप्पञ्जो अपि वित्तपरिक्खया,
 पञ्जाय च अलाभेन वित्तवापि न जीवति ॥५५०॥
 पञ्जा सुतविनिच्छिनी, पञ्जा कित्तिसि लोकवद्धनी
 पञ्जासहितो नरो इध अपि दुक्खेसु सुखानि विन्दन्ति ॥५५१॥

नायं अज्जतनो धम्मो न च्छेरो न पि अब्भुतो
 यत्थ जायेथ, मायेथ तत्थ किं विय अब्भुतं ॥५५२॥
 अनन्तरं हि जातस्स जीविता मरणं धुवं;
 जाता जाता मरन्तीध, एवंधम्मा हि पाणिनो ॥५५३॥
 न हेतदत्थाय मतस्स होति यं जीवितत्थं परपोरिसानं
 मतम्हि रुण्णं, न यसो न लोक्यं, न वण्णितं समणब्राह्मणेहि ॥५५४॥
 चक्खुं सरीरं उपहन्ति रुण्णं, निहीयती वण्णबलं मती च,
 आनन्दिनो तस्स दिसा भवन्ति, हितेसिनो नास्स सुखी भवन्ति ॥५५५॥
 तस्मा हि इच्छेय्य कुले वसन्ते मेधाविनो चेव बहुस्सुते च,
 येसं हि पज्जा विभवेन किच्चं तरन्ति नावाय नदिं व पुण्णन्ति ॥५५६॥

महाकम्पिनो थेरो

दन्धा मय्हं गती आसि, परिभूतो पुरे अहं
 भाता च मं पणामेसि, गच्छ दानि तुवं घरं ॥५५७॥
 सोहं पणामितो सन्तो संघारामस्स कोट्टके
 दुम्मनो तत्थ अट्ठासि सासनस्मि अपेक्खवा ॥५५८॥
 भगवा तत्थ आगच्छि, सीसं मय्हं परामसि,
 बाहाय मं गहेत्वान, संघारामं पवेसयि ॥५५९॥
 अनुकम्पाय मे सत्था पादासि पादपुञ्छनि :
 एतं सुद्धं अधिट्ठेहि एकमन्तं स्वधिद्वितं ॥५६०॥
 तस्साहं वचनं सुत्वा विहासि सासने रतो
 समाधिं पटिपादेसि उत्तमत्थस्स पत्तिया ॥५६१॥
 पुब्बेनिवासं जानामि, दिब्बचक्खुं विसोधितं
 तिस्सो विज्जा अनुप्पत्ता, कतं बुद्धस्स सासनं ॥५६२॥
 सहस्सक्खत्तुमत्तानं निम्मिनित्वान पन्थको
 निसीदि अम्बवने रम्मे याव कालप्पवेदनं ॥५६३॥
 ततो मे सत्था पाहेसि, दूतं कालप्पवेदकं
 पवेदितम्हि कालम्हि वेहासानुपसंकमि ॥५६४॥
 वन्दित्वा सत्थुनो पादे एकमन्तं निसीदहं
 निसिन्नं मं विदित्वान अथ सत्था पटिग्गहि ॥५६५॥
 आयागो सब्बलोकस्स आहुतीनं पटिग्गहो
 पुञ्जाखेतं मनुस्सानं पटिग्गहिहत्थ दक्खिणन्ति ॥५६६॥

चूलपन्थको थेरो

नानाकुलमलसम्पुण्णो महाउक्कारसम्भवो
 चन्दनिककं व परिपक्कं महागण्डो महावणो ॥५६७॥
 पुब्बरुहिरसम्पुण्णो गूथकूपे निगाळ्हिको
 आपोपग्घरणी कायो सदा सन्दति पूतिघं ॥५६८॥
 सट्ठि कण्डरसम्बन्धो मंसलेपनलेपितो
 चम्मकञ्चुकसन्नद्धो पूतिकायो निरत्थको ॥५६९॥
 अट्ठि संघाटघटितो न्हाएसुत्तनिवन्धनो
 नेकेसं संगतिभावा कप्पेति इरियापथं ॥५७०॥
 धुवप्पयातो मरणस्स मञ्चुराजस्स सन्तिके,
 इधेव छड्डयित्वान येनकामंगमो नरो ॥५७१॥
 अविज्जाय निवुतो कायो, चतुगन्थेन गन्थितो ।
 ओघसंसीदनो कायो, अनुसयजालमोत्थतो ॥५७२॥
 पञ्च नीवरणे युत्तो, वितक्केन समप्पितो,
 तण्हामूले नानुगतो, मोहच्छदनछादितो ॥५७३॥
 एवायं वत्तती कायो कम्मयन्तेन यन्तितो,
 सम्पत्ति च विपत्यन्ता, नानाभवो विपज्जति ॥५७४॥
 ये' मं कायं ममायन्ति अन्धबाला पुथुज्जना
 वड्ढेन्तिं कटसिं घोरं आदियन्ति पुनब्भवं ॥५७५॥
 ये मं कायं विवज्जेन्ति गूथलित्तं व पन्नगं,
 भवमूलं वमित्वान परिनिब्बिस्सन्त्यनासवा'ति ॥५७६॥

कप्पो थेरो

विवित्तं अप्पनिग्घोसं वाळमिगनिसेवितं
 सेवे सेनासनं भिक्खु पटिसल्लानकारणा ॥५७७॥
 संकारपुज्जा आहत्वा सुसाना रथियाहि च
 ततो संघाटिकं कत्वा लूखं धारेय्य चीवरं ॥५७८॥
 नीचं मनं करित्वान सपदानं कुला कुलं
 पिण्डिकाय चरे भिक्खु गुत्तहारो सुसंवुतो ॥५७९॥
 लूखेन पि च सन्तुस्से, नाञ्जं पत्थे रसं बहुं;
 रसेसु अनुगिद्धस्स ज्ञानेन रमती मनो ॥५८०॥

अप्पिच्छो चेव सन्तुट्ठो पविवित्तो वसे मुनि,
 असंसट्ठो गहट्ठेहि अनागारेहि चूभयं ॥५८१॥
 यथा जळो च मूगो च अत्तानं दस्सये तथा,
 नातिवेलं पभासेय्य संघमज्झमिह पण्डितो ॥५८२॥
 न सो उपवदे कच्चि उपघातं विवज्जये :
 संवुतो पातिमोक्खस्मि मत्तञ्ज्जू चस्स भोजने ॥५८३॥
 सुग्गट्ठीतनिमित्तस्स चित्तस्सुपादकोविदो,
 समथं अनुयुज्जेय्य कालेन च विपस्सनं ॥५८४॥
 विरियसातच्चसम्पन्नो युत्तयोगो सदा सिया,
 न च अपत्त्वा दुक्खस्सन्तं विस्सासमेय्य पण्डितो ॥५८५॥
 एवं विहरमानस्स सुद्धिकामस्स भिक्खुनो
 खीयन्ति आसवा सब्बे निब्बुतिञ्चाधिगच्छतीति ॥५८६॥

उपसेनो वङ्गन्तपुत्तो थेरो

विजानेय्य सकं अत्थं, अवलोकेय्याथ पावचनं,
 यञ्चेत्थ अस्सपटिरूपं सामञ्जं अज्झुपगतस्स ॥५८७॥
 मित्तं इध कल्याणं सिक्खाविपुलं समादानं
 सुस्सूसा च गरूनं एतं समणस्स पटिरूपं ॥५८८॥
 बुद्धेसु सगारवता धम्मे अपचिति यथाभूतं
 संघे च चित्तिकारेः एतं समणस्स पटिरूपं ॥५८९॥
 आचारगोचरे यत्तो आजीवो सोधितो अगारय्हो
 चित्तस्स सण्ठपनं एतं समणस्स पटिरूपं ॥५९०॥
 चारित्तं अथ वारित्तं इरियापथियं पसादनियं
 अधिचित्ते च अयोगो एतं ॥५९१॥
 आरञ्जकानि सेनासनानि पन्तानि अप्पसद्धानि
 भजतब्बानि मुनिना एतं ॥५९२॥
 सीलञ्च वाहुसच्चञ्च धम्मानं पविचयो यथाभयं
 सच्चानं अभिसमयो एतं ॥५९३॥
 भावेय्य अनिच्चन्ति अनत्तसञ्जं असुभसञ्जञ्च
 लोकमिह च अनभिरति एतं ॥५९४॥
 भावेय्य च बोझङ्गो इद्धिपादानि इन्द्रियबलानि
 अट्ठङ्गमग्गमरियं : एतं ॥५९५॥

तण्हं पजहेय्य मुनी, समूलके आसवे पदालेय्य,
विहरेय्य विमुत्तो एतं समणस्स पटिरूपन्ति ॥५९६॥

गोतमो थेरो

उद्दानं

काळुदायी च सो थेरो एकविहारी च कप्पिनो
चूळपन्थको कप्पो च उपसेनो च गोतमो
सत्तिमे दसके थेरा, गाथायो चेत्थ सत्ततीति
दसनिपातो निद्धितो

एकादसनिपातो

किन्तवत्यो वने तात उज्जुहानो व पावुसे
वेरम्बा रमणीया ते, पविवेको हि ज्ञायिनं ॥५९७॥
यथा अब्भानि वेरम्बो वातो नुदति पावूसे
सआ मे अभिकीरन्ति विवेकपटिसञ्जुता ॥५९८॥
अपण्डरो अण्डसम्भवो सीवथिकाय निकेतचारिको
उप्पादयतेव मे सतिं सन्देहस्मि विरागनिस्सितं ॥५९९॥
यञ्च अञ्जेन रक्खन्ति यो च अञ्जेन रक्खति,
स वे भिक्खु सुखं सेति कामेसु अनपेक्खवा ॥६००॥
अच्छोदिका पुथुसिला गोनङ्गुलमिगायुता
अम्बुसेवालसञ्छन्ना ते सेला रमयन्ति मं ॥६०१॥
विसितम्मे अरञ्जेसु कन्दरासु गुहासु च
सेनासनेसु पन्तेसु वाळमिगनिसेविते ॥६०२॥
इमे हञ्जन्तु वञ्जन्तु दुक्खं पप्पोन्तु पाणिनो
संकप्पं नाभिजानामि अनरियं दोस संहितं ॥६०३॥
परिचिण्णो मया सत्था, कतं बुद्धस्स सासनं,
ओहितो गरुको भारो, भवनेत्ति समूहता ॥६०४॥
यस्स चत्थाय पब्बजितो अगारस्मा अनगारियं,
सो मे अत्थो अनुप्पत्तो सब्बसंयोजनक्खयो ॥६०५॥
नाभिनन्दामि मरणं नाभिनन्दामि जीवितं
कालञ्च पटिकङ्खामि निब्बिसं भतको यथा ॥६०६॥
नाभिनन्दामि मरणं नाभिनन्दामि जीवितं
कालञ्च पटिकङ्खामि सम्पजानो पतिस्सतो 'ति ॥६०७॥

संकिच्च थेरो

[७५

संकिच्च थेरो

उद्दानं

संकिच्च थेरो एको व कतकिच्चो अनासवो
एकादस निपातम्हि, गाथा एकादसेव ता'ति

एकादसनिपातो निट्ठितो

द्वादसनिपातो

सीलमेविध सिक्खेथ अस्मि लोके सुसिक्खितं
सीलं हि सब्बसम्पत्ति उपनामेति सेवितं ॥६०८॥
सीलं रक्खेय्य मेधावी पत्थयानो तयो सुखे
पसंसं वित्तिलाभञ्च पेच्च सग्गे च मोदनं ॥६०९॥
सीलवा हि बहू मित्ते सञ्जमेनाधिगच्छति,
दुस्सीलो पन मित्तेहि धंसते पापमाचरं ॥६१०॥
अवण्णञ्च अकित्तिञ्च दुस्सीलो लभते नरो
वण्णं कित्तिं पसंसञ्च सदा लभति सीलवा ॥६११॥
आदिसीलं पतिट्ठा च कल्याणानञ्च मातुकं
पमुखं सब्बधम्मानं तस्मा सीलं विसोधये ॥६१२॥
वेला च संवरं सीलं चित्तस्स अभिभासनं,
तित्थञ्च सब्बबुद्धानं, तस्मा सीलं विसोधये ॥६१३॥
सीलं बलं अप्पटिमं सीलं आवुधमुत्तमं,
सीलमाभरणं सेट्ठं, सीलं कवचमब्भुतं ॥६१४॥
सीलं सेतु महेसक्खो, सीलं गन्धो अनुत्तरो
सीलं विलेपनं सेट्ठं येन वाति दिसो दसं ॥६१५॥
सीलं सम्बलमेवगं, सीलं पाथेय्यमुत्तमं,
सीलं सेट्ठो अतिवाहो येन याति दिसो दिसं ॥६१६॥
इधेव निन्दं लभति पेच्चापाये च दुम्मनो
सब्बत्थ दुम्मनो वालो सीलेसु असमाहितो ॥६१७॥
इधेव किंत्ति लभति पेच्च सग्गे च सुम्मनो,
सब्बत्थ सुमनो धीरो सीलेसु सुसमाहितो ॥६१८॥
सीलमेव इध अगं, पञ्जावा पन उत्तमो,
मनुस्सेसु च देवेसु सीलपञ्जाणतो जयन्ति ॥६१९॥

सीलवत्थेरो

नीचे कुलम्हि जातो'हं दळिहो अप्पभोजनो;
 हीनं कम्मं ममं आसि अहोमि पुप्फछड्डु को ॥६२०॥
 जिगुच्छितो मनुस्सानं परिभूतो च वम्भितो
 नीवं मनं करित्वान वन्दिस्सं बहुकं जनं -॥६२१॥
 अथ अहमासि सम्बुद्धं भिक्खुसंघपुरक्खत
 पविसन्तं महावीरं मगधानं पुरुत्तमं ॥६२२॥
 निक्खिपित्वान व्याभङ्गि वन्दितुं अपमंकमि;
 ममेव अनुकम्पाय अट्ठासि पुरिसुत्तमो ॥६२३॥
 वन्दित्वा मत्थुनो पादे एकमन्तं ठितो तदा
 पब्बजं अहमायाचि सब्बसत्तानमुत्तमं ॥६२४॥
 ततो कारुणिको सत्था सब्बलोकानुकम्पको
 एहि भिक्खू'ति मं आह, सा मे आसुपसम्पदा ॥६२५॥
 सो'हं एको अरञ्जास्मि विहरन्तो अतन्दितो
 अकासि सत्थुवचनं यथा मं ओवदी जिनो ॥६२६॥
 रत्तिया पठमं यामं पुब्बजातिमनुस्सरिं,
 रत्तिया मज्झिमं यामं दिव्वचक्खू विसोधितं,
 रत्तिया पच्छिमे यामे तमोखन्धं पदालयि ॥६२७॥
 ततो रत्त्याविवसने सुरियस्सुग्गमनं पति
 इन्द्रो ब्रह्मा च आगन्त्वा मं नमस्सिंसु पञ्जलि ॥६२८॥
 नमो ते पुरिसाजञ्ज, नमो ते पुरिसुत्तम,
 यस्स ते आसवा खीणा, दक्खिण्य्यो'मि मारिस ॥६२९॥
 ततो दिस्वान मं सत्था देवसंघपुरक्खतं
 सितं पानुकरित्वान इमं अत्थं अभासथ ॥६३०॥
 तपेन ब्रह्मचरियेन संयमेन दमेन च
 एतेन ब्राह्मणो होति, एतं ब्राह्मणमुत्तमन्ति ॥६३१॥

मुणीतो थेरो

उद्दानं

सीलवा च मुणीतो च थेरा द्वेते महिद्धिका
 द्वादसम्हि निपातम्हि, गाथायो चतुर्वीसतीति
 द्वादसनिपातो निट्ठितो

तेरसनिपातो

याहु रट्ठे समुक्कट्ठो रज्जो अङ्गस्स पद्धगु
स्वाज्ज धम्मेषु उब्बट्ठो सोणो दुक्खस्स पारगु ॥६३२॥
पञ्च छिन्दे पञ्च जहे पञ्च चुत्तरि भावये;
पञ्च संङ्गातिगो भिक्खु ओघतिण्णो 'ति वुच्चति ॥६३३॥
उन्नळस्स पमत्तस्स वाहिरासस्स भिक्खुनो
सीलं समाधि पञ्जा च पारिपूरिं न गच्छति ॥६३४॥
यं हि किच्चं तदपविद्धं, अकिच्चं पन कयिरति;
उन्नळानं पमत्तानं तेसं वड्ढन्ति आसवा ॥६३५॥
येसञ्च सुसमारट्ठा निच्चं कायगता सति,
अकिच्चन्ते न सेवन्ति किच्चे सातच्चकारिनो
सतानं सम्पजानानं अत्थं गच्छन्ति आसवा ॥६३६॥
उजुमग्गमिह अक्खाते गच्छथ मा निवत्तथ
अत्तना चोदयत्तानं, निब्बानं अभिहारये ॥६३७॥
अच्चारद्धमिह विरियमिह सत्था लोके अनुत्तरो
वीणोपमं करित्वा मे धम्मं देसेसि चक्खुमा ॥६३८॥
तस्साहं वचनं सुत्वा विहासिं सासने रतो
समतं पटिपादेसिं उत्तमत्थस्स पत्तिया,
तिस्सो विज्जा अनुप्पत्ता, कतं बुद्धस्स सासनं ॥६३९॥
नेक्खम्मे अधिमुत्तस्स पविवेकञ्च चेतसो
अब्बापज्झाधिमुत्तस्स उपादानक्खयस्स च ॥६४०॥
तण्हक्खयाधिमुत्तस्स असम्मोहञ्च चेतसो
दिस्वा आयतनुप्पादं सम्मा चित्तं विमुच्चति ॥६४१॥
तस्सा सम्मा विमुत्तस्स सन्तचित्तस्स भिक्खुनो
कतस्स पटिचयो नत्थि, करणीयं च विज्जति ॥६४२॥

सेलो यथा एक घनो वातेन न समीरति,
एवं रूपा रसा सद्वा गन्धा फस्सा च केवला ॥६४३॥
इट्ठा धम्मा अनिट्ठा च न प्पवेधेन्ति तादिनो;
ठितं चित्तं विसञ्जुत्तं वयञ्चस्सानुपस्सतीति ॥६४४॥

सोणो कोळिविसो थेरो

उद्दानं

सोणो कोळिविसोथेरो एको एव महिद्धिको
तेरसम्हि निपातम्हि गाथायो चेत्थ तेरसा'ति
तेरसनिपातो निट्ठितो



चुद्दसनिपातो

यदा अहं पब्बजितो अगारस्मा अनगारियं
नाभिजानामि संकप्पं अनरियं दोससंहितं ॥६४५॥
इमे हञ्जन्तु वज्जन्तु दुक्खं पप्पोन्तु पाणिनो
संकप्पं नाभिजानामि इमस्मि दीघमन्तरे ॥६४६॥
मेत्तञ्च अभिजानामि अप्पमाणं सुभावितं
अनुपुब्बं परिचितं यथा बुद्धेन देसितं ॥६४७॥
सब्बमित्तो सब्बसखो सब्बभूतानुकम्पको
मेत्तं चिञ्च भावेमि अब्यापज्झरतो सदा ॥६४८॥
असंहीरससंकुप्पं चित्तं आमोदयामहं
ब्रह्मविहारं भावेमि अकापुरिससेवितं ॥६४९॥
अवितक्कं समापन्नो सम्मासम्बुद्धसावको
यरियेन तुण्हिभावेन उपेतो होति तावदे ॥६५०॥
यथापि पब्बतो सेलो अचलो सुप्पतिट्ठितो,
एवं मोहक्खया भिक्खु पब्बतोव न वेधति ॥६५१॥
अनङ्गणस्स पोसस्स निच्चं सुचिगवेसिनो
वालग्गमत्तं पापस्स अब्भामत्तं व खायति ॥६५२॥
नगरं यथा पच्चन्तं गुत्तं सन्तरवाहिरं
एवं गोपेथ अत्तानं खणे वे मा उपच्चगा ॥६५३॥
नाभिनन्दामि. । (=६०६, ६०७) ॥६५४-६५५॥
परिचिण्णो. (=६०४, ६०५) ॥६५६-६५७॥
सम्पादेत्थ पमादेन, एसा मे अनुसासनी;
हन्दाहं परिनिब्बिस्सं, विप्पमुत्तो'म्हि सब्बधीति ॥६५८॥

रेवतो थेरो

यथापि भद्दो आजञ्जो धुरे युत्तो धुरस्सहो
मथितो अतिभारेन संयुगं नातिवत्तति ॥६५९॥

एवं पञ्जाय ये तित्ता समुद्धो वारिना यथा
 न परे अतिमञ्जान्ति, यरियधम्मो'व पाणिनं ॥६६०॥
 काले कालवसम्पत्ता भवाभववसं गता
 नरा दुक्खं निगच्छन्ति ते'ध सोचन्ति माणवा ॥६६१॥
 उन्नता सुखधम्मेन दुक्खधम्मेन ओनता
 द्वयेन बाला हय्यन्ति यथाभूतं अदस्सिनो ॥६६२॥
 ये च दुक्खे सुखस्मिञ्च मज्झे सिब्बनिमज्झगू
 ठिता ते इन्दखीलो व, न ते उन्नतओनता ॥६६३॥
 न हेव लाभे नालाभे न यसे न च कित्तिया
 न निन्दायं पसंसाय न ते दुक्खं सुखम्हि च ॥६६४॥
 सब्बत्थ ते न लिप्पन्ति उदविन्दु व पोक्खरे,
 सब्बत्थ सुखिता वीरा सब्बत्थ अपराजिता ॥६६५॥
 धम्मेन च अलाभो यो यो च लाभो अधम्मिको
 अलाभो धम्मिको सेय्यो यञ्चे लाभो अधम्मिको ॥६६६॥
 यसो च अप्पबुद्धीनं विञ्जूनं अयसो च यो
 अयसो च सेय्यो विञ्जूनं न यसो अप्पबुद्धिनं ॥६६७॥
 दुम्मेधेहि पसंसा च विञ्जूहि गरहा च या
 गरहा'व सेय्यो विञ्जूहि यञ्चे बालप्पसंसना ॥६६८॥
 सुखञ्च काममयिकं दुक्खञ्च पविवेकियं
 पविवेकियं दुक्खं सेय्यो यञ्चे काममयं सुखं ॥६६९॥
 जीवितञ्च अधम्मेन धम्मेन मरणञ्च यं
 मरणं धम्मिकं सेय्यो यञ्च जीवे अधम्मिकं ॥६७०॥
 कामकोपपहीना ये सन्तचित्ता भवाभवे
 चरन्ति लोके असित्ता, नत्थि तेसं पियापियं ॥६७१॥
 भावयित्वान बोज्झङ्गो इन्द्रियाणि बलानि च
 पप्पुय्य परमं सन्ति परिनिब्बन्ति अनासवा'ति ६७२॥

गोदत्तो थेरो

उद्दानं

रेवतो चेव गोदत्तो थेरा ते महिद्धिका
 चुद्दसम्हि निपातम्हि, गाथायो अट्टवीसतीति
 चुद्दसनिपातो निद्धितो

सोळसनिपातो

एस भिय्यो पसीदामि सुत्वा धम्मं महारसं;
विरागो देसितो धम्मो अनुपादाय सब्बसो ॥६७३॥
बहूनि लोके चित्रानि अस्मि पुथु विमण्डले
मथेन्ति मज्जो सङ्ककप्पं सुभं रागूपसंहितं ॥६७४॥
रजमुपातं वातेन यथा मेघो पसामये ।
एवं सम्मन्ति संकप्पा यदा पज्जाय पस्सति ॥६७५॥
सब्बे संखारा अनिच्चा'ति यदा पज्जाय पस्सति ।
अथ निब्बिन्दति दुक्खे, एस मग्गो विसुद्धिया ॥६७६॥
सब्बे संखारा दुक्खा'ति—सब्बे धम्मा
अनत्ता'ति यदा पज्जाय पस्सति ।
अथ निब्बिन्दती दुक्खे, एस मग्गो विसुद्धिया ॥६७७-६७८॥
बुद्धानुबुद्धो यो थेरो कोण्डज्जो तिब्बनिक्खमो ।
पहीनजातिमरणो ब्रह्मचरियस्स केवली ॥६७९॥
ओघपासो दळ्हो खीलो पब्बतो दुप्पदालियो; ।
छेत्वा खीलञ्च पासञ्च सेलं छेत्वान दुब्बिदं
तिण्णो पारंगतो ज्ञायी मुत्तो सो मारबन्धना ॥६८०॥
उद्धतो चपलो भिक्खु मित्ते आगम्म पापके ।
संसीदति महोघस्मि उम्मिया पटिकुज्जितो ॥६८१॥
अनुद्धतो अचपलो निपको संवुतिन्द्रियो ।
कल्याणमित्तो मेधावी दुक्खस्सन्तकरो सिया ॥६८२॥
कालापब्बङ्ग संकासो. . . . (= २४३, २४४) ॥६८३-६८४॥
नाभिनन्दामि . . . (= ६०६, ६०७) ॥६८५-६८६॥
परिचिण्णो. (= ६०४) ॥६८७॥
यस्स चत्थाय पब्बजितो अगारस्मा अनगारियं, -
सो मे अत्थो अनुप्पत्तो, किं मे सन्दविहारेना'ति ॥६८८॥

अञ्जाकोण्डञ्जो थेरो

मनुस्सभूतं सम्बुद्धं अत्तदन्तं समाहितं
 इरियमानं ब्रह्मपथे चित्तस्सुपसमे रतं ॥६८९॥
 य मनुस्सा नमस्सन्ति सब्बधम्मान पारगुं
 देवापि तं नमस्सन्ति, इति मे अरहतो सुतं ॥६९०॥
 सब्बसंयोजनातीतं वना निब्बनमागतं
 कामेहि निक्खम्मरतं मुत्तसेला व कञ्चनं ॥६९१॥
 स वे अच्चन्त रुचो नागो हिमवावञ्जो सिलुच्चये,
 सब्बेसं नागनामानं सच्चनामो अनुत्तरोः ॥६९२॥
 नागं वो कित्तयिस्सामि, नहि आगुं करोति सो,
 सोरच्चं अविहिंसा च पादा नागस्स ते दुवे ॥६९३॥
 सति च सम्पजञ्जञ्च चरणा नागस्स ते परे
 सद्धाहत्यो महानागो, उपेक्खा सेतदन्तवा ॥६९४॥
 सति गीवा, सिरो पञ्जा, वीमंसा धम्मचिन्तना,
 धम्मकुच्छि समावासो, विवेको तस्स वालधि ॥६९५॥
 सो ज्ञायी अस्सासरतो अज्झत्तं सुसमाहितो,
 गच्छं समाहितो नागो, ठितो नागो समाहितो ॥६९६॥
 सयं समाहितो नागो, निसिन्नो पि समाहितो
 सब्बत्थ संवुतो नागो, एसा नागस्स सम्पदा ॥६९७॥
 भुञ्जति अनवज्जानि, सावज्जानि न भुञ्जति.
 घासं अच्छादनं लद्धा सन्निधिं परिवज्जयं, ॥६९८॥
 संयोजनं अणुं थूलं सब्बं छेत्वान बन्धनं,
 येन येनेव गच्छति अनपेक्खोव गच्छति ॥६९९॥
 यथापि उदके जातं पुण्डरीकं पवड्ढति,
 नोपलिप्पति तोयेन सुचिगन्धं मनोरमं ॥७००॥
 तथेव च लोके जातो बुद्धो लोके विहरति,
 नोपलिप्पति लोकेन तोयेन पदुमं यथा ॥७०१॥
 महाग्निं पज्जलितो अनाहारो पसम्मति
 अङ्गारेसु च सन्तेसु निब्बुतो'ति पवुच्चति ॥७०२॥
 अत्थस्सायं विञ्जापनी उपमा विञ्जूहि देसिता,
 विञ्जिअसन्ति महानागा नागं नागेन देसितं ॥७०३॥

वीतरागो वीतदोसो वीतमोहो अनासवो
स रीरं विजंह नागो परिनिब्बिस्सत्यनासवो'ति ॥७०४॥

उदायी थेरो

तत्रुद्दानं भवति

कोण्डञ्जो च उदायी च थेरा द्वेते महिद्धिका
सोळसम्हि निपातम्हि, गाथायो द्वे च तिस चा'ति

सोळसनिपातो निद्धितो

वीसतिनिपातो

यञ्जत्थं वा धनत्थं वा ये हनाम मयं पुरे
अवसेसं भयं होति, वेधन्ति विलपन्ति च ॥७०५॥
तस्स ते नत्थि भीत्ततं, भिय्यो वण्णो पसीदति;
कस्मा न परिदेवेसि एवरूपे महब्भये ॥७०६॥
नत्थि चेतसिकं दुक्खं अनपेक्खस्स गामणि,
अतिक्कन्ता भया सब्बे खीणं संयोजनस्स वे ॥७०७॥
खीणाय भवनेत्तिया दिट्ठे धम्मे यथातथे
न भयं मरणे होति भारनिक्खेपने यथा ॥७०८॥
सुचिण्णं ब्रह्मचरियं मे, मग्गो चापि सुभावितो,
मरणे मे भयं नत्थि रोगानमिव संखये ॥७०९॥
सुचिण्णं ब्रह्मचरियं मे मग्गो चापि सुभावितो,
निरस्सादा भवा दिट्ठा, विसं पित्वान छड्डितं ॥७१०॥
पारगू अनुपादानो कतकिच्चो अनासवो
तुट्ठो आयुक्खया होति मुत्तो आघातना यथा ॥७११॥
उत्तमं धम्मतो पत्तो सब्बलोके अनत्थिको
आदित्ता व घरा मुत्तो मरणास्मि न सोचति ॥७१२॥
यदत्थि संगतं कञ्चि भवो च यत्थ लब्भति,
सब्बं अनिस्सरं एतं, इति उत्तं महेसिना ॥७१३॥
यो तं तथा पजानाति यथा बुद्धेन देसितं,
न गण्हति भवं किञ्चि सुतत्तं व अयोगुळं ॥७१४॥
न मे होति अहोसिन्ति, भविस्सन्ति न होति मे,
संखारा विभविस्सन्ति : तत्थ का परिदेवना ॥७१५॥
सुद्धं धम्मसमुप्पादं सुद्धं संखारसन्ततिं
पस्सन्तस्स यथाभूतं न भयं होति गामणि ॥७१६॥

तिणकटुसमं लोकं यदा पञ्जाय पस्सति
 ममत्तं सो असंविन्दं नत्थि मेति न सोचति ॥७१७॥
 उक्कण्ठामि सरीरेन, भवेनमिह अत्थिको,
 सो'यं भिज्जिस्सति कायो अञ्जो च न भविस्सति ॥७१८॥
 यं वो किच्चं सरीरेन तं करोथ यदिच्छथ,
 न मे तप्पच्चया तत्थ दोसो पेमं च हेहिति ॥७१९॥
 तस्स तं वचनं सुत्वा अब्भुतं लोमहंसनं
 सत्थानि विक्खिपित्वान माणवा एतदब्रुवुं ॥७२०॥
 किं भद्दन्ते करित्वान, को वा आचारियो तव,
 किस्स सासनमागम्म लभते तं असोकता ॥७२१॥
 सब्बञ्जू सब्बदस्सावी जिनो आचरियो मम
 महाकारुणिको सत्था सब्बलोकतिकिच्छको ॥७२२॥
 तेनायं देसितो धम्मो खयगामी अनुत्तरो
 तस्स सासनमागम्म लभते तं असोकता ॥७२३॥
 सुत्वान चोरा इसिनो सुभासितं निक्खिप्प,
 सत्थानि च आवुधानि च
 तम्हा च कम्मा विरमंसु एके,
 एके च पब्बज्जमरोचयिंसु ॥७२४॥
 ते पब्बजित्वा सुगतस्स सासने
 भावेत्वा बोज्झङ्गवलानि पण्डिता
 उदग्गचित्ता सुमना कतिन्द्रिया फुंसिंसु,
 निब्बानपदं असंखतन्ति ॥७२५॥

अधिमुत्तो थेरो

समणस्स अहू चित्ता पारापरियस्स भिक्खुनो
 एककस्स निसिन्नस्स पविवित्तस्स ज्ञायिनो ॥७२६॥
 किमानुपुब्बं पुरिसो किं वतं किं समाचारं
 अत्तनो किच्चकारि 'स्स न च किञ्चि विहेठये ॥७२७॥
 इन्द्रियानि मनुस्सानं हिताय अहिताय च
 अरक्खितानि अहिताय रक्खितानि हिताय च ॥७२८॥
 इन्द्रियानेव सारक्खं इन्द्रियानि च गोपयं
 अत्तनो किच्चकारि'स्स न च किञ्चि विहेठये ॥७२९॥

चक्खुन्द्रियञ्चे रूपेसु गच्छन्तं अनिवारयं
 अनादीनवदस्सावी, सो दुक्खा न हि मुच्चति ॥७३०॥
 सोतिन्द्रियञ्च सद्देसु गच्छन्तं अनिवारयं
 अनादीनवदस्सावी, सो दुक्खा न हि मुच्चति ॥७३१॥
 अनिस्सरणदस्सावी गन्धे चे पटिसेवति,
 न सो मुच्चति दुक्खम्हा गन्धेसु अधिमुच्छितो ॥७३२॥
 अम्बिलमधुरगञ्च तित्तकगमनुस्सरं
 रसतण्हाय गधितो हृदयं नाव बुज्झति ॥७३३॥
 सुभान्यप्पटिकूलानि फोटुब्बानि अनुस्सरं
 रत्तो रागाधिकरणं विविधं विन्दते दुखं ॥७३४॥
 मनञ्चेतेहि धम्मेहि यो न सक्कोति रक्खितुं
 ततो नं दुक्खमन्वेति सब्बेहेतेहि पञ्चहि ॥७३५॥
 पुब्बलोहितसम्पुण्णं बहुस्स कुणपस्स च
 नरवीर कतं वग्गुं समुग्गमिव चित्तितं ॥७३६॥
 कटुकं मधुरस्सादं पिय निबन्धनं दुखं
 खुरं व मधुना लित्तं उल्लित्तं नाव बुज्झति ॥७३७॥
 इत्थिरूपे इत्थिरसे फोटुब्बे पि च इत्थिया
 इत्थिगन्धेसु सारत्तो विविधं विन्दते दुखं ॥७३८॥
 इत्थिसोतानि सब्बानि सन्दन्ति पञ्च पञ्चसु,
 तेसं आवरणं कातुं यो सक्कोति विरियवा, ॥७३९॥
 सो अत्थवा'सो धम्मट्ठो, सो दक्खो, सो विचक्खणो
 करेय्य रममानो हि किच्चं धम्मत्थसंहित ॥७४०॥
 अथो सीदति सञ्जुत्तं वज्जे किच्चं निरत्थकं,
 न तं किच्चन्ति मज्झित्वा अप्पमत्तो विचक्खणो ॥७४१॥
 यञ्च अत्थेन सञ्जुत्तं या च धम्मगता रति
 तं समादाय वत्तेथ, स हि वे उत्तमा रति ॥७४२॥
 उच्चावचे हुपाये हि परेसमभिजिगीसाति
 हत्वा वधित्वा अथ सोचयित्वा
 आलोपति साहसा यो परेसं ॥७४३॥
 तच्छन्तो आणिया आणि निहन्ति बलवा यथा
 इन्द्रियानि, न्द्रियेहेव निहन्ति कुसला तथा ॥७४४॥

सद्धं विरियं समाधिञ्च सतिपञ्जञ्च भावयं
पञ्च पञ्चहि हन्वान अनीघो याति ब्राह्मणे ॥७४५॥
सो अत्थवा सो धम्मट्ठो कत्वा वाक्यानुसासनिं
सब्बेन सब्बं बुद्धस्स, सो नरो सुखमेधतीति ॥७४६॥

पारापरियो थेरो

चिररत्तं वतातापी धम्मं अनुविचिन्तयं
समं चित्तस्स नालत्थं पुच्छं समणब्राह्मणे ॥७४७॥
को सो परंगतो लोके, को पत्तो अमतोगधं,
कस्स धम्मं पटिच्छामि परमत्थविजाननं ॥७४८॥
अन्तोवड्कगतो आसिं मच्छो व घसमामिसं,
बद्धो महिन्दपासेन वेपचित्यासुरो यथा ॥७४९॥
अञ्चामि न न मुञ्चामि अस्मा सोकपरिद्वा
को मे बन्धं मुञ्चं लोके सम्बोधिं वेदयिस्सति ॥७५०॥
समणं ब्राह्मणं वा कं आदिसन्तं पभङ्गुनं,
कस्स धम्मं पटिच्छामि जरामच्चुपवाहनं ॥७५१॥
विचिकिच्छाकड्खागथितं सारम्भबलसञ्जुतं
कोधप्पत्तमनत्थद्धं अभिजप्पपदारणं ॥७५२॥
तण्हाधनुसमुट्ठानं द्वे च पन्नरसायुतं
पस्स ओरसिकं बालं भेत्वान यदि ठति ॥७५३॥
अनुदिट्ठिनं अप्पहानं संकप्प सरतेजितं
तेन विद्धो पवेधामि पत्तं व मालुतेरितं ॥७५४॥
अज्झत्तं मे समुट्ठाय खिप्पं पच्चति मामकं,
छरुस्सायतनी कायो यत्थ सरति सब्बदा ॥७५५॥
तं न पस्सामि तेकिच्छं यो मे तं सल्लमुद्धरे
नाना रज्जेन सत्थेन नाञ्जेन विचिकिच्छितं ॥७५६॥
को मे असत्थो अवणो सल्लमब्भन्तरा पस्सयं
अहिंसं सब्बगत्तानि सल्लं मे उद्धरिस्सति ॥७५७॥
धम्मप्पति हि सो सेट्ठो विसदोसपवाहको
गम्भीरे पतितस्स मे थलं पाणिव दस्सये ॥७५८॥
रहदे'हं अस्मि ओगाळ्हो अहारियरजमन्तिके
माया उस्सुय्यसारम्भं थीनमिद्धमपत्थटे ॥७५९॥

उद्धच्चमेघथनितं संयोजनवलाहकं
 वाहा वहन्ति कुद्दिट्ठं संकप्पा रागनिस्सिता ॥७६०॥
 सवन्ति सब्बधी सोता, लता उब्भिज्ज तिट्ठति;
 ते सोते को निवारेय्य'तं ङ्गतं को हि छेच्छति ॥७६१॥
 वेलं करोथ भद्दन्ते सोतानं सन्निवारणं,
 मा ते मनोमयो सोतो रुक्खं व सहसा लुवे ॥७६२॥
 एवं मे भयजातस्स अपारापारमेसतो
 ताणो पञ्चवुधो सत्था इसिसंघनिसेवितो ॥७६३॥
 सोपानं सुकतं सुद्धं धम्मसारमयं दळ्हं
 पादासि वुय्हमानस्स माभायीति च मब्रवि ॥७६४॥
 सतिपट्टानपासादं आरुय्ह पच्चवेक्खिसं
 यन्तं पुब्बे अमाञ्जिस्सं सक्कायाभिरतं पजं ॥७६५॥
 यदा च मग्गमद्दक्खिं नावाय अभिरुहं
 अनधिट्ठाय अत्तानं तित्थमद्दक्खिमुत्तमं ॥७६६॥
 सल्लं अत्तसमुट्ठानं भवनेत्ति पभावितं
 एतेसं अप्पवत्ताय देसेसि मग्गमुत्तमं ॥७६७॥
 दीघरत्तानुसयितं चिररत्तपतिट्ठितं
 बुद्धो मे पानुदी गन्धं विसदोसपवाहनो'ति ॥७६८॥

तेलकानि थेरो

पस्स चित्तकतं बिम्बं अरुकायं समुस्सितं
 आतुरं बहुसंकप्पं, यस्स नत्थि धुवं ठिति ॥७६९॥
 पस्स चित्तकतं रूपं मणिना कुण्डलेन च
 अट्ठितचेन ओनद्धं सह वत्थेहि सोभति ॥७७०॥
 अलत्तककता पापा मुखं चुण्णकमक्खितं
 अलं बालस्स मोहाय नो च पारगवेसिनो ॥७७१॥
 अट्ठापदकता केसा, नेत्ता अञ्जन मक्खिता
 अलं बालस्स मोहाय नो च पारगवेसिनो ॥७७२॥
 अञ्जनी'व नवा चित्ता पूतिकायो अलंकतो
 अलं बालस्स मोहाय नो च पारगवेसिनो ॥७७३॥
 ओदहि मिगवो पासं, नासादा वाकुरं मिगो;
 भुत्वा निवापं गच्छाम कन्दन्ते मिगबन्धके ॥७७४॥

छिन्ना पासा मिगवस्स, नासादा वाकुरं मिगो,
 भुत्वा निवापं गच्छाम सोचन्ते मिगलुद्धके ॥७७५॥
 पस्सामि लोके सधने मनुस्से, लद्धान वित्तं न ददन्ति मोहा;
 लुद्धा धनं सन्निचयं करोन्ति भिय्यो च कामे अभिपत्थयन्ति ॥७७६॥
 राजा पसय्ह प्पत्थविं विजेत्वा
 ससागरन्तं महिमावसन्तो
 ओरं समुद्दस्स अतित्तरूपो पारं
 समुद्दस्स पि पत्थयेथ ॥७७७॥
 राजा च अञ्जे च बहू मनुस्सा
 अवीततण्हा मरणं उपेन्ति;
 ऊना व हुत्वान जहन्ति देहं,
 कामेहि लोकम्हि न हत्थि तित्ति ॥७७८॥
 कन्दन्ति नं जाति पकिरिय केसे
 अहो वता नो अमरा'ति चाहु;
 वत्थेन नं पारुतं नीहरित्वा
 चितं समोधाय ततो दहन्ति ॥७७९॥
 सो डय्हति सूलेहि तुज्जमानो एकेन वत्थेन पहाय भोगे;
 न मिय्यमानस्स भवन्ति ताणा जाती च मित्ता अथवा सहाया ॥७८०॥
 दायादका तस्स धनं हरन्ति,
 सत्तो पन गच्छति येन कम्मं;
 न मिय्यमानं धनमन्वेति किञ्चि पुत्ता
 च दारा च धनञ्च रट्ठं ॥७८१॥
 न दीघमायुं लभते धनेन
 न चापि वित्तेन जरं विहन्ति'
 अप्पञ्चि नं जीवितमाहु धीरा असस्सतं
 विप्परिणामधम्मं ॥७८२॥
 अद्धा दलिद्दा च फुसन्ति फस्सं,
 बालो च धीरो च तथेव फुट्ठो;
 बालो हि बाल्या वधितो व सेति,
 धीरो च न वेधति फस्सफुट्ठो ॥७८३॥
 तस्मा हि पञ्जांव धनेन सेय्यो याय
 वोसानं इधाधि गच्छति,

अव्योसितत्था हि भवाभवेसु पापानि
 कम्मानि करोन्ति मोहा ॥७८४॥
 उपेति गब्भञ्च पदञ्च लोकं संसारमापज्ज परम्पराय,
 तस्सप्पपञ्जो अभिसद्दहन्तो उपेति गब्भञ्च परञ्च लोकं ॥७८५॥
 चोरो यथा सन्धिमुखे गहीतो सकम्मुना हञ्जाति पापधम्मो,
 एवं पजा पेच्च परम्हि लोके सकम्मुना हञ्जाति पापधम्मो ॥७८६॥
 कामा हि चित्रा मधुरा मनोरमा
 विरूपरूपेन मथेन्ति चित्तं;
 आदीनवं कामगुणेषु दिस्वा तस्मा
 अहं पब्बजितो'म्हि राजा ॥७८७॥
 दुमप्फलानीव पतन्ति माणवा
 दहरा च वुड्ढा च सरीरभेदा;
 एतम्पि दिस्वा पब्बजितो'म्हि राजा
 अप्पण्णकं सामञ्जमेव सेय्यो ॥७८८॥
 सद्धायाहं पब्बजितो उपेतो जिनसासने,
 अवज्जा मय्हं पब्बजा, अनणो भुञ्जामि भोजनं ॥७८९॥
 कामे आदित्ततो दिस्वा जातरूपानि सत्थतो
 गब्भे ओक्कन्तितो दुक्खं निरपेसु महब्भयं: ॥७९०॥
 एतमादीनवं दिस्वा संवेगं अलभि तदा;
 सो'हं विद्धो तदा सन्तो सम्पत्तो आवसक्खयं ॥७९१॥
 परिचिण्णो. . . . (=६०४) ॥७९२॥
 यस्सत्थाय पब्बजितो. . . . (यस्स ६०५)
 सब्बसं योजनक्खयो'ति ॥७९३॥

रट्टपालो थेरो

रूपं दिस्वा सति मुट्ठा पियनिमित्तं मनसि करोतो;
 सीरत्तचित्तो वेदेति तञ्च अज्झोस तिट्ठति ॥७९४॥
 तस्स वड्ढन्ति वेदना अनेका रूपसम्भवा,
 अभिज्झा च विहेसा च चित्तमस्सूपहञ्जाति;
 एवमाचितो दुक्खं आरा निब्बान वुच्चति ॥७९५॥
 सद्दं सुत्वा सति मुट्ठा. . . . (७९४, ७९५;) ॥७९६-७९७॥
 गन्धं घत्वा. . . . (गन्ध सम्भवा ॥७९८-७९९॥

रसं भोत्वा. (रससम्भवा) ॥८००-८०१॥
 फस्सं फुस्स. (फस्ससम्भवा) ॥८०२-८०३॥
 धम्मं जत्वा. (धम्मसम्भवा) ॥८०४-८०५॥
 न सो रज्ज्जति रूपेसु; रूपं दिस्वा पतिस्सतो
 विरत्तचित्तो वेदेति तञ्च नज्झोस तिट्ठति ॥८०६॥
 यथास्स पस्सतो रूपं सेवतो वापि वेदनं
 खिय्यति नोपचिय्यति एवं सो चरती सतो;
 एवं अपचिनतो दुक्खं सन्तिके निब्बान वुच्चति ॥८०७॥
 न सो रज्ज्जति सद्देसु, सद्दं सुत्वा पतिस्सतो (.. . . . गन्धे.)
 सुगन्धं घत्वा. रसेसु रसं भोत्वा.
 फस्सेसु फस्सं फुस्स. धम्मेसु धम्मं जत्वा पतिस्सतो)
 विरत्त चित्तो वेदेति तञ्च नज्झोस तिट्ठति ॥८०८-८१०॥
 ८१२-८१४-८१६ ॥
 यथास्स सुणतो सद्दं (घायतो गन्धं, सायतो रसं, ।
 फुस्सतो फस्सं, विजानतो धम्मं)-
 सेवतो वापि वेदनं
 खिय्यति नोपचिय्यति एवं सो चरती सतो;
 एवं अपचिनतो दुक्खं सन्तिके निब्बान
 वुच्चति ॥८०९, ८११, ८१३, ८१५, ८१७॥

मालुक्यपुत्तो थेरो

परिपुण्णकायो सुरुचि सुजातो चारुदस्सनो
 सुवण्णवण्णो'सि भगवा, सुसुक्कदाटो'सि
 विरियवा ॥८१८॥
 नरस्स हि सुजातस्स ये भवन्ति वियज्जना
 सब्बे ते तव कायस्मि महापुरिसलक्खणा ॥८१९॥
 पसन्ननेत्तो सुमुखो ब्रह्मा उज्जु पतापवा
 मज्झे समणसंघस्स आदिच्चो व विरोचसि ॥८२०॥
 कल्याणदस्सनो भिक्खु कञ्चनसन्निभत्तचो
 किन्ते समणभावेन एवं उत्तमवणिणो ॥८२१॥
 राजा अरहसि भवितुं चक्कवत्ति रथेसभो
 चातुरन्तो विजितावी जम्बुसण्डस्स इस्सरो ॥८२२॥

खत्तिया भोजराजानो अनुयन्ता भवन्ति ते,
 राजाभिराजा मनुजिन्दो रज्जं कारेहि गोतम ॥८२३॥
 राजाहमस्मि सेला'ति भगवा धम्मराजा अनुत्तरो,
 धम्मेन चक्कं वत्तेमि चक्कं अप्पटिवत्तियं ॥८२४॥
 सम्बुद्धो पटिजानासि इति सेलो
 ब्रह्मणो धम्मराजा अनुत्तरो
 धम्मेन चक्कं वत्तेमि इति भाससि गोतम ॥८२५॥
 कोनु सेनापति भोतो सावको सत्थुरन्वयो,
 को इमं अनुवत्तेति धम्मचक्कं पवत्तितं ॥८२६॥
 मया पवत्तितं चक्कं सेला 'ति भगवा धम्मचक्कमनुत्तरं
 सारिपुत्तो'नुवत्तेति अनुजातो तथागतं ॥८२७॥
 अभिञ्जेयं अभिञ्जातं भावेतब्बञ्च भावितं,
 पहातब्बं पहीनं मे, तस्मा बुद्धो'स्मि ब्राह्मणं ॥८२८॥
 विनयस्सु मयी कड्ढं, अधिमुच्चस्सु ब्राह्मण
 दुल्लभं दस्सनं होति सम्बुद्धानं अभिण्हसो ॥८२९॥
 येसं वे दुल्लभो लोके पातुभावो अभिण्हसो,
 सो'हं ब्राह्मण बुद्धो'स्मि सल्लकत्तो अनुत्तरो ॥८३०॥
 ब्रह्मभूतो अतितुलो मारसेनप्पमद्दो
 सब्बामित्ते वसीकत्वा मोदामि अकुतोभयो ॥८३१॥
 इदं भोन्तो निसामेथ यथा भासति चक्खुमा
 सल्लकत्तो महावीरो, सीहो व नदती वने ॥८३२॥
 ब्रह्मभूतं अतितुलं मारसेनप्पमद्दं
 को दिस्वा न प्पसीदेय्य अपि कण्हाभिजातिको ॥८३३॥
 ये मं इच्छति अन्वेतु, यो वा निच्छति गच्छतुः
 इधाहं पब्बजिस्सामि वरपञ्जस्स सन्तिके ॥८३४॥
 एतञ्चे रुच्चति भोतो सम्मासम्बुद्धसासनं
 मयम्पि पब्बजिस्साम वरपञ्जस्स सन्तिके ॥८३५॥
 ब्राह्मणा तिसता इमे याचन्ति पञ्जलीकता
 ब्रह्मचरियं चरिस्साम भगवा तव सन्तिके ॥८३६॥
 स्वाखातं ब्रह्मचरियं सेला'ति भगवा सन्दिट्टिकमकालिकं
 यथा अमोघा पब्बज्जा अप्पमत्तस्स सिक्खतो ॥८३७॥

यन्तं सरणमागम्म इतो अट्ठमि चक्खुमा,
 सत्तरत्तेन भगवा दन्तम्हा तव सासने ॥८३८॥
 तुवं बुद्धो, तुवं सत्था, तुवं माराभिभू मुनि,
 तुवं अनुसये छेत्वा तिण्णो तारेसि मं पजं ॥८३९॥
 उपधी ते समतिक्कन्ता, आसवा ते पदालिता,
 सीहो व अनुपदानो पहीनभयभेरवो ॥८४०॥
 भिक्खवो तिसता इमे तिट्ठन्ति पञ्जलीकता !
 पादे वीर पसारेहि, नागा बन्धन्तु सत्थुनो'ति ॥८४१॥

सेलो थेरो

या तं मे हत्थिगीवाय सुखुमा वत्था पधारिता,
 सीलीनं ओदनो भुत्तो सुचिममूपसेचनो ॥८४२॥
 सो'ज्ज भद्दो साततिको उञ्छापत्ता गतेरतो
 ज्ञायति अनुपादानो पुत्तो गोधाय भद्दियो ॥८४३॥
 पंसुकूली साततिको उञ्छापत्तागते रतो
 ज्ञीयति अनुपादानो पुत्तो गोधाय भद्दियो ॥८४४॥
 पिण्डपाती साततिको—प—तेचीवरी साततिको—प
 सपदानचारी—प—एकासनी—प—पत्तपिण्डी
 —प—खलुपच्छाभत्ती—प—आरज्जिको
 —प—रुक्खमूलिको—प—अब्भोकासी
 —प—सोसानिको—प—यथासन्थतिको
 —प—नेसज्जिको—प—अप्पिच्छो—प—
 सन्तुट्ठो—प—पविवित्तो—प—असंसट्ठो
 —प—आरद्धविरियो साततिको—प—॥८४५—८६१॥
 हित्वा सतपस्सं कंसं सोवण्णं सतराजिकं
 अग्गहिं मत्तिकापत्तं, इदं दुतियाभिसेचनं ॥८६२॥
 उच्चै मण्डलिपाकारे दळ्हमट्ठालकोट्ट के
 रक्खितो खग्गहत्थेहि उत्तसं विहरिं पुरे ॥८६३॥
 सो'ज्ज भद्दो अनुत्रासी पहीनभयभेरवो
 ज्ञायति वनमोगय्ह पुत्तो गोधाय भद्दियो ॥८६४॥
 सीलक्खन्धे पत्तिट्ठाय सति पञ्जञ्च भावय
 पापुणिं अनुपुब्बेन सब्बसंयोजनक्खयन्ति ॥८६५॥
 भद्दियो काळिगोधाय पुत्तो

गच्छं वदेसि समण ठितो 'मिह ममञ्च
 ब्रूसि ठितमट्ठितो'ति
 पुच्छामि तं समण एतमत्थं: कस्मा ठितो त्वं अहमट्ठितो'मिह ॥८६६॥
 ठितो अहं अङ्गुलिमाल सब्बदा सब्बेसु भूतेसु निधाय दण्डं
 त्वञ्च पाणेसु असञ्जतो'सि तस्मा ठितो'हं तुवमट्ठितो'सि ॥८६७॥
 चिरस्सं वत मे महितो महेसि महावनं समणो पच्चुपादि;
 सो'मं चजिस्सामि सहस्सपापं सुत्वान गाथं तव धम्मयुत्तं ॥८६८॥
 इत्वेव चोरो असिमावुधञ्च सोब्भे पपाते नरके अन्वकासि,
 अवन्दि चोरो सुगतस्स पादे तत्थेव पब्बज्जिमयाचि बुद्धं ॥८६९॥
 बुद्धो च खो कारुणिको महेसिओ
 सत्था लोकस्स सदेवकस्स
 तमेहि भिक्खू'ति तदा अवोच, एसेव तस्स अहु भिक्खुभावो ॥८७०॥
 यो पुब्बे पमज्जित्वान पच्छा सो न प्पमज्जति,
 सो'हं लोकं पभासेति अब्भा मुत्तो व चन्दिमा ॥८७१॥
 यस्स पापं कतं कम्मं कुसलेन पिथीयति,
 सो'हं लोकं पभासेति अब्भा मुत्तो व चन्दिमा ॥८७२॥
 यो हवे दहरो भिक्खु युञ्जती बुद्धसासने,
 सो'हं लोकं पभासेति अब्भा मुत्तो व चन्दिमा ॥८७३॥
 दिसा हि मे धम्मकथं सुणन्तु, दिसा हि मे युञ्जन्तु बुद्धसासने
 दिसा हि मे ते मनुस्से भजन्तु ये धम्ममेवादपयन्ति सन्तो ॥८७४॥
 दिसा हि मे खन्तिवादानं अविरोधप्पसंसनं
 सुणन्तु धम्मं कालेन तञ्च अनुविधीयन्तु ॥८७५॥
 न हि जातु सो ममं हिंसे अञ्जं वा पन कञ्चिनं,
 पप्पुय्य परमं सन्ति रक्खेय्य तसथावरे ॥८७६॥
 उदकं हि नयन्ति नेत्तिका, उसुकारा नमयन्ति तेजनं,
 दारुं नमयन्ति तच्छका, अत्तानं दमयन्ति पण्डिता ॥८७७॥
 दण्डेनेके दमयन्ति अङ्कुसेहि कसाहि च;
 अदण्डेन असत्थेन अहं दन्तो'मिह तादिना ॥८७८॥
 अहिंसको'ति मे नामं हिंसकस्स पुरे सतो
 अज्जाहं सच्चनामो'मिह न नं हिंसामि कञ्चिनं ॥८७९॥

चोरो अहं पुरे आसिं अङ्गुलिमालो 'ति विस्सुतो;
 उय्हमानो महोघेन बुद्धं सरणमागम ॥८८०॥
 लोहितपाणि पुरे आसिं अङ्गुलिमालो'ति विस्सुतो;
 सरणागमनं पस्स; भवनेत्ति समूहता ॥८८१॥
 तादिसं कम्मं कत्वान बहुं दुग्गतिगामिनं
 फुट्ठो कम्मविपाकेन अनणो भुञ्जामि भोजनं ॥८८२॥
 पमादमनयुञ्जन्ति बाला दुम्मेधिनो जना,
 अप्पमादञ्च मेधावी धनं सेट्ठं व रक्खति ॥८८३॥
 मा पमादमनयुञ्जेथ मा कामरतिसन्थवं,
 अप्पमत्तो हि ज्ञायन्तो पप्पोति परमं सुखं ॥८८४॥
 स्वागतं नापगतं नेतं दुम्मन्तितं मम;
 सम्बिभत्तेसु धम्मेसु यं सेट्ठं तदुपागमं ॥८८५॥
 स्वागतं नापगतं नेतं दुम्मन्तितं मम;
 तिस्सो विज्जा अनुप्पत्ता कतं बुद्धस्स सासनं ॥८८६॥
 अरञ्जो रुक्खमूले वा पब्बतेसु गुहासु वा
 तत्थ तत्थेव अट्ठासिं उब्बिग्गमनसो तदा ॥८८७॥
 सुखं सयामि ठायामि सुखं कप्पेमि जीवितं
 अहत्थपासो मारस्स; अहो सत्थानुकम्पितो ॥८८८॥
 ब्रह्माजच्चो पुरे आसिं, उदिच्चो उभतो अहुं,
 सो'ज्ज पुत्तो सुगतस्स धम्मराजस्स सत्थुनो ॥८८९॥
 वीततण्हो अनादानो गुत्तद्वारो सुसंवुतो;
 अघमूलं वमित्वान पत्तो मे आसवक्खयो ॥८९०॥
 परिचिण्णो मया सत्था, कतं बुद्धस्स सासनं,
 ओहितो गरुको भारो, भवनेत्ति समूहता'ति ॥८९१॥

अङ्गुलिमालो थेरो

पहाय माता पितरो भगिनीजातिभातरो
 पञ्च कामगुणे हित्वा अनुरुद्धो'व ज्ञायति ॥८९२॥
 समेतो नच्चगीतेहि सम्मताळप्पबोधनो
 न तेन सुद्धिमज्झगमा मारस्स विसये रतो ॥८९३॥
 एतञ्च समतिकम्म रतो बुद्धस्स सासनं
 सब्बोधं समतिकम्म अनुरुद्धो'व ज्ञायति ॥८९४॥

रूपा सदा रसा गन्धा फोटुब्बा च मनोरमा
 एते च समतिक्कम्म अनुरुद्धो'व ज्ञायति ॥८९५॥
 पिण्डपातपटिक्कन्तो एको अदुतियो मुनि
 एसति पंसुकूलानि अनुरुद्धो अनासवो ॥८९६॥
 विचिनि अग्गही धोवि रजयी धारयी मुनि
 पंसुकूलानि मतिमा अनुरुद्धो अनासवो ॥८९७॥
 महिच्छो च असन्तुट्ठो संसट्ठो यो च उद्धतो,
 तस्स धम्मा इमे होन्ति पापका संकिलेसिका ॥८९८॥
 सतो च होति अप्पिच्छो सन्तुट्ठो अविघातवा
 पविवेकरतो वित्तो निच्चमारद्धवीरियो ॥८९९॥
 तस्स धम्मा इमे होन्ति कुसला बोधियपक्खिका
 अनासवो च सो होति, इति वुत्तं महेसिना ॥९००॥
 मम संकप्पमञ्जाय सत्था लोके अनुत्तरे
 मनोमयेन कायेन इद्धिया उपसंकमि ॥९०१॥
 यदा मे अहु संकप्पो ततो उत्तरि देसयि,
 निप्पपञ्चरतो बुद्धो निप्पपञ्चमदेसयि ॥९०२॥
 तस्साहं धम्ममञ्जाय विहासिं सासने रतो;
 तिस्सो विज्जा अनुप्पत्ता कतं बुद्धस्स सासनं ॥९०३॥
 पञ्चपञ्जासवस्सानि यतो नेसज्जिको अहं,
 पञ्च वीसति वस्सानि यतो मिद्धं समूहतं ॥९०४॥
 नाहु अस्सासपस्सासो ठितचित्तस्स तादिनो;
 अनेजो सन्तिमारब्भ चक्खुमा परिनिब्बुतो ॥९०५॥
 असल्लीनेन चित्तेन वेदनं अज्झवासयि;
 पज्जोतस्सेव निब्बानं विमोक्खो चेतसो अहू ॥९०६॥
 एते पच्छिमका दानि मुनिनो फस्सपञ्चमा
 नाञ्जे धम्मा भविस्सन्ति सम्बुद्धे परिनिब्बुते ॥९०७॥
 नत्थि दानि पुनावासो देवकायस्मि जालिनि;
 विक्खीणो जातिसंसारो, नत्थि दानि पुनब्भवो ॥९०८॥
 यस्स मुहुत्ते सहस्सदा लोको संविदितो, स ब्रह्मकप्पो
 वसि इद्धिगुणे चुतूपपाते काले पस्सति देवता स भिक्खु ॥९०९॥
 अन्नभारो पुरे आसिं दळ्ढिदो घासहारको,
 समणं पटिपादेसिं उपरिट्ठं यसस्सिनं ॥९१०॥

सो'म्हि सकयकुले जातो अनुरुद्धो'ति मं विद्,
 अपेतो नच्चगीतेहि सम्मताळप्पबोधनो ॥९११॥
 अथहसासि सम्बुद्धं सत्थारं अकुतोभयं,
 तस्मिं चित्तं पसादेत्वा पब्बजिं अनगारियं ॥९१२॥
 पुब्बेनिवासं जानामि यत्थ मे उसितं पुरे,
 तावतिंसेसु देवेसु अट्ठासि सक्कजातिया ॥९१३॥
 सत्तक्खत्तुं मनुस्सिन्दो अहं रज्जमकारयिं
 चातुरन्तो विजितावी जम्बुसण्डस्स इस्सरो,
 अदण्डेन असत्थेन धम्मेन अनुसासयिं ॥९१४॥
 इतो सत्त इतो सत्त संसारानि चतुइस
 निवासमभिजानिस्सं देवल्लोके ठितो तदा ॥९१५॥
 पञ्चङ्गिके समाधिम्हि सन्ते एकोदिभाविते
 पटिप्पस्सद्विलद्धम्हि, दिब्बचक्खूँ विसुज्झि मे ॥९१६॥
 चुत्तूपपातं जानामि सत्तानं आगतिं गतिं
 इत्थभावञ्जया भावं ज्ञाने पञ्चङ्गिके ठितो ॥९१७॥
 परिचिण्णो मया सत्था—प—समूहता ॥९१८॥
 वज्जीनं वेळुवगामे अहं जीवितसंख्या
 हेट्ठतो वेळुगुम्बस्मिं निब्बायिस्सं अनासवो'ति ॥९२०॥

अनिरुद्धो थेरो

समणस्स अहु चिन्ता पुप्फितम्हि महावनं
 एकग्गस्स निसिन्नस्स पविवित्तस्स ज्ञायिनोः
 अञ्जया लोकनाथम्हि तिट्ठन्ते पुरिसुत्तमे
 इरियं आसि भिक्खूनं, अञ्जया दानि दिस्सते ॥९२१॥
 सीतवातपरित्तानं हिरिकोपीनछादनं,
 मत्तद्वियं अभुज्जिंसु सन्तुट्ठा इतरीतरे ॥९२२॥
 पणीतं यदि वा लूखं अप्पं वा यदि वा बहुं
 यापनत्थं अभुज्जिंसु अगिद्धा नाधिमुच्छिता ॥९२३॥
 जीवितानं परिकखारे भेसज्जे अथ पच्चये
 न वाळ्हं उस्सुका आसुं यथा ते आसवक्खये ॥९२४॥
 अरज्जे खक्खमूलेसु कन्दरासु गुहासु च
 विवेकमनुब्रूहन्ता विहिंस्सु तप्परायना ॥९२५॥

नीचनिविट्ठा सुभरा मुद्द अत्थद्धमानसा
 अव्यासेका अमुखरा अत्थचिन्तावसानुगा ॥९२६॥
 ततो पासादिकं आसि गतं भुत्तं निसेवितं
 सिनिद्धा तेलधारा व अहोसि इरियापथो ॥९२७॥
 सब्बासवपरिक्खीणा महाज्ञायी महाहिता
 निब्बुता दानि ते थेरा, परित्ता दानि तादिसा ॥९२८॥
 कुसलानञ्च धम्मानं पञ्जाय च परिक्खया
 सब्बाकारवरूपेतं लुज्जते जिनसासनं ॥९२९॥
 पापकानञ्च धम्मानं किलेसानञ्चयो उतु
 उपट्ठिताविवेकाय ये च सद्धम्मसेसका ॥९३०॥
 ते किलेसा पवड्ढन्ता आविसन्ति बह्वं जनं,
 कीळन्ति मञ्जे बालेहि उम्मत्तेहि व रक्खसा ॥९३१॥
 किलेसेहाभिभूता ते तेन तेन विधाविता
 नरा किलेसवत्थुसु सयंगगाहे व घोसिते ॥९३२॥
 परिच्चजित्वा सद्धम्मं अञ्जमञ्जोहि भण्डरे,
 दिट्ठिगतानि अन्वेन्ता इदं सेय्यो'ति मञ्जरे ॥९३३॥
 घनञ्च पुत्तं भरियञ्च छड्डुयित्वान निगता
 कटच्छुभिक्षहेतु पि अकिच्चानि निसेवरे ॥९३४॥
 उदरावदेहकं भुत्वा सयन्ततुत्तानसेय्यका,
 कथा वदेन्ति पटिबुद्धा या कथा सत्थु गरहिता ॥९३५॥
 सब्बकारुक सिप्पानि चित्ति कत्वान सिक्खरे,
 अवूपसन्ता अज्झत्तं सामञ्जस्यो'ति अच्छति ॥९३६॥
 मत्तिकं तेलं चुण्णञ्च उदकासनभोजनं
 गिहीनं उपनामेन्ति आकड्ढन्ता बहुत्तरं ॥९३७॥
 दन्तपोणं कपिट्टञ्च पुप्फखादनियानि च
 पिण्डपाते च सम्पन्ने अम्बे आमलकानि च ॥९३८॥
 वेसज्जेसु यथा वेज्जा, किच्चाकिच्चे यथा गिही,
 गणिका व विभूसायं, इस्सरे खत्तिया यथा ॥९३९॥
 नेकतिका वञ्चनिका कूटसक्खी अवाटुका
 बहूहि परिकप्पेहि आमिसं परिभुञ्जरे ॥९४०॥
 लेस कप्पे परियाये परिकप्पे'नुधाविता
 जीविकत्था उपायेन संकड्ढन्ति बह्वं धनं ॥९४१॥

उपट्टपेन्ति परिसं कम्मतो नो च धम्मतो,
 धम्मं परेसं देसेन्ति लाभतो नो च अत्थतो ॥९४२॥
 संघलाभस्स भण्डन्ति संघतो परिवाहिरा,
 परलाभोपजीवन्ता अहिरिका'व न लज्जरे ॥९४३॥
 नानुयुत्ता तथा एके मुण्डा संघाटिपास्ता
 सम्भावनं ये विच्छन्ति लाभसक्कारमुच्छिता ॥९४४॥
 एवं नानप्पयातम्हि नि दानि सुकरं तथा
 अफुसितं वा फुसितुं फुसितं वानुरविखतुं ॥९४५॥
 यथा कण्टकट्टानम्हि चरेय्य अनुपाहनो
 सति उपट्टपेत्वान, एवं गामे मुनी चरे ॥९४६॥
 सरित्वा पुब्बके योगी तेसं वत्तमनुस्सरं
 किञ्चापि पच्छिमो कालो फुसेय्य अमतं पदं ॥९४७॥
 इदं वत्वा सालवने समणो भावितिन्द्रियो ॥९४८॥
 ब्राह्मणो परिनिब्बायि इसि खीणपुनब्भवो'ति

पारापरियो थेरो

उद्दानं

अधिमुत्तो पारापरियो तेलकानि रट्टपालो
 मालुङ्कय सेलो भदियो अड्गुलि दिब्बचक्खुको
 पारापरियो दसेते विसम्हि सुपरिकित्तिता,
 गाथायो द्वेसता होन्ति पञ्चतालीस उत्तरिन्ति

वीसतिनिपातो निट्ठतो

तिसनिपातो

पासादिके बहू दिस्वा भावितत्ते सुसंवृते
इसि पण्डरसोगोत्तो अपुच्छि फुस्ससव्हयं ॥९४९॥
किंछन्दा किमधिप्पाय किमाकप्पा भविस्सरे
अनागतमिह कालमिह तं मे अक्खाहि पुच्छितो ॥९५०॥
सुणोहि वचनं मय्हं इसि पण्डरसव्हयं,
सक्कच्चं उपधारेहि, आचिक्खिस्साम्यनागतं ॥९५१॥
कोधना उपनाही च मक्खी थम्भी सठा बहू
इस्सुकी नानावादा च भविस्सन्ति अनागते ॥९५२॥
अञ्जातमानिनो धम्मे गम्भीरे तीरगोचरा
लहुका अगरु धम्मे अञ्जमञ्जमगारवा ॥९५३॥
बाहू आदीनवा लोके उप्पज्जिस्सन्ति' नागते;
सुदेसितं इमं धम्मं किलिस्सिस्सन्ति दुम्मती ॥९५४॥
गुणहीनापि संघमिह वोहरन्ति विसारदा
वलवन्तो भविस्सन्ति मुखरा अस्सुताविनो ॥९५५॥
गुणवन्तो पि संघमिह ओरहरन्ता यथत्थतो
दुब्बला ते भविस्सन्ति हिरिमना अनत्थिका ॥९५६॥
रजतं जातरूपञ्च खेत्तं वथुं अजेळकं
दासीदासञ्च दुम्मेधा सादियिस्सन्ति' नागते ॥९५७॥
उज्झानसज्जिनो बाला सीलेसु असमाहिता
उन्नळा विचरिस्सन्ति कलहाभिरता मगा ॥९५८॥
उद्धता च भविस्सन्ति नीलचीवरपारुता;
कुहा थद्धा लपा सिङ्गी चरिस्सन्त्यरिया विय ॥९५९॥
तेलसंहेहि केसेहि चपला अञ्जनक्खिका
रथियाय गम्मिस्सन्ति दन्तवण्णकपारुता ॥९६०॥

अजेगुच्छं विमुत्तेहि सुरत्तं अरहद्वजं
 जिगुच्छिस्सन्ति कासावं ओदातेमु समुच्छिता ॥९६१॥
 लाभकामा भविस्सन्ति कुसीता हीनवीरिया,
 किच्छन्ता वनपत्तानि गामन्तेसु वसिस्सरे ॥९६२॥
 ये ये लाभं लभिस्सन्ति मिच्छाजीवरता सदा,
 ते ते च अनुसिक्खन्ता भजिस्सन्ति असंयता ॥९६३॥
 ये ये अलाभिनो लाभं, न ते पुज्जा भविस्सरे,
 सुपेसले पि ते धीरे सेविस्सन्ति न ते तदा ॥९६४॥
 मिलक्खुरजनं रत्तं गरहन्ता सकं धजं
 तित्थियानं धजं केचि धारेसन्त्यवदातकं ॥९६५॥
 अगारवो च कासावे तदा तेसं भविस्सति
 पटिसंखा च कासावे भिक्खूनं न भविस्सति ॥९६६॥
 अभिभूतस्स दुक्खेन सल्लविद्धस्स रुप्पतो
 पटिसंखा महाघोरा नागस्सासि अचिन्तिया ॥९६७॥
 छद्दन्तो हि तदा दिस्वा सुरत्तं अरहद्वजं
 तावदेव भणी गाथा गजो अत्थोपसंहिता ॥९६८॥
 अनिक्कसावो कासावं यो वत्थं परिदहिस्सति
 अपेतो दमसच्चेन, न सो कासावमरहति ॥९६९॥
 यो च व्वन्तकसावस्स सीलेसु सुसमाहितो
 उपेतो दमसच्चेन, स वे कासावमरहति ॥९७०॥
 विपन्नसीलो दुम्मेघो पाकटो कामकारियो
 विब्भन्तचित्तो निस्सुक्को, न सो कासावमरहति ॥९७१॥
 यो च सीलेन सम्पन्नो वीतरागो समाहितो
 ओदातमनसंकप्पो स वे कासावमरहति ॥९७२॥
 उद्धतो उन्नद्धो बालो सीलं यस्स न विज्जति,
 ओदातकं अरहति, कासावं किं करिस्सति ॥९७३॥
 भिक्खू च भिक्खुनियो च दुट्ठचित्ता अनादरा
 तादीनं मेत्तचित्तानं निग्गण्हिस्सन्ति'नागते ॥९७४॥
 सिक्खापेन्तापि थेरेहि बाला चीवरधारणं
 न सुणिस्सन्ति दुम्मेघा पाकटा कामकारिया ॥९७५॥
 ते तथा सिक्खिता बाला अज्जमज्जं अगारवा
 नादियिस्सन्तुपज्जाये खलुङ्को विय सारथि ॥९७६॥

एवं अनागतद्वानं पटिपत्ति भविस्सति
 भिक्खूनं भिक्खुनीनञ्च पत्ते कालम्हि पच्छिमे ॥९७७॥
 पुरा आगच्छते एतं अनागतं महब्भयं
 सुब्बचा होथ सखिला अञ्जमञ्जं सगारवा ॥९७८॥
 मेत्तचित्ता कारुणिका होथ सीले सुसंवुता
 आरद्धविरिया पहितत्ता निच्चं दाळ्हपरक्कमा ॥९७९॥
 पमादं भयतो दिस्वा अप्पमादञ्च खेमतो
 भावेथदु डिग्गकं मग्गं फुस्सन्ति अमतं पद'न्ति ॥९८०॥

फुस्सत्थेरो

यथाचारी यथासतो सतिमा यथा
 संकप्प चरियाय अप्पमत्तो
 अज्झत्तरतो सुसमाहितत्तो एको सन्तुसितो,
 तमाहु भिक्खुं ॥९८१॥
 अल्लं सुक्खंञ्च भुञ्जन्तो न वाळ्ह सुहितो सिया,
 उनूदरो मिताहारो सतो भिक्खु परिब्बजे ॥९८२॥
 चत्तारो पञ्च आलोपे अभुत्वा उदकं पिवे,
 अलं फासुविहाराय पहितत्तस्स भिक्खुनो ॥९८३॥
 कप्पियतञ्च आदेति चीवरं इदमत्थिकं,
 अलं फासुविहाराय पहितत्तस्स भिक्खुनो ॥९८४॥
 पल्लङ्केन निसिन्नस्स जण्णुके नाभिवस्सति,
 अलं. ॥९८५॥
 यो सुखं दुक्खतो अह, दुक्खं अहक्खि सल्लतो,
 उभयन्तरेण नाहोसि, केन लोकस्मि किं सिया ॥९८६॥
 मा मे कदाचि पापिच्छो कुसीतो हीनवीरियो
 अप्पस्सुतो अनादरो, केन लोकस्मि किं सिया ॥९८७॥
 बहुस्सुतो च मेधावी सीलेसु सुसमाहितो
 चेतो समथमनुयुत्तो अपि मुद्धनि तिद्धतु ॥९८८॥
 यो पपञ्चमनुयुत्तो पपञ्चाभिरतो मगो,
 विराधयी च सो निब्बानं योगक्खेमं अनुत्तरं ॥९८९॥
 यो च पपञ्च हित्वान निप्पपञ्चपथे रतो,
 आराधयी सो निब्बानं योगक्खेमं अनुत्तरं ॥९९०॥

गामे वा यदि वा'रञ्जो निन्ने वा यदि वा थले,
 यत्थ अरहन्तो विहरन्ति तं भूमिं रामणेय्यकं ॥९९१॥
 रमणीया अरञ्जानि, यत्थ न रमती जनो,
 वीतरागा रमिस्सन्ति न ते कामगवेसिनो ॥९९२॥
 निघ्दीनं व पवत्तारं यं पस्से वज्जदस्सिनं
 निग्गय्हवादिं मेधाविं, तादिसं पण्डितं भजे;
 तादिसं भजमानस्स सेय्यो होति न पापियो ॥९९३॥
 ओवदेय्यानुसासेय्य असब्भा च निवारये,
 सतं हि सो पियो होति असतं होति अप्पियो ॥९९४॥
 अञ्जस्स भगवा बुद्धो धम्मं देसेसि चक्खुमा;
 धम्मे देसियमानमिह सोतमोधेत्तिमत्थिको ॥९९५॥
 तम्मे अमोधं सवनं, विमुत्तो'मिह अनासवो
 नेव पुब्बेनिवासाय न पि दिब्बस्स चक्खुनो ॥९९६॥
 चेतोपरियायइद्धिया चुतिया उपपत्तिया
 सोतघातुविसुद्धिया पणिधि मे न विज्जति ॥९९७॥
 रुक्खमूलं व निस्साय मुण्डो संघाटिपाहतो
 पञ्जाय उत्तमो थेरो उपतिस्सो'व ज्ञायति ॥९९८॥
 अवितक्कं समापन्नो सम्मासम्बुद्धसावको
 अरियेन तुण्हिभावेन उपेतो होति तावदे ॥९९९॥
 यथापि पब्बतो सेलो अचलो सुपतिट्ठितो,
 एवं मोहक्खया भिक्खु पब्बतोव न वेधति ॥१०००॥
 अनङ्गणस्स पोसस्स निच्चं सुचिगवेसिनो
 वालग्गमत्तं पापस्स अब्भामत्तं व खायति ॥१००१॥
 नाभिनन्दामि मरणं नाभिनन्दामि जीवितं,
 निक्खिपिस्सं इमं कायं सम्पजानो पतिस्सतो ॥१००२॥
 —प—निब्बिसं भतको यथा ॥१००३॥
 उभयेन मिदं मरणं एव नामरणं पच्छा वा पुरे वा;
 पटिपज्जथ मा विनस्सथ, खणो वे मा उपच्चगा ॥१००४॥
 नगरं यथा पच्चन्तं गुत्तं सन्तरबहिरं
 एवं गोपेथ अत्तानं, खणो वे मा उपच्चगा,
 खणातीता हि सोचन्ति नरयमिह समप्पिता ॥१००५॥

उपसन्तो उपरतो मन्तभाणी अनुद्धतो
 धुनाति पापके धम्मे दुमपत्तं व मालुतो ॥१००६॥
 उपसन्तो—प—
 अब्बहि पापके धम्मे दुमपत्तं व मालुतो ॥१००७॥
 उपसन्तो अनायासो विप्पसन्नमनाविलो
 कल्याणसीलो मेधावी दुक्खस्सन्तकरो सिया ॥१००८॥
 न विस्ससे एकतियेसु एवं अगारिसु पब्बजितेसु चापि;
 साधु पि हुत्वान असाधु होन्ति,
 असाधु हुत्वा पुन साधु होन्ति ॥१००९॥
 कामच्छन्दो च व्यापादो थीनमिद्धञ्च भिक्खुनो
 उद्धच्चं विचिकिच्छा च पञ्च ते चित्तकेलिसा ॥१०१०॥
 यस्स सक्करियमानस्स असक्कारेन चूभयं
 समाधि न विकम्पति अप्पमादविहारितो ॥१०११॥
 तं ज्ञायिनं साततिकं सुखुमदिट्ठिविपस्सकं
 उपादानक्खयारामं आहू सप्पुरिसो इति ॥१०१२॥
 महासमुद्दो पथवी पब्बतो अनिलो पि च
 उपमाय न युज्जन्ति सत्थु वरविमुत्तिया ॥१०१३॥
 चक्कानुवत्तको थेरो महाज्जाणी समाहितो
 पथवापग्गि समानो न रज्जति न दुस्सति ॥१०१४॥
 पञ्जापारमितं पत्तो महाबुद्धि महामुनि
 अजळो जळसमानो सदा चरति निब्बुतो ॥१०१५॥
 परिचिण्णो मया सत्था —प— ॥१०१६॥
 सम्पादेथप्पमादेन, एसा मे अनुसासनी;
 हन्दाहं परिनिब्बिस्सं, विप्पमुत्तो'म्हि सब्बधीति ॥१०१७॥

सारिपुत्तो थेरो

पिसुनेन च कोधनेन मच्छरिना च विभूतिनन्दिना
 सखितं न करेय्य पण्डितो; पापो कापुरिसेन संगमो ॥१०१८॥
 सद्धेन च पेसलेन च पञ्जवता बहुस्सुतेन च
 सखितं हि करेय्य पण्डितो; भद्दो सप्पुरिसेन संगमो ॥१०१९॥
 पस्स चित्तकतं बिम्बं—प—॥१०२०॥

बहुस्सुतो चित्तकथी बुद्धस्स परिचारको
 पन्नभारो विञ्जुत्तो सेय्यं कप्पेति गोतमो ॥१०२१॥
 खीणासवो विसञ्जुत्तो सङ्गातीतो सुनिब्बुतो
 धारेति अन्तिमं देहं जातिमरणपारगु ॥१०२२॥
 यस्मि पतिट्ठिता धम्मा बुद्धस्सादिच्चबन्धुनो
 निब्बानगमने मग्गे सो'यं तिट्ठति गोतमो ॥१०२३॥
 द्वासीतिं बुद्धतो गण्हि द्वे सहस्सानि भिक्खुतो
 चतुरासीति सहस्सानि ये'मे धम्मा पवत्तिनो ॥१०२४॥
 अप्पसुत्तो'यं पुरिसो बलिबद्धो व जीरति ',
 मंसानि तस्स बड्ढन्ति, पञ्जा तस्स न वड्ढति ॥१०२५॥
 बहुस्सुतो अप्पसुतं यो सुतेनाति मञ्जातिं,
 अन्धो पदीपधारो व तथेव पटिभाति मं ॥१०२६॥
 बहुस्सुतं उपासेय्य सुतञ्चन विनासये;
 तं मूलं ब्रह्मचरियस्स;
 तस्मा धम्मधरो सिया ॥१०२७॥
 पुब्बापरञ्जू अत्थञ्जू निरुत्तिपदकोविदो
 सुग्गहीतञ्च गण्हाति अत्थञ्चोपपरिक्खति ॥१०२८॥
 खन्त्या छन्दिकतो होति, उस्सहित्वा तुलेति तं,
 समये सो पदहति अज्झत्तं सुसमाहितो ॥१०२९॥
 बहुस्सुतं धम्मधरं सप्पञ्जं बुद्धसावकं
 धम्मविञ्जाणमाकङ्खं तं भजथ तथाविधं ॥१०३०॥
 बहुस्सुतो धम्मधरो कोसारक्खो महेसिनो
 चक्खु सब्बस्स लोकस्स पूजनेय्यो बहुस्सुतो ॥१०३१॥
 धम्मरामो धम्मरतो धम्मं अनुविचिन्तयं
 धम्मं अनुस्सरं भिक्खु सद्धम्मा न परिहायति ॥१०३२॥
 कायमच्छेरगरुनो हिय्यमाने अनुट्ठहे
 सरीरसुखगिद्धस्स कुतो समणफासुता ॥१०३३॥
 न पक्खन्ति दिसा सब्बा, धम्मा न पटिभन्ति मं
 गते कल्याणमित्तम्हि अन्धकारं व खायति ॥१०३४॥
 अब्भतीतसहायस्स अतीतगतसत्थुनो
 नत्थि एतादिसं मित्तं यथा कायगता सति ॥१०३५॥

ये पुराणा अतीता ते, नवेहि न समेति मे,
 स्वज्ज एको'व ज्ञायामि वस्सुपेतोव पक्खिमा ॥१०३६॥
 दस्सनाय अतिक्कन्ते नानावेरज्जके बहू
 मा वारयित्थ सोतारो, पस्सन्तु समयो ममं ॥१०३७॥
 दस्सनाय अतिक्कन्ते नाना वेरज्जके पुथू
 करोति सत्था ओकासं नं निवारेति चक्खुमा ॥१०३८॥
 पण्णवीसति वस्सानि सेखभूतस्स मे सतो
 न कामसञ्जा उपपज्जि, पस्स धम्मसुधम्मतं ॥१०३९॥
 पण्णवीसति वस्सानि सेखभूतस्स से सतो
 न दोससञ्जा उपपज्जि, पस्स धम्मसुधम्मतं ॥१०४०॥
 पण्णवीसति वस्सानि भगवन्तं उपट्ठहि
 मेत्तेन कायकम्मेन—मेत्तेन वचिकम्मेन—मे—
 त्तेन मनोकम्मेन छाया व अनपायिनी ॥१०४१॥
 बुद्धस्स चङ्कमन्तस्स पिट्ठि तो अनुचङ्कमिं, १०४३॥
 धम्मे देसियमानमिह ज्ञाणं मे उदपज्जथ ॥१०४४॥
 अहं सकरणीयो'मिह सेखो अप्पत्तमानसो,
 सत्थु च परिनिब्बानं यो अमहं अनुकम्पको ॥१०४५॥
 तदासियं भिसनकं, तदासि लोमहंसनं
 सब्बाकारवरूपेते सम्बुद्धे परिनिब्बुते ॥१०४६॥
 बहुस्सुतो धम्मधरो कोसारक्खो महेसितो
 चक्खु सब्बस्स लोकस्स आनन्दो परिनिब्बुतो ॥१०४७॥
 बहुस्सुतो धम्मधरो—प—अन्धकारे तमोनुदो,
 गतिमन्तो सतीमन्तो धितिमन्तो च यो इसि ॥१०४८॥
 सद्धम्माधारको थेरो आनन्दो रतनाकरो ॥१०४९॥
 परिचिण्णो मया सत्था—प—॥१०५०॥

आनन्दो थेरो

उद्दानं

फुस्सो उपतिस्सो आनन्दो तयो'ति मे पक्कित्तिता;
 गाथायो तत्थ संखाता सतं पञ्च च उत्तरीति.

तिसनिपातो निट्ठितो

चत्तालीसनिपातो

न गणेन पुरक्खतो चरे, विमनो होति, समाधि दुल्लभो;
नानाजनसंगहो दुक्खो इति दिस्वान गणं न रोचये ॥१०५१॥
न कुलानि उपब्बजे मुनि, विमनो होति, समाधि दुल्लभो;
सो उस्सुको रसानुगिद्धो अत्थं रिञ्चति यो सुखावहो ॥१०५२॥
पङ्कको 'ति हि जं अवेदयुं यायं वन्दनपूजना कुलेसु,
मुखुमं सल्लं दुरुब्बहं, सक्कारो कापुरिसेन दुज्जहो ॥१०५३॥
सेनासनम्हा ओरुय्ह नगरं पिण्डाय पाविसिं,
भुज्जन्तं पुरिसं कुट्ठिं सक्कच्चं तं उपट्ठहिं ॥१०५४॥
सो तं पक्केन हत्थेन आलोपं उपनामयि;
आलोपं पक्खिपन्तस्स अङ्गुली पेत्य छिज्जथ ॥१०५५॥
कुड्डमूलञ्च निस्साय आलोपन्तं अभुज्जिसं,
भुज्जमाने च भत्ते वा जेगुच्छं मे न विज्जति ॥१०५६॥
उत्तिट्ठपिण्डो आहारो पूतिमत्तञ्च ओसधं
सेनासनं रुक्खमूलं पंसकूलञ्च चीवरं :
यस्सेते अभिसम्भुत्वा स वे चातुदिस्सो नरो ॥१०५७॥
यत्थ एके विहजन्ति अरुहन्तो सिलुच्चयं
तस्स बुद्धस्स दायादो सम्पजानो पतिस्सतो
इद्धिबलेनुपत्थद्धो कस्सपो अभिरूहति ॥१०५८॥
पिण्डपातपटिक्कन्तो सेलमारुय्ह कस्सपो
झायति अनपादानो पहीनभयभेरवो ॥१०५९॥
पिण्डपातपटिक्कन्तो सेलमारुय्ह कस्सपो
झायति अनपादानो डय्हमानेसु निब्बुतो ॥१०६०॥
पिण्डपातपटिक्कन्तो सेलमारुय्ह कस्सपो
झायति अनपादानो कतकिच्चो अनासवो ॥१०६१॥

करेरिमालावितता भूमिभागा मनोरमा
 कुञ्जराभिरुद्धा रम्मा ते सेला रमयन्ति मं ॥१०६२॥
 नीलबभ्रवण्णा रुचिरा वारिसीता सुचिन्धरा
 इन्दगोपकसञ्छन्ना ते सेला रमयन्ति मं ॥१०६३॥
 नीलबभ्रकूटसदिसा कूटागारवरूपमा
 वारणाभिरुद्धा रम्मा ते सेला रमयन्ति मं ॥१०६४॥
 अभिवुद्धा रम्मतला नगा इसिभि सेविता
 अब्भुन्नदिता सिखीहि ते सेला रमयन्ति मं ॥१०६५॥
 अलं ज्ञायितुकामस्स पहितत्तस्स मे सतो;
 अलं मे अत्थकामस्स पहितत्तस्स भिक्खुनो; ॥१०६६॥
 अलं मे फासुकामस्स पहितत्तस्स भिक्खुनो;
 अलं मे योगकामस्स पहितत्तस्स तादिनो ॥१०६७॥
 उम्मापुप्फवसमाना गगना वब्रच्छादिता
 नाना दिजगणाकिण्णा ते सेला रमयन्ति मं ॥१०६८॥
 अनाकिण्णा गहट्ठेहि मिगसंघनिसेविता
 नानादिजगणाकिण्णा ते सेला रमयन्ति मं ॥१०६९॥
 अच्छोदिका (—११३, ६०१) ॥१०७०॥
 न पञ्चङ्गिकेन तुरियेन रति मे होति तादिसी
 यथा एकगचित्तस्स सम्मा धम्मं विपस्सतो ॥१०७१॥
 कम्मं बहुकं (=४९४) ॥१०७२॥
 कम्मं बहुकं न कारये, परिवज्जेय्य अनत्थनेय्यमेतं
 किच्छति कायो किलमति, दुक्खितो सो समर्थं न विन्दति ॥१०७३॥
 ओट्ठपहतमत्तेन अत्तानं पि न पस्सति,
 पत्थद्वगीवो चरति, अहं सेय्यो 'ति मञ्जति ॥१०७४॥
 असेय्यो सेय्यसमानं बालो मञ्जति अत्तानं,
 न तं विञ्ज्जू पसंसन्ति पत्थद्वमनसं नरं ॥१०७५॥
 यो च सेय्यो 'हं अस्मीति, नाहं सेय्यो 'ति वा पुन,
 हीनो 'हं सदिसो वा 'ति विधासु न विकम्पति ॥१०७६॥
 पञ्जवन्तं तथावादिं सीलेसु सुसमाहितं
 चेतो समर्थसंयुत्तं तञ्च विञ्ज्जू पसंसरे ॥१०७७॥
 यस्स सन्नहाचारीसु गारवो नूपलब्भति,
 आरका होति सद्धम्मा नभसो पुथवी यथा ॥१०७८॥

येसञ्च हिरिओत्तप्पं सदा सम्मा उपट्ठितं,
 विरुद्धह्रद्वाचरिया, तेसं खीणा पुनब्भवा ॥१०७९॥
 उद्धतो चपलो भिक्खु पंसुकूलेन पारुतो
 कपि व सीहचम्मेन न सो तेनुपसोभति ॥१०८०॥
 अनुद्धतो अचपलो निपको संवुत्तिन्द्रियो
 सोभति पंसुकूलेन सीहो व गिरिगम्भरे ॥१०८१॥
 एते सम्बहुला देवा इट्ठिमन्तो यसस्सिनो
 दस देवसहस्सानि सब्बे ते ब्रह्मकायिका ॥१०८२॥
 धम्मसेनापतिं धीरं महाज्ञायिं समाहितं
 सारिपुत्तं नमस्सन्ता तिट्ठन्ती पञ्जलीकता ॥१०८३॥
 नमो ते पुरिस्साजञ्जा, नमो ते पुरिसुत्तम,
 यस्स ते नाभिजानाम यं पि निस्साय ज्ञायति ॥१०८४॥
 अच्छेरं वत बुद्धानं गम्भीरो गोचरो सको,
 ये मयं नाभिजानाम वालवेधी समागता ॥१०८५॥
 तं तथा देवकायेहि पूजितं पूजनारहं
 सारिपुत्तं तदा दिस्वा कप्पिनस्स सितं अहू ॥१०८६॥
 यावता बुद्धखेत्तम्हि ठापयित्वा महामुनिं
 घुतगणे विसिट्ठो 'हं सदिसो मे न विज्जति ॥१०८७॥
 परिचिण्णो मया सत्था—प— ॥१०८८॥
 न चीवरे न सयने भोजने नुपलिप्पति
 गोतमो अनप्पमेय्यो मुळालिपुप्फं विमलं
 व अम्बुना निक्खम्मनिन्नो तिभवाभिनिस्सटो ॥१०८९॥
 सतिपट्ठानगीवो सो सद्धाहत्थो महामुनि
 पञ्जासीसो महाजाणी सदा चरति निब्बुतो 'ति ॥१०९०॥

महाकस्सपो थेरो

उद्दानं

चत्तालीस निपातम्हि महाकस्सपसव्हयो
 एको 'व थेरो, गाथायो चत्तालीस दुवे 'पि चा 'ति
 चत्तालीसनिपातो निट्ठितो

पञ्चासनिपातो

कदा नु 'हं पब्बतकन्दरासु एकाकियो अद्दुतियो विहस्सं
अनिच्चतो सब्बभवं विपस्सं, तं मे इदं तं नु कदा भविस्सति ॥१०९१॥
कदा नु 'हं भिन्नपटन्धरो मुनि कासाववत्थो अममो निरासयो
रागञ्च दोसञ्च तथेव मोहं हन्त्वा सुखी पवनगतो विहस्सं ॥१०९२॥
कदा अनिच्चं वधरोगनीलं कायं इमं मच्चुजरायुपद्दुतं
विपस्समानो वीतभयो विहस्सं एको वने तं नु कदा भविस्सति ॥१०९३॥
कदा नु 'हं भयजननिं दुक्खावहं तण्हालतं बहुविधानुवत्तनिं
पञ्चामयं तिखिणमसिं गहेत्वा छेत्वा वसे, तम्पि कदा भविस्सति ॥१०९४॥
कदा नु पञ्चामयमुग्गतेजं सत्तं इसीनं सहसादियित्वा
मारं ससेनं सहसा भञ्जिस्सं सीहासने, तं नु कदा भविस्सति ॥१०९५॥
कदा नु 'हं सन्निभ समागमेसु दिट्ठो भवे धम्मगरूहि तादिहि
यथा वदस्सीहि जितिन्द्रियेहि
पधानियो तं नु कदा भविस्सति ॥१०९६॥
कदा न मं तन्दिखुदापिपासा वातातपा कीटसिरिसपा वा
निबाधयिस्सन्ति न तं गिरिब्वजे अत्तत्थियं, तं नु कदा भविस्सति ॥१०९७॥
कदा नु खो यं विदितं महेसिना चत्तारि सच्चानि सुदुद्दस्सानि
समाहितत्तो सतिमा अगच्छं पञ्चाय तं, तं नु कदा भविस्सति ॥१०९८॥
कदा नु रूपे अमिते च सद्दे गन्धे रसे फुसितब्बे च धम्मे
आदित्ततो 'हं समथेहि युत्तो पञ्चाय दुक्खं, तदिदं कदा मे ॥१०९९॥
कदा नु 'हं दुब्बचनेन वुत्तो ततो निमित्तं विमनो न हेस्सं,
अथो पसट्ठो पि ततो निमित्तं तुट्ठो न हेस्सं, तदिदं कदा मे ॥११००॥
कदा नु कट्ठे च तिणे लता च खन्धे इमे 'हं अमिते च धम्मे
अज्झत्तिकानेव च बाहिरानि च समं तुलेय्यं तदिदं कदा मे ॥११०१॥
कदा नु मं पावुसकालमेघो नवेन तोयेन सचीवरं वने
इसिप्पयातम्हि पथे वजन्तं ओवस्सते, तं नु कदा भविस्सति ॥११०२॥

कदा भयूरस्स सिखण्डिनो वने दिजस्स सुत्वा गिरिगम्भरे रुतं
 पच्चुट्ठहिक्वा अमतस्स पट्टिया संचिन्तये, तं नु कदा भविस्सति ॥११०३॥
 कदा नु गङ्गं यमुनं सरस्सति पातालखित्तं बळवामुखञ्च
 असज्जमानो पतरेय्यमिद्धिया विभिसनं, तं नु कदा भविस्सति ॥११०४॥
 कदा नु नागो व संगामचारी पदालये कामगुणेषु छन्दं
 निब्बज्जयं सब्बसुभं निमित्तं ज्ञाने युतो, तं नु कदा भविस्सति ॥११०५॥
 कदा इणट्ठो व दळिह्को निभिं आराधयित्वा धनिकेहि पीळितो
 तुट्ठो भविस्सं अधिगम्म सासनं महेसिनो, तं नु कदा भविस्सति ॥११०६॥
 बहूनि वस्सानि तयाम्हि याचितो अगारवासेन अलं नु ते डदं;
 तं दानि मं पब्बजितं समानं किं कारणं चित्तं तुवं न युञ्जसि ॥११०७॥
 ननु अहं चित्तं तयाम्हि याचितो गिरिब्वजे चित्रछदा विहङ्गमा
 महिन्दघोसत्थनिताभिगज्जिनो ते तं रमिस्सन्ति वनम्हि ज्ञायिनं ॥११०८॥
 कुलम्हि मित्ते च पिये च ज्ञातके खिड्डारतिं कामगुणञ्च लोके
 सब्बं पहाय इदमज्झुपागतो, अथो पि त्वं चित्तं न मय्ह तुस्ससि ॥११०९॥
 ममेव एतं नहि तं परेसं, सन्नाहकाले परिदेवितेन किं
 सब्बमिदं चलं इति पेक्खमानो अभिनिक्खमिं अमतं पदं जिगीसं ॥१११०॥
 सुवुत्तवादी द्विपदानमुत्तमो महाभिसक्को नरदम्मसारथि
 चित्तं चलं मक्कटसन्निभं इति अवीतरागेन सुदुन्निवारियं ॥११११॥
 कामाहि चित्रा मधुरा मनोरमा अविहसू यत्थ सिता पुथुज्जना
 ते दुक्खमिच्छन्ति पुनब्भवेसिनो चित्तेन नीता निरये निरंकता ॥१११२॥
 मयूरकोञ्चाभिरुदम्हि कानने दीपीहि ब्यग्घेहि पुरक्खतो वसं
 काये अपेक्खं जह मा विराये इतिस्सु मं चित्तपुरे नियुञ्जसि ॥१११३॥
 भावेहि ज्ञानानि च इन्द्रियानि च बालानि बोज्झङ्गसमाधिभावना
 तिस्सो च विज्जा फुस बुद्धसासने इतिस्सु मं चित्तपुरे नियुञ्जसि ॥१११४॥
 भावेहि मग्गं अमतस्स पत्तिया निय्यानिकं सब्बदुक्खखयोगधं
 अत्थङ्गिकं सब्बकिलेससोधनं इति स्सु... ॥१११५॥
 दुक्खन्ति खन्धे पटिपस्स योनिसो, यतो च दुक्खं समुदेति तं जह,
 इधेव दुक्खस्स करोहि अन्तं इति स्सु... ॥१११६॥
 अनिच्चं दुक्खन्ति विपस्स योनिसो सुञ्जं अनत्ता 'ति अधं वधन्ति च,
 मनोविचारे उपरुन्धि चेतसो, इति स्सु... ॥१११७॥
 मुण्डो विरूपो अभिसापमागतो कपालहत्थो 'व कुलेसु भिक्खसु,
 युञ्जस्सु सत्थु वचने महेसिनो, इति स्सु... ॥१११८॥

सुसंवृततो विसिखन्तरं चरं कुलेसु कामेसु असङ्गमानसो
 चन्दो यथा दोसिनपुण्णमासिया इति स्मु... ॥१११९॥
 आरञ्जिको होति च पिण्डपातिको, सोसानिको होति च पंसुकूलिको,
 नेसज्जिको होति सदा धुते रतो इति स्मु... ॥११२०॥
 रोपेत्वा रुक्खानि यथा फलेसी मूले तस्सं छेत्तु तमेव इच्छसि,
 तथूपमं चित्त इदं करोसि यं मं अनिच्चम्हि चले नियुञ्जसि ॥११२१॥
 अरूपदूरंगम एकचारि न ते करिस्सं वचनं इदानि 'हं,
 दुक्खा हि कामा कटुका महब्भया, निब्बानमेवाभिमनो चरिस्सं ॥११२२॥
 नाहं अलक्ख्या अहिराकताय वा न चित्त हेतू न च दूरकन्तना
 आजीवहेतू च अहं न निक्खमिं, कतो च ते चित्त पटिस्सवो मया ॥११२३॥
 अप्पिच्छता सप्पुरिसेहि वणिग्गता मक्खप्पहानं वूपसमो दुक्खस्स
 इति स्मु मं चित्त तदा नियुञ्जसि, इदानि त्वं गच्छसि पुब्बचिण्णं ॥११२४॥
 तण्हं अविज्जञ्च पियापियञ्च सुभानि रूपानि सुखा च वेदना
 मनापिया कामगुणा च वन्ता, वन्ते अहं आगमितुं न उस्सहे ॥११२५॥
 सब्बत्थ ते चित्त वचो कतं मया, बहू सु जातिसु न मे 'सि कोपितो
 अज्झत्तसम्भवो कतञ्जुताय ते, दुक्खे चिरं संसरितं तया कते ॥११२६॥
 त्वञ्जेव नो चित्त करोसि ब्राह्मणो त्वं खत्तिया राजदिसी करोसि,
 वेस्सा च सुद्धा च भवाम एकदा, देवत्तनं वापि तवेव वाहसा ॥११२७॥
 तवेव हेतू असुरा भवामसे, त्वंमूलकं नेरयिका भवामसे,
 अथो तिरच्छानगतापि एकदा, पेतत्तनं वापि तवेव वाहसा ॥११२८॥
 न नून दुब्भिस्ससि मं पुनप्पुनं मुहुं मुहुं वारणिकं व दस्सहं;
 उम्मत्तकेनेव मया पलोभसि; किञ्चापि ते चित्त विराधितं मया ॥११२९॥
 इदं पुरे..... (=७७) ॥११३०॥
 सत्था च मे लोकमिमं अधिट्ठहि अनिच्चतो अद्ध्यतो असारतो;
 पक्खन्द मं चित्त जिनस्स सासने, तारेहि ओघा महतो सुदुत्तरा ॥११३१॥
 न ते इदं चित्त यथा पुराणकं, नाहं अलं तुय्ह वसे निवत्तितुं;
 महेसितो पब्बजितो 'म्हि सासने, न मादिसा होन्ति विनासधारिनो ॥११३२॥
 नगा समुद्धा सरिता वसुन्धरा दिसा चतस्सा विदिसा अधोदिसा
 सब्बे अनिच्चा तिभवा उपद्दुता, कुहिं गतो चित्त सुखं रमिस्ससि ॥११३३॥
 धी धी परं किं मम चित्त काहसि, न ते अलं चित्त वसानुवत्तको
 न जातु भस्सं दुभतो मुखं छुपे, धिरत्थु पूरं नवसोतसन्दनि ॥११३४॥

वराहणेय्यविगाळ्हसेविते पब्भारकूटे पकटे 'व सुन्दरे
 नवम्बुना पावुससित्तकानने तहिं गुहा गेहगतो रमिस्ससि ॥११३५॥
 सुनीलगीवा सुसिखा सुपेखुणा सुचित्तपत्तच्छदना विहंगमा
 सुमञ्जुघोसत्थ निताभिगज्जिनो ते तं रमिस्सन्ति वनम्हि ज्ञायिनं ॥११३६॥
 उट्ठम्हि देवे चतुरङ्गुले तिणे सम्पुप्फिते मेघनिभम्हि कानने
 नगन्तरे विटपिसमो सयिस्सं, तं मे मुदु होहिति तूलसन्निभं ॥११३७॥
 तथा तु कस्सामि यथापि इस्सरो; यं लब्भती तेन पि होतु मे अलं;
 तं तं करिस्सामि यथा अतन्दितो बिळारभस्तं व यथा सुमदितं ॥११३८॥
 तथा तु कस्सामि यथापि इस्सरो, यं लब्भती तेन पि होतु मे अलं
 विरियेन तं मय्ह वसानयिस्सं गजं व मत्तं कुसलंङ्कुसगगहो ॥११३९॥
 तथा सुदन्तेन अवट्ठितेन हिं हयेन योग्गाचरियो व उज्जुना
 प्होमि मग्गं पटिपज्जितुं सिवं चित्तानुरक्खीहि सदानुसेवितं ॥११४०॥
 आरम्मणे तं बलसा निबन्धिसं नागं व थम्भम्हि दळ्हाय रज्जुया,
 तं मे सु गुत्तं सतिया सुभावितं अनिस्सितं सब्बभवेसु हेहिसि ॥११४१॥
 पञ्जाय छेत्वा विपथानुसारिनं योगेन निगय्ह पथे निवेसिय
 दिस्वा समुदयं विभवञ्च सम्भवं दायादको हेहिसि अग्गवादिनो ॥११४२॥
 चतुब्बिपल्लासवसं अधिट्ठितं गामण्डलं व परिनेसि चित्तं मं
 ननु सञ्जोजनवन्धनच्छिदं संसेवसे कारुणिकं महामुनिं ॥११४३॥
 मिगो यथा सेरि सुचित्तकानेन रम्मं गिरि पाविसि अब्भमालिनं,
 अनाकुले तत्थ नगे रमिस्ससि, असंसयं चित्तपराभविस्ससि ॥११४४॥
 ये तुय्ह छन्देन वसेन वत्तिनो नरा च नारी च अनुभोन्ति यं सुखं,
 अविद्सू मारवसानुवत्तिनो भवाभिनन्दी तव चित्तं सेवका 'ति ॥११४५॥

तालपुटो थेरो

उद्दानं

पञ्जासम्हि निपातम्हि एको तालपुटो सुचि,
 गाथायो तत्थ पञ्जास पुन पञ्च च उत्तरी'ति ।

पञ्जासनिपातो समत्तो

सठिकनिपातो

आरञ्जका पिण्डपातिका उञ्छापत्तागतेरता
दालेमु मच्चुनो सेनं अञ्जत्तं सुसमाहिता ॥११४६॥
आरञ्जका पिण्डपातिका उञ्छापत्तागतेरता
धुनाम मच्चुनो सेनं नळागारं व कुञ्जरो ॥११४७॥
रुक्खमूलिका साततिका उञ्छापत्तागते रता
दालेमु.....सुसमाहिता ॥११४८॥
रुक्खमूलिका.....सात. उञ्छ. र.
धुनाम.....कुञ्जरो ॥११४९॥
अट्टिकङ्कलकृटिके मंसन्हारुप्पसिब्बिते
धिरत्थु पूरे दुग्गन्धे परगत्ते ममायसे ॥११५०॥
गूथभस्ते तचोनद्धे उरगण डपिसाचिनि
नन सोतानि ते काये यानि सन्दति सब्बदा ॥११५१॥
तव सरीरं नवसोतं दुग्गन्धं करिपरिबन्ध,
भिक्षुपरिवज्जयेते तं मीळ्हं व यथा सुचिकामो ॥११५२॥
एवञ्चे तं जनो ञ्ज्जा यथा जानामि तं अहं,
आरका परिवज्जेय्य गूथट्टानं व पावुसो ॥११५३॥
एवमेतं महावीर यथा समण भाससि,
एत्थचेके विसीदन्ति पड्कम्हि व जरग्गवो ॥११५४॥
आकासम्हि हलिद्दाय यो मञ्जेथ रजेतवे
अञ्जेन वापि रङ्गेन, विघातुदयमेव तं ॥११५५॥
तदा काससमं चित्तं अञ्जत्तं सुसमाहितं;
मा पापचित्ते आहरि अग्गिक्खन्धं व पक्खिमा ॥११५६॥
पस्स चित्तकत्तं बिम्बम्—प—॥११५७॥
तदासियं भिसनकं, तदासि लोमहसनं
अनेकाकारसम्पन्ने सारिपुत्तम्हि निब्बुते ॥११५८॥

अनिच्चा वत संखारा—प—॥११५९॥
 मुखुमं पटिविज्जन्ति वालग्गमुसुना यथा,
 ये पञ्च खन्धे पस्सन्ति परतो न च अत्तनो ॥११६०॥
 ये च पस्सन्ति संखारे परतो न च अत्तनो,
 पच्चब्बाधिं सु निपुणं वालग्गं उसुना यथा ॥११६१॥
 सत्तिया विय ओमट्ठो . . . (—३९, ४०,) ॥११६२-११६३॥
 चोदितो भावितत्तेन सरीरन्तिमधारिना
 भिगारमातु पासादं पादङ्गुट्ठेन कम्पयि ॥११६४॥
 न यिदं सिथिलमारब्भ न इदं अप्पेन थामसा
 निब्बानमधिगन्तब्बं सब्बगन्थ पमोचनं ॥११६५॥
 अयञ्च दहरो भिक्खु, अयमुत्तमपोरिसो ।
 धारेति अन्तिमं देहं जेत्वा मारं सवाहनं ॥११६६॥
 विवरमनुपतन्ति विज्जुता वेभारस्स च पण्डवस्स च ।
 नग विवरगतो च ज्ञायति पुत्तो अप्पटिमस्स तादिनो ॥११६७॥
 उपसन्तो उपरतो पन्तसेनासनो मुनि ।
 दायादो बुद्धसेट्ठस्स ब्रह्मणा अभिवन्दितो ॥११६८॥
 उपसन्तं उपरतं पन्तसेनासनं मुनिं ।
 दायादं बुद्धसेट्ठस्स वन्द ब्राह्मण कस्सपं ॥११६९॥
 यो च जातिसतं गच्छे सव्वा ब्राह्मणजातियो ।
 सोत्तियो वेदसम्पन्नो मनुस्सेसु पुनप्पुनं ॥११७०॥
 अज्झायको पि चे अस्स तिण्णं वेदान पारगू ।
 एतस्स वन्दानायेकं कलं नग्घति सोळ्हासि ॥११७१॥
 यो सो अट्ठ विमोक्खानि पूरे भत्तं अपस्सयि ।
 अनुलोमं पटिलोमं, ततो पिण्डाय गच्छति ॥११७२॥
 तादिसं भिक्खुं माहरि, मात्तानं खणि ब्राह्मण ।
 अभिप्पसादेहि मनं अरहन्तम्हि तादिने ।
 खिप्पं पञ्जलिको वन्द मा ते विजटि मत्थकं ॥११७३॥
 न सो पस्सति सट्ठमं संसारेन पुरक्खतो ।
 अचङ्कनं जिम्हपथं कुमग्गमनुधावति ॥११७४॥
 कामी व माळ्हसल्लित्तो संखारे अधिमुच्छित्तो ।
 पगाळ्हो लाभसक्कारे तुच्छो गच्छति पोढिलो ॥११७५॥

इमञ्च पस्स आयन्तं सारिपुत्तं सुदस्सं ।
 विमुत्तं उभतोभागे अज्झत्तं सुसमाहितं ॥११७६॥
 विसल्लं खीणसंयोगं ते विज्जं मच्चुहायिनं ।
 दक्खिण्येयं मनुस्सानं पुञ्जाखेत्तमनुत्तरं ॥११७७॥
 एते सम्बहुला देवा इद्धिमन्तो यसस्सिनो ।
 दस देवसहस्सानि सब्बे ब्रह्मपुरोहिता ।
 मोग्गल्लानं नमस्सन्ता तिट्ठन्ती पञ्जलीकताः ॥११७८॥
 नमो ते पुरिसाजञ्जा, नमो ते पुरिमुत्तम ।
 यस्स ते आसवा खीण, दक्खिण्यो 'सि मारिस ॥११७९॥
 पूजितो नरदेवेन उप्पन्नो मरणाभिभू ।
 पुण्डरीकं व तोयेन संखारे नोपलिप्पति ॥११८०॥
 यस्से मुहुत्ते सहस्सधा लोको संविदितो, स ब्रह्मकप्पो ।
 वसी इद्धिगुणे चुत्तुपपाते काले पस्सति देवता स भिक्खु ॥११८१॥
 सारिपुत्तो व पञ्जाय सीलेन उपसमेन च ।
 यो पि पारंगतो भिक्खु एतावपरमो सिया ॥११८२॥
 कोटिसतसहस्सस्स अत्तभावं खणेन निम्मिने ।
 अहं विकुब्बनासु कुसलो वसीधूतो 'म्हि इद्धिया ॥११८३॥
 समाधिविज्जावसि पारमीगतो मोग्गल्लानगोत्तो असितस्सं सासने ।
 धीरो समुच्छिन्दि समाहितिन्द्रियो नागो ।
 यथा पूतिलतं व बन्धनं ॥११८४॥
 परिचिण्णो . . . (—६०४, ६०५) ॥११८५-११८६॥
 कीदिसो निरयो आमि यत्थ दुस्सी अपच्चथ ।
 विधुरं सावकमासज्ज ककुसन्धञ्च ब्राह्मणं, ११८७॥
 सतमासि अयोसङ्कू सब्बे पच्चत्तवेदना
 ईदिसो निरयो आसि यत्थ दुस्सी अपच्चथ
 विधुरं सावकमासज्ज ककुसन्धञ्च ब्राह्मणं ॥११८८॥
 यो एतमभिजानाति भिक्खु बुद्धस्स सावको,
 तादिसं भिक्खुमासज्ज कण्ह दुक्ख निगच्छसि ॥११८९॥
 मज्झे सागरस्मि तिट्ठन्ति विमाना कप्पट्टायिनो
 वेळुरियवण्णा रुचिरा अच्चिमन्तो पभस्सरा
 अच्छरा तत्थ नच्चान्ति पुथू नानत्तवणिण्यो, ॥११९०॥
 यो एतमभि—प—कण्ह दुक्खं निगच्छसि ॥११९१॥

यो वे बुद्धेन चोदितो भिक्खु संघस्स पेक्खतो
 मिगारमातु पासादं पादङ्गुट्ठेन कम्पयि ॥११९२॥
 यो एतमभि० . . . ॥११९३॥
 यो वेजयन्तपासादं पादङ्गुट्ठेन कम्पयि
 इट्ठिवलेनुपत्थद्धो संवेज्जोसि च देवता ॥११९४॥
 यो एतमभि० ॥११९५॥
 यो वेजयन्त पासादे सुखं सो परिपुच्छतिः
 अपि आवुसो जानासि तण्हक्खयविमुत्तियो; —
 तस्स सक्को वियाकासि पञ्चं पुट्ठो यथातथं ॥११९६॥
 यो एतमभि० ॥११९७॥
 यो ब्रह्मानं परिपुच्छति सुधम्मायं अभितोसभं:
 अज्जापि ते आवुसो सा दिट्ठि या ते दिट्ठि पुरे अह्;
 पस्ससि वीति वत्तन्तं ब्रह्मलोके पभस्सरं; ॥११९८॥
 तस्स ब्रह्मा वियाकासि पञ्चं पुट्ठो यथातथं:
 न मे मारिस सदिट्ठि या मे दिट्ठि पुरे अह्; ॥११९९॥
 पस्सामि वीतिवत्तन्तं ब्रह्मलोके पभस्सरं;
 सो'हमज्ज कथं वज्जं: अहं निच्चो 'मिह सासतो; — १२००॥
 यो एतमभि० ॥१२०१॥
 यो महानेरुनो कूटं विमोक्खेन उपस्सयि,
 वनं पुब्बविदाहानं ये च भूमिसयारना,— १२०२॥
 यो एतमभि० ॥१२०३॥
 न वे अग्निं चेतयति अहं बालं दहामीति,
 बालो च जलितमग्निं आसज्ज नं पडय्हति; ॥१२०४॥
 एवमेव तुवं मार आसज्ज नं तथागतं
 सयं दाहिस्समत्तानं बालो अग्निं व सम्फुसं ॥१२०५॥
 अपुज्जं फसवी मारो आसज्ज नं तथागं;
 किं नु मज्जसि पापि म न मे पापं विपच्चति ॥१२०६॥
 करतो ते मिय्यते पापं चिररत्ताय अन्तक;
 मार निब्बिन्द बुद्धम्हा, आसं मा कासि भिक्खुसु ॥१२०७॥
 इति मारं अतज्जेसि भिक्खु भेसकळावने,
 ततो सो दुम्मनो यक्खो तथेव अन्तरधायतीति ॥१२०८॥
 इत्थं सुदं आयस्मा महामोग्गल्लानो थेरो गाथायो अभासित्थीति

सट्ठिकनिपातो

[११६]

उद्दानं भवति:

सट्ठिकम्हि निपातम्हि मोग्गलानो बहिद्धिको
एको 'व थेरो, गाथायो अट्ठसट्ठि भवन्ति ता 'ति

महानिपातो

निक्खन्तं वत मं सन्तं अगारस्मा अनगारियं
वितक्का उपधावन्ति पगब्भा कण्हतो इमेः ॥१२०९॥
उग्गपुत्ता महिस्सासा सिक्खिता दग्धम्मिनो
समन्ता परिकिरेय्युं सपस्सं अपलायिनं ॥१२१०॥
सचे पि एत्तका भिय्यो आगमिस्सन्ति इत्थियो,
नेव मं व्याधयिस्सन्ति धम्मे स्वम्हि पतिट्ठितो ॥१२११॥
स किंहि मे सुतं एतं बुद्धस्सादिच्च बन्धुनो
निब्बानगमनं मग्गं, तत्थ मे निरतो मनो ॥१२१२॥
एवमेवं विहरन्तं पापिम उपगच्छसि,
तथा मच्चु करिस्सामिः न मे मग्गं उदिक्खसि ॥१२१३॥
अरतिं रतिं च पहाय सब्बसो गेहसितञ्च वितक्कं
वनथं न करेय्य कुहिञ्चि, निब्बनथा
अवनथो स हि भिक्खु ॥१२१४॥
यमिध पथविञ्च विहासं रूपगतं जगतोगधं किञ्चि,
परिजिय्यति सब्बमनिच्चंः एवं समेच्च चरन्ति मुत्तन्ता ॥१२१५॥
उपधीसु जना गधितासे दिट्ठसुते पटिघे च मुते च,
एत्थ विनोदय छन्दमनेजो; यो हेत्थ न लिप्पति मुनि तमाहु ॥१२१६॥
अट्टसट्ठि सिका सवितक्का पुथुज्जनताय अधम्मनिविट्ठा;
न च वग्गगतिस्स कुहिञ्चि, नु पन पदुस्लगाही स भिक्खु ॥१२१७॥
दब्बो चिररत्तं समाहितो अकुहको निपको अपिहालु
सन्तं पदमञ्ज्जहगमा मुनि, पटिच्च परिनिब्बुतो कल्लति कालं ॥१२१८॥
मानं पजहस्सु गोतम मानपथञ्च जहस्सु असेरां;
मानपथं हि समुच्छितो विप्पटिसारी हुत्वा चिररत्तं ॥१२१९॥
मक्खेन मक्खिता पजा मानहता निरयं पतन्ति,
सोचन्ति जना चिररत्तं मानहता निरयं उपपन्ना ॥१२२०॥

न हि सोचति भिक्खु कदाचि मग्गजिनो सम्मा पटिपन्नो,
 कित्तिञ्च सुखञ्चानुभोति, धम्मदसो'ति तमाहु तथत्तं ॥१२२१॥
 तस्मा अखिलो इधममानवा निवरणानि पहाय विसुद्धो
 मानञ्च पहाय असेसं विज्जायन्तकरो समितावी ॥१२२२॥
 कमरागेन ड्य्हामि. चित्तं मे परिड्य्हति,
 साधु निब्बापनं ब्रूहि अनुकम्पाय गोतम ॥१२२३॥
 सञ्जाय विपरियेसा चित्तन्ते परिड्य्हति;
 निमित्तं परिवज्जेहि सुभं रागूप संहितं ॥१२२४॥
 असुभाय चित्तं भावेहि एकगं सुसमाहितं,
 सत्तिकायगता त्यत्थु निब्बिदा बहुलो भव ॥१२२५॥
 अनिमित्तञ्च भावेहि, मानानुसयमुज्जह,
 ततो मानाभिसमया उपसन्तो चरिस्ससि ॥१२२६॥
 तमेव वाचं भासेय्य; यायत्थानं न तापये
 परे चन त्तिहंसेय्य, सावे वाचा सुभासिता ॥१२२७॥
 पियवाचमेव भासेय्य या वाचा पटिनन्दिता
 यं अनादाय पापानि परेसं भासते पियं ॥१२२८॥
 सच्चं वे अमता वाचा एसन धम्मो सनन्तनो;
 सच्चे अत्थे च धम्मे च आहु सन्तो पतिट्ठिता ॥१२२९॥
 यं बुद्धो भासती वाचं खेमं निब्बानपत्तिया
 दुक्खस्सन्तकिरियाय, स वे वाचानमुत्तमा ॥१२३०॥
 गम्भीरपञ्जो मेधावी मग्गामग्गस्स कोविदो
 सारिपुत्तो महापञ्जो धमं देसेति भिक्खुनं ॥१२३१॥
 संखित्तेन पि देसेति वित्थारेन पि भासति,
 सीलिकायेव निग्घोसो पटिभानं उदीय्यति ॥१२३२॥
 तस्स तं देसयन्तस्स सुणन्ता मधुरं गिरं
 सरेन राजनीयेन सवनीयेन वग्गुना
 उदग्गचित्ता मुदिता सोतं ओधेन्ति भिक्खवो ॥१२३३॥
 अज्ज पन्नरसे विसुद्धिया भिक्खू पञ्चसता समागता
 संयोजन बन्ध नच्छिदा अनीघा खीणपुनब्भवा इसी ॥१२३४॥
 चक्कवत्ती यथा राजा अमच्च परिवारितो
 समन्ता अनुपरियेति सागरन्तं महिं इमं ॥१२३५॥

एवं विजितसंगामं सत्थवाहं अनुत्तरं
 सावका पयिरुपासन्ति ते विज्जा मच्चु हायिनो ॥१२३६॥
 सब्बे भगवतो पुत्तो, पलापो एत्थ न विज्जति;
 तण्हा सल्लस्स हन्तारं वन्दे आदिच्चबन्धुनं ॥१२३७॥
 परोसहस्सं भिक्खूनं सुगतं पयिरुपासति
 देसेन्तं विरजं धम्मं निब्बानं अकुतोभयं ॥१२३८॥
 सुणन्ति धम्मं विपुलं सम्मासम्बुद्धदेसितं;
 सोभति वत सम्बुद्धो भिक्खु संघपुरस्सतो ॥१२३९॥
 नागनामो'सि भगवा, इसीनं इसि सत्तमो,
 महामेघो व हुत्वान सावके अभिवस्ससि ॥१२४०॥
 दिवा विहारा निक्खमा सत्थुदस्सनकम्पता
 सावको ते महावीर पादे वन्दति वड्ढिगसो ॥१२४१॥
 उम्मग्गपथं मारस्स अभिभुय्य चरति पभिज्ज खिलानि;
 तं पस्सथ बन्धन पमुञ्चकरं असितं व भागसो पविभज्ज ॥१२४२॥
 ओघस्सहि नित्थरणत्थं अनेक विहितं मग्गं अक्खासि,
 तस्मिञ्च अमते अक्खाते धम्मदसाठिता असंहीरा ॥१२४३॥
 पुज्जोत्तकरो अतिविज्झ सब्बट्ठितान मतिक्कममद्दा,
 ज्ञात्वा च सच्छिक्त्वा च अग्गं सो देसयि दसद्धानं ॥१२४४॥
 एवं सुदेसिते धम्मे को पमादो विजानतं धम्मं,
 तस्माहि तस्स भगवतो सासने अप्पमत्तो
 सदा नमस्स मनुसिक्खे ॥१२४५॥
 बुद्धानुबुद्धो यो थेरो कोण्डञ्जो तिब्बनिक्खमो,
 लाभो सुख विहारानं विवेकानं अभिण्हसो ॥१२४६॥
 यं सावकेन पत्तब्बं सत्थुसासनकारिना,
 सब्बस्स तं अनुप्पत्तं अप्पमत्तस्स सिक्खतो ॥१२४७॥
 महानुभावो ते विज्जो चेतो परियकोविदो
 कोण्डञ्जो बुद्धदायादो पादे वन्दति सत्थुनो ॥१२४८॥
 नागस्स पस्से आसीनं मुनिं दुक्खस्स पारगुं
 सावका परियुपासन्ति ते विज्जा मच्चुहायिनो ॥१२४९॥
 चेतसा अनुपरियेति मोग्गलानो महिद्धिको
 चित्तं नेसं समन्वेसं विप्पमुत्तं निरूपधि ॥१२५०॥

एवं सब्बङ्गसम्पन्नं मुनिं दुक्खस्स पारगुं
 अनेकारसम्पन्नं पयिरूपासन्ति गोतमं ॥१२५१॥
 चन्दो यथा विगतवलाहके नभे विरोचति,
 वीतमलो व भानुमा,
 एवम्पि अङ्गरीरसत्वं महामुनि,
 अतिरोचसि यससा सब्बलोकं ॥१२५२॥
 कावेय्यमत्ता विचरिम्ह पुब्बे गामा गामं पुरा पुरं,
 अथद् सामि सम्बुद्धं सब्ब धम्मान पारगुं ॥१२५३॥
 सो मे धम्म मदेदेसि मुनि दुक्खस्स पारगुं;
 धम्मं सुत्वा पसीदिम्ह, सद्धा नो उदपज्जथ ॥१२५४॥
 तस्साहं वचनं सुत्वा खन्धे आयतनानि च
 धारुयो च विदित्वा न पब्बजिं अनगारियं ॥१२५५॥
 बहून् वत अत्थाय उप्पज्जन्ति तथागता
 इत्थीनं पुरिसानञ्च ये ते सासनकारका ॥१२५६॥
 तेसं खो वत अत्थाय बोधिं अज्जगमा मुनि .
 भिक्खून् भिक्खुनीनञ्च ये नियामगतंदसा ॥१२५७॥
 सुदेसिता चक्खुमता बुद्धेनादिच्चबन्धुना
 चत्तारि अरियसच्चानि अनुकम्पाय पाणिनं ॥१२५८॥
 दुक्खं दुक्खसमुप्पादं दुक्खस्स च अतिवकमं
 अरियद्वुद्दिगं मगं दुक्खूपसम गामिनं ॥१२५९॥
 एवमेते तथा वुत्ता, दिट्ठा मेते यथा तथा;
 सदत्थो मे अनुप्पत्तो, कतं बुद्धस्स सासनं ॥१२६०॥
 स्वागतं वत मे आसि मम बुद्धस्स सन्तिके;
 सम्बिभत्तेसु धम्मेसु यं सेट्ठं तदुपागमिं ॥१२६१॥
 अभिज्जापार मिप्पत्तो सोतधारु विसोधितो
 ते विज्जो इद्विप्पत्तो'म्हि चेतो परियकोविदो ॥१२६२॥
 पुच्छामि सत्थारमनो मपज्जं दिट्ठेव
 धम्मे यो विचिकिच्छानं छेत्वा:
 अगाळवे कालमकासि भिक्खु जातो
 यसस्सी अभिनिब्बुतत्तो ॥१२६३॥

निग्रोधअप्पो इति तस्स नामं तथा कतं
 भगवा ब्रह्मणस्स,
 सोतं नमस्सं अचरि मुत्य पेक्खो आरद्धविरियो दळ्हधम्मदस्सी ॥१२६४॥
 तं सावकं सक्कमयम्पि सब्बे अञ्जातुनिच्छाम समन्त चक्खुः
 समवट्ठिता नो सवनाय सोतं, तुवं नु सत्था त्वमनुत्तरो'सि ॥१२६५॥
 छिन्देव नो विचिकिच्छं, ब्रूहि मे तं, परिनिव्वुतं वेदय भूरिपञ्ज
 मज्झेव नो भास समन्तचक्खु सक्को व
 देवान सहस्सनुत्तो ॥१२६६॥
 ये केचि गन्धा इध मोहमग्गा अञ्जाणपक्खा
 विचिकिच्छद्धाना,
 तथागतं पत्वा न ते भवन्ति, चक्खुम्हि
 एतं परमं नरानं ॥१२६७॥
 न चेहि ज्ञातु पुरिसो किलेसे वातो यथा अब्भघनं विहाने,
 तमो वस्स निव्वुतो सब्बलोके, जोतिमन्तो पि
 न पभासेय्युं ॥१२६८॥
 धीरा च पञ्जोतकरा भवन्ति, तं तं अहं
 धीर तथेव बज्जे,
 विपस्सिनं जानमुपापगमिम्ह, परिसाय नो
 अविरोहि कप्पं ॥१२६९॥
 खिप्पं किरं एरय वग्गु वग्गु हंसो व पग्गह
 सनिकं निकूजं
 विन्दुस्सेरेन सुविकप्पितेन, सब्बेव ते
 उज्जुगता सुणोम ॥१२७०॥
 पहीनजातिमरणं असेसं निग्गय्ह धोनं
 वदेस्सामि धम्मं,
 न कामकारो हि पुथुज्जनानं, संखेय्यकारो'वव
 तथागतानं ॥१२७१॥
 सम्पन्न वेय्याकरणं तवेदं समुञ्जपञ्जस्स
 समुग्गहीतं;
 अयमञ्जलि पच्छिमो सुप्पणामितो, मा मोहयि जानमनोमपञ्ज ॥१२७२॥
 परोवरं अरियधम्मं विदित्वा मा मोहयि जानमनोमविरिय,
 वारिं यथा घम्मनिघम्मतत्तो वाचाभिकङ्खामि, सुतं पवस्स ॥१२७३॥

यदत्थियं ब्रह्मचरियं अचारि कप्पायनो किच्चि'स्स तं अमोघं;
 निब्बायि सो आहु सोपादिसेसो; यथा विमुत्तो अहु तं सुणोम ॥१२७४॥
 अच्छेच्छि तण्हं इध माम रूपे'ति भगवा,
 तण्हाय सोतं दीघरत्तानुसयितं
 अतारि जाति मरणं असेसं इच्चब्रवि भगवा
 पञ्चसेट्ठो ॥१२७५॥
 एस सुत्वा पसीदामि वचो ते इसिसत्तम,
 अमोघं किर मे पुट्ठं न मं वञ्चेसि ब्राह्मणो ॥१२७६॥
 यथावादी तथाकारी अहु बुद्धस्स सावको,
 अच्छेच्छि मच्चुनो जालं तथं मायाविनो-दळ्हं ॥१२७७॥
 अहस भगवा आदि उपादानस्स कप्पियो,
 अच्छगा वत कप्पायनो मच्चुधेय्यं सुदुत्तरं ॥१२७८॥
 तं देवदेवं वन्दामिपुत्तं ते द्विपदुत्तम
 अनुजातं महागोरं नागं नागस्स ओरसन्ति ॥१२७९॥
 इत्थं सुदं आयस्मा वड्ढगीसोथेरो गाथायो अभासित्था'ति,
 महानिपातो निट्ठितो
 सत्ततिमिह निपतामिह वड्ढगीसो पटिभाणवा
 एको'वत्थेरो' नत्थञ्जो, गाथायो एकसत्तति ।
 सहस्सं होन्ति ता गाथा तीणि सट्ठि सतानि च
 थेरा च द्वे सता सट्ठि चत्तारो च पकासिता ।
 सीहनादं नदित्वान बुद्धपुत्ता अनासवा
 खेमन्तं पापुणित्वान अग्गिक्खन्धा व निब्बेता'ति ।

निट्ठिता थेरगाथायो

